

**EUTROPII  
BREUIARIUM  
HISTOR.  
ROMANAE, AB  
VRBE CONDITA...**

---

Eutropius, Sextus Aurelius  
Victor



9

4-C

23

M



~~4-C-23~~



# EVTROPII

## HISTORIA ROMANA.

*Vnà cum*

VIRIS ILLVSTRIBVS  
AVR. VICTORIS.

*Editio emendatissima.*



SALMVRII,  
Apud IOANNEM LE'NERIVM.

M. DC. LXVII.

ИЗДАНИЕ

ВЪВЕДЕНІЕ

ОБЪЯВЛЕНІЕ

ОБЪЯВЛЕНІЕ

ОБЪЯВЛЕНІЕ

ОБЪЯВЛЕНІЕ

ОБЪЯВЛЕНІЕ



ОБЪЯВЛЕНІЕ

ОБЪЯВЛЕНІЕ

ОБЪЯВЛЕНІЕ

ОБЪЯВЛЕНІЕ





A D  
LECTOREM.



VTROPII libellum unū  
cum Viris Illustribus Au-  
relij Victoris nunc nuper de-  
scribi curavi; quo facilius  
tenella puerorum nostrorum  
etas historia Romanæ ele-  
menta mature cognosceret; nam absque eo  
sit; vix est, imo nunquam erit, ut hæc  
studiola fructus optatos ferant; Sed Magi-  
strorum fuerit nihil prælegere, quod non &  
accurate, & amanter tradatur. Adhibenda  
erunt tabula aliquot Geographiæ veteris, in  
primis autem Italia, Græciæ, Sicilia, Asia  
Minoris, omnium denique orarum, quas  
Mare Internum alluit; idque facili negotio  
perfici potest.


Saluberrimum fuerit hoc quoque: aut, ut  
verius dicam, perquam plane necessarium est,  
ut pueri dies noctesque in animo habeant Vr-  
bis Romana delineationem, qualis à Ligorio  
edita est. Si quid aliunde petendum, vel ad

# AD LECTOREM.

verum explicationem , vel ad quorundam locorum emendationem , (nam vix ullum historicum reperias , qui non alicubi errauerit) id ex Rosino , Manutio , Sigonio , alijs , colligi poterit. Addo & hoc quoque, quod contra fieri video , Crebris interrogationibus circa temporum intervalla , montium , fluuiorum , urbium , provinciarum , officiorum , dignitatumque nomina exercitandos esse pueros. Puer enim multa scire videtur , dum legit , quae nescit tamen :

Nam videt , aut vidisse putat per nubila Lunam ;

Neque id modo in pueris verum est , sed in iis etiam qui natu grandiores sunt. Hincque adeo factum , ut Socrates non aliter cum discipulis , siue amicis , ageret. Quod & Paulus Seruita , vir aeterna memoria dignissimus , ita animaduertit , ut eam docendi rationem , quae hodie passim per Europam obtinet , quasi ineptam , & ridiculam , improbaret. Dices paucos reperiri posse Magistros , qui hoc praestent ; contra enim saepe fieri , ut quos tibi Magistros paraueris , ijs ipsis Magistro opus sit ; Fateor , & verum est ; sed & hoc ipse fateberis , si quid sapias , satius esse multo non didicisse literas , quam eas male didicisse.



E X

GERARDO VOSSIO

LIB. II.

DE HISTOR. LATIN.

**E**V TROP I V S, sophista Italus, ut eum vocat Suidas, cum alia quædam, eodem teste, tum breuiarium scripsit rerum Romanarum ab V. C. usque ad Flauium Valentem Augustum, cui & opus suum dicauit. Militasse se ait sub Iuliano, atque expeditioni eius in Persas interfuisse. Quò & pertinent verba Georgij Codini in Selectis de Originibus Constantinopolitanis, ubi sic scribit: Εὐτρόπιος, ὁ πρὸ παραβάτη Ἰβλιανῶν συμπαραὼν ἐν τῇ Περσίδι. Laudat verò eum testem in rebus Constantini Magni, quas oculis suis vidisse eum ait. At-



que ex his patet error Prolemæi, & huius se auctoritate tuentis Raphaëlis Volaterrani, qui Eutropium hunc fuisse putarunt discipulum B. Augustini. Quæ & sententia est Philippi Bergomatis in Suppl. Chron. ad an. cccxxxix. Item Gesneri, & Eisingrinij, & Theodori Zuingeri Theatri sui volumine vi. lib. ii. adhæc Possevini in Apparatu sacro, atque aliorum. In errorem omnes eos impulit, quòd Gennadius in illustrium virorum catalogo Eutropium quendam referat, de quo hunc in modum apud eum legitur: *Eutropius presbyter scripsit ad duas sorores, ancillas Christi, quæ ob denotionem pudicitia, & amorem religionis, exheredatæ sunt à parentibus, epistolas in modum libellorum consolatorias, eleganti & aperto sermone duas, non solum ratione, sed etiam testimonijs Scripturarum munitas.* Meminit autem eius Gennadius post Augustinum, Orosium, alios. Hunc illi esse breuiarij scriptorem crediderunt. Sed tempora



# DE HISTOR. LATIN.

repugnant, cū auctor breuiarij, Constantini, eius liberorum, Iuliani, Iouiani, & Valentis temporibus vixerit: at non item Gratiani, aut Theodosij; saltem non Arcadij, & Honorij: vt Augustino esse iunior non possit. Adhæc ille Gennadio memoratus presbyter erat: at hic an Christianus fuerit, ambigitur, cū reticeat Christianorum persecutiones X. ac in Iouiano apertè suadeat perfidiam. Scio esse, qui Christianum fuisse colligant exinde, quod de Iuliano scribat: *Religionis Christiana insectator, perinde tamen ut cruce abstineret.* Sed ita quoque scribere potuit gentilis, saltem qui in confinio tenebrarum ac lucis constitutus, nec gentilem religionem probaret, nec Christianæ tamen nomen dedisset: quales seculum illud habuit multos. Sed utcumque hoc est, tempora, vt vidimus, eos refellunt, qui Augustino Eutropium faciunt iuniorem. Ac mirum in isto etiam aberrasse virum temporum

bene gnarum Stephanum Pighium  
 Campensem in Annal. Rom. ad an.  
 Urbis locxxviii, vbi sua de atroci  
 Africæ pestilentia ex locustis coorta  
 exscripsisse ait Eutropium ex Oro-  
 sio: qui demum scripsit post Romam  
 ab Alaricho captam. Vbi & alter  
 error. Nihil enim de eo Eutropius.  
 Credo dicere voluit Paulum siue Io-  
 annem Diaconum: in cuius historiâ  
 Miscella eadem ex Orosio transcri-  
 pta legere est. Stylum si spectes, pa-  
 rum est concinnus: sed hoc ætati, qua  
 vixit, tribuamus. Res verò ipsas com-  
 pendio satis commodo constrinxit.  
 Sanè quanti à Græcis fieri soleat,  
 vel argumento illud erit, quòd Ca-  
 pito historicus Lycius, epitomes  
 Eutropij *μετάφρασιν* scripserit Græcè:  
 vt Suidas docet in *καμίων*. Imò &  
 Simlerus, in Appendice Bibliothecæ  
 Gesneri, testatur, in bibliotheca  
 P. Pithæi exstare *Παλαιὰ μετὰφρασιν*  
 Romanæ Eutropij historiæ. Ac vi-  
 deo quædam ex Pæanio hoc citari  
 à Scaligero, &c.

**EVTROPII**  
**BREVIARIUM**  
**HISTOR. ROMANÆ,**  
**AB VRBE CONDITA**  
**ad annum ejusdem Urbis**

---

**M. C. IX.**

**A**





DOMINO  
VALENTI, GOTHICO,  
MAXIMO, PERPETVO  
AVGVSTO.

**R**ES Romanas ex voluntate Man-  
suetudinis tuae ab Vrbe condita ad  
nostram memoriam, quae in negotiis, vel  
bellicis, vel civilibus eminebant, per or-  
dinem temporum breui narratione colle-  
gi, strictim additis etiam iis, quae in  
Principum vitis egregia exstiterunt; ut  
Tranquillitatis tuae possit mens diuina  
latari, prius se illustrium virorum facta  
in administrando imperio sequentem,  
quam cognosceret lectione.





# EVTROPII

## LIBER PRIMVS.



ROMANVM imperium,  
quo neque ab exordio vl-  
lum fere minus, neque in-  
crementis toto orbe am-  
plius humana potest me-  
moriam recordari, à RO-  
MULO exordium habet:  
qui Vestalis virginis filius, & ( quantum  
putatus est ) Martis, cum Remo fratre, vno  
partu editus est. Is cum inter pastores latro-  
cinaretur, octodecim annos natus, urbem  
exiguam in Palatino monte constituit, xi.  
Kal. Maij, Olympiadis sextæ anno tertio,  
post Troiæ excidium, vt qui plurimum mi-  
nimumque tradunt, trecentesimo nonage-  
simo-quarto. Condita ciuitate, quam ex  
nomine suo Romam vocauit, hæc fere  
egit. Multitudinem finitimorum in Ciui-  
tatem recepit: centum ex senioribus ele-  
git, quorum consilio omnia ageret: quos

Senatores nominauit propter senectutem. Tunc, cum vxores ipse & populus non haberent, inuitauit ad spectaculum ludorum vicinas Urbis nationes; atque earum virgines rapuit. Commotis bellis propter raptarum injuriam, Cæninenses vicit, Antemnates, Crustuminos, Sabinos, Fidenates, Veientes ( hæc omnia oppida Urbem cingunt: ) Et cum orta subito tempestate non comparuisset, anno regni trigésimo-septimo, ad deos transisse creditus, consecratus est. Deinde Romæ per quinos dies Senatores imperauerunt; & his regnantibus annus vnus completus est.

Postea Numa Pompilius rex creatus est: qui bellum nullum quidem gessit, sed non minus Civitati quam Romulus profuit; Nam & leges Romanis, moresque constituit; qui consuetudine præcliorum jam latrones ac semibarbari putabantur. Annum descripsit in X. menses, prius sine aliqua computatione confusum: & infinita Romæ sacra ac templa constituit. Morbo decessit quadragesimo-tertio imperij anno.

Huic successit Tullus Hostilius. Hic bella reparauit, Albanos vicit, qui ab vrbe Roma XII. milliario sunt: Veientes & Fidenates, quorum alij sexto milliario absunt ab vrbe Romana, alij octauo-decimo, bello superauit. Urbem ampliavit, adjecto Cœlio monte. Cum triginta duobus annis

regnasset, fulmine ictus, cum domo sua arsit.

Post hunc Ancus Marcius, Numæ ex filia nepos, suscepit imperium. Contra Latinos dimicavit: Aventinum montem Civitati adjecit, & Ianiculum: Ostiam civitem supra mare sexto-decimo milliario ab vrbe Roma condidit. vigesimo-quarto anno imperij morbo periit.

Deinde regnum Priscus Tarquinius accepit. Hic numerum Senatorum duplicavit; Circum Romæ ædificavit; ludos Romanos instituit, qui ad nostram memoriam permanent. Vicit idem etiam Sabinos; & non parum agrorum, sublatum iisdem, vr-bis Romæ territorio adjunxit; primusque triumphans Urbem intrauit: muros fecit, & cloacas: Capitolium inchoavit. tricesimo-octavo imperij anno per Anci filios occisus est, regis ejus cui ipse succellerat.

Post hunc Servius Tullius suscepit imperium, genitus ex nobili fœmina, captiva tamen, & ancilla. Hic quoque Sabinos subegit: montes tres, Quirinalem, Viminalem, Esquilinum, Vrbi adjunxit. fossas circum murum duxit. primus omnium censum ordinavit, qui adhuc per orbem terrarum incognitus erat. Sub eo Roma, omnibus in censum delatis, habuit capitum LXXXIV. millia civium Romanorum, cum his qui in agris erant. Occisus est XLV. im-



perij anno, scelere generi sui Tarquinij, filij ejus regis cui ipse successerat; & filia suæ, quam Tarquinius habebat vxorem.

Lucius Tarquinius Superbus, septimus atque vltimus regum, Volscos, ( quæ gens ad Campaniam euntibus non longe ab Vrbe est ) vicit, Gabios ciuitatem, & Suessam Pometiam subegit; cum Thuscis pacem fecit; & templum Ioui in Capitolio ædificauit. Postea Ardeam oppugnans, in octauo-decimo milliario ab Vrbe positam ciuitatem, imperium perdidit. Nam cum filius ejus & ipse Tarquinius junior nobilissimam fœminam Lucretiam, eandem pudicissimam Collatini vxorem, stuprasset, eaque de injuria marito & patri & amicis questita fuisset, in omnium conspectu se occidit. propter quam causam Brutus parens, & ipse Collatinus, populum concitauit, & Tarquinio ademit imperium. Mox exercitus quoque eum, qui ciuitatem Ardeam cum ipso rege oppugnabat, reliquit: veniensque ad Urbem rex, portis clausis exclusus est. Cumque imperasset annos viginti-quinque, cum vxore & liberis suis fugit.

Ita Romæ regnatum est per septem reges annis ducentis quadraginta tribus. cum adhuc Roma, vbi plurimum, vix vsque ad quintum-decimum milliarium possideret.

Hinc Consules cœpere pro vno rege duo



hac causa creari, ut, si vnus malus esse voluisset, alter eum, habens potestatem similem, coerceret. Et placuit, ne imperium longius quam annum vnum haberent: ne per diuturnitatem potestatis insolentiores redderentur, sed ciuiles semper essent, qui se post annum scirent futuros esse priuatos. Fuerunt igitur anno primo, expulsis regibus, Consules, Lucius Iunius Brutus, (qui maxime egerat ut Tarquinius pelleretur) & Tatquinius Collatinus, maritus Lucretiæ. sed Tatquinius Collatino statim sublata dignitas est. placuerat enim ne quisquam in Vrbe maneret, qui Tarquinius vocaretur. Ergo accepto omni patrimonio suo ex Vrbe migravit: & loco ipsius factus est Valerius Publicola Consul. Commouit tamen bellum vrbi Romanæ rex Tarquinius, qui fuerat expulsus: & collectis multis gentibus, ut in regnum posset restitui dimicauit. In prima pugna Brutus Consul & Aruns Tarquiniij filius inuicem se occiderunt. Romani tamen ex ea pugna victores recesserunt. Brutum Romanæ matronæ defensorem pudicitiae suæ, quasi communem patrem, per annum luserunt. Valerius Publicola Spurium Lucretium Tricipitinum collegam sibi fecit, Lucretiæ patrem: quo, morbo mortuo, iterum Horatium Pulvillum collegam sibi sumpsit. Ita primus annus quinque Consu-

les habuit : cum Tarquinius Collatinus Vrbe cessisset propter nomen, Brutus proelio periisset, Sp. Lucretius morbo mortuus esset. Secundo quoque anno iterum Tarquinius, vt reciperetur in regnum, bellum Romanis intulit, auxilium ei ferente Porfena Thuscix rege : & Romam pene cepit. Verum tum quoque victus est. Tertio anno post reges exactos, Tarquinius cum suscipi non posset in regnum, neque ei Porfena, qui pacem cum Romanis fecerat, auxilium præstaret, Tusculum se contulit, quæ ciuitas non longe ab Vrbe est : atque ibi per quatuordecim annos priuatus cum vxore persenuit. Quarto anno post reges exactos, cum Sabini Romanis bellum intulissent, victi sunt : & de his est triumphatum. Quinto anno Lucius Valerius ille Bruti collega, & quartum Consul, fataliter mortuus est, adeo pauper vt collatis à populo nummis, sumptum habuerit sepulturæ. quem matronæ, sicut Brutum, annum luxerunt.

Nono anno post reges exactos, cum gener Tarquinij, ad injuriam soceri vindicandam, ingentem collegisset exercitum, noua Romæ dignitas est creata, quæ Dictatura appellatur, maior quam Consulatus. Eodem anno etiam Magister Equitum factus est, qui Dictatori obsequeretur. neque quidquam similis potest dici, quam Dicta.

tura antiqua, huic imperij potestati, quam nunc Tranquillitas vestra habet; maximo cum Augustus quoque Octavianus, de quo postea dicemus, & ante eum, Cajus Cæsar, sub Dictaturæ nomine atque honore regnauerint. Dictator autem Romæ primus fuit Largius: Magister Equitum primus, Spurius Cassius.

Sexto-decimo anno post reges exactos, seditionem populus Romæ fecit, tanquam à Senatu atque Consulibus premeretur. Tum & ipse sibi Tribunos Plebis, quasi proprios iudices & defensores, creauit, per quos contra Senatum & Consules tutus esse posset.

Sequenti anno Volsci contra Romanos bellum reparauerunt: & victi acie, etiam Coriolos ciuitatem, quam habebant optimam, perdiderunt.

Octauo-decimo anno postquam reges eiec-  
ti erant, expulsus ex Vrbe Quintius Mar-  
cius dux Romanorum, qui Coriolos cepe-  
rat Volscorum ciuitatem, ad ipsos Volscos  
contendit iratus, & auxilia contra Roma-  
nos accepit. Romanos sæpe vicit: vique ad  
quintum milliarium Urbis accessit, oppu-  
gnaturus etiam patriam suam, legatis qui  
pacem petebant repudiatis, nisi ad eum ma-  
ter Veturia & vxor Volunnia, ex Vrbe ve-  
nissent: quarum fletu & deprecatione su-  
peratus remouit exercitum: Atque hic se-



cundus post Tarquinium fuit, qui dux contra patriam suam esset.

Casone Fabio & Tito Virginio Consulibus trecenti nobiles homines, qui ex Fabia familia erant, contra Vesentes bellum soli susceperunt, promittentes Senatui & populo per se omne certamen implendum. Itaque profecti omnes nobiles, & qui singuli magnorum exercituum duces esse deberent, in prælio conciderunt. Vnus omnino superfuit ex tanta familia; qui propter ætatem puerilem duci non potuerat ad pugnam. Post hæc census in Vrbe habitus est, & inuenta sunt ciuium capitum cxxix. millia.

Sequenti anno cum in Algido monte, ab Vrbe duodecimo ferme milliario, Romanus obsideretur exercitus, Lucius Quintius Cincinnatus Dictator est factus: qui agrum quatuor iugerum possidens, manibus suis colebat. Is, cum in opere & arans esset inventus, sudore deterso, togam prætextam accepit: & cæsis hostibus, liberauit exercitum.

Anno ccc. & altero ab Vrbe condita, imperium consulare cessauit; & pro duobus Consulibus decem facti sunt qui summam potestatem haberent, Decemviri nominati. Sed cum primo anno bene egissent, secundo vnus ex ijs Appius Claudius, Virginij cuiusdam, qui honestis jam stipendijs



contra Latinos in monte Algidio militabat, filiam virginem corrumpere voluit: quam pater occidit, ne stuprum à Decemviro sustineret: & regressus ad milites, mouit tumultum. Sublata est Decemviris potestas, ipsique damnati sunt.

Anno trecentesimo-decimo-quinto ab Urbe condita, Fidenates contra Romanos rebellauerunt. Auxilium præstabant his Veientes, & rex Veientium Tolumnius: quæ ambæ ciuitates tam vicinæ Urbi sunt, vt Fidenæ, vii; Veientes xviii. milliario absint. Coniunxerunt se his & Volsci. sed M. Æmilio Dictatore, & Lucio Quintio Cincinnato Magistro Equitum victi etiam regem perdidērunt: Fidenæ captæ, & excisæ. Post xx. inde annos, Veientani rebellauerunt. Dictator contra ipsos missus est Furius Camillus: qui primum eos vicit acie; mox etiam ciuitatem diu obsidens cepit, antiquissimam, Italiæque ditissimam. Post eam cepit & Faliscos, non minus nobilem ciuitatem. Sed commota est ei inuidia, quasi prædam male diuisisset; damnatusque ob eam causam, & expulsus Ciuitate est. Statim Galli Senones ad Urbem venerunt; & victos Romanos xi. milliario ab vrbe Roma, apud flumen Alliam sequuti, etiam Urbem occupauerunt; neque defendi quidquam nisi Capitolium potuit. quod cum diu obsedissent,

& iam Romani fame laborarent, à Camillo, qui in vicina ciuitate exsulabat, Gallis superuentum est, grauissimeque victi sunt; postea tamen, accepto etiam auro, ne Capitolium obsiderent, recesserunt: sed sequutus eos Camillus, ita cecidit, vt & aurum, quod his datum fuerat, & omnia quæ ceperant militaria signa, reuocaret. Ita tertium triumphans Urbem ingressus est, & appellatus Secundus Romulus, quasi & ipse patriæ conditor.

---

# EVTROPII

## LIBER II.

**A**NNO CCCLXV. ab Vrbe condita, post captam autem primo, dignitates mutatae sunt: & pro duobus Consulibus facti Tribuni Militares-consulari-potestate. Hinc iam coepit Romana res crescere. Nam Camillus eo anno Volscorum ciuitatem, quæ per lxx. annos bellum gesserat, vicit, & Æquorum urbem, & Sutrinorum: atque omnes, deletis eorum exercitibus, occupauit; & tres simul triumphos egit.

Titus etiam Quintius Cincinnatus Prænestinos, qui vsque ad vrbis Romæ portas

bello venerant, persequutus, ad flumen Alliam vicit: & ciuitates, quæ sub ipsis agebant, Romanis adiunxit; ipsum Præneste aggressus, in deditionem accepit: quæ omnia ab eo gesta sunt viginti diebus, triumphusque ipsi decretus.

Verum dignitas Tribunorum Militarium non diu perseverauit. Nam post aliquantum nullos placuit fieri: & quadriennium ita in Vrbe fluxit, vt potestates ibi maiores non essent. Resumpserunt tamen Tribuni Militares consulari potestate iterum dignitatem, & triennio perseverauerunt. Rursus Consules facti.

Lucio Genucio & Quinto Seruilio Consulibus mortuus est Camillus: honor ei secundus post Romulum delatus est.

Titus Quintius Dictator aduersus Gallos, qui in Italiam venerant, missus est. Hi ab Vrbe quarto milliario trans Anienem fluvium confederant. Nobilissimus de Senatoribus Titus Manlius prouocantem Gallum ad singulare certamen, congressus occidit: & sublato torque aureo, colloque suo imposito, in perpetuum Torquati sibi & posteris cognomen accepit. Galli fugati sunt: mox per Caium Sulpicium Dictatorem etiam victi. Non multo post à Caio Marcio Thusci victi sunt; vii. millia captiuorum ex his in triumphum ducti.

Census iterum habitus est; Et cum La-



tini, qui à Romanis iubaſti erant, milites præſtare nollent, ex Romanis tantum tiro-  
nes lecti ſunt, factæque legiones decem;  
qui modus ſexaginta vel amplius armato-  
rum millia efficiebat, paruis adhuc Roma-  
nis rebus tanta tamen in re militari vir-  
tus erat. Quæ cum profectæ eſſent aduer-  
ſus Gallos duce Lucio Furio Camillo, qui-  
dam ex Gallis vnum è Romanis, qui eſ-  
ſet optimus, prouocauit. tum ſe Mar-  
cus Valerius Tribunus Militum obtulit: &  
cum proceſſiſſet armatus, corvus ei ſupra  
dextrum brachium ſedit, mox commiſſa ad-  
verſus Gallum pugna, idem corvus alis &  
vnguibus Galli oculos verberauit, ne re-  
ctum poſſet aſpicere: ita vt à Tribuno Va-  
lerio interfectus, non ſolum victoriam ei,  
ſed etiam nomen dederit. nam poſtea idem,  
Corvinus eſt dictus. ac propter hoc meri-  
tum, annorum trium & viginti, Conſul  
eſt factus.

Latini, qui noluerant milites dare, hoc  
quoque à Romanis exigere cœperunt, vt  
vnus Conſul, ex eorum, alter ex Roma-  
norum populo crearetur: Quod cum eſſet  
negatum, bellum contra eos ſuſceptum eſt.  
& ingenti pugna ſuperati ſunt: ac de his  
perdomitis triumphatum eſt. Statuæ Con-  
ſulibus ob meritum victoriæ in Roſtris po-  
ſitæ ſunt.

Iam Romani potentes eſſe cœperant. bel-

Iam enim in centesimo & tricesimo fere  
milliario ab Vrbe apud Samnites gereba-  
tur, qui medij sunt inter Picenum, Cam-  
paniam, & Apuliam. L. Papirius Cursor  
cum honore Dictatoris ad id bellum profes-  
tus est, qui, cum Romam rediisset, Q. Fa-  
bio Maximo, Magistro Equitum, quem apud  
exercitum reliquit, præcepit, ne se absente  
pugnaret. Ille occasione reperta, felicissi-  
me dimicauit, & Samnites deleuit. ob quam  
rem à Dictatore capitis damnatus, quod se  
vetante pugnasset, ingenti fauore militum  
& populi liberatus est: tanta Papirio sedi-  
tione commota, vt pene ipse interficeretur.  
Postea Samnites, Romanos, Tito Veturio  
& Spurio Posthumio Consulibus, ingenti  
dedecore vicerunt, & sub iugum miserunt.  
Pax tamen à Senatu & populo soluta est,  
quæ cum ipsis propter necessitatem facta  
fuerat. Postea Samnites victi sunt à L. Pa-  
pirio Consule: septem millia eorum sub iu-  
gum missa. Papirius de Samnitibus trium-  
phauit. Eo tempore Appius Claudius Cen-  
sor aquam Claudiam induxit, & viam Ap-  
pianam strauit. Samnites reparato bello, Q.  
Fabium Maximum vicerunt, tribus milli-  
bus hominum occisis. Postea cum pater ei  
Fabius Maximus legatus datus fuisset, &  
Samnites vicit, & plurima eorum oppida  
cepit. Deinde P. Cornelius Rufinus, Ma-  
nius Curius Dentatus, ambo Consules con-

tra Samnites missi, ingentibus præliis eos confecere. Tum bellum cum Samnitibus per annos nouem & xl. actum sustulerunt. neque ullus hostis fuit intra Italiam, qui Romanam virtutem magis fatigauerit.

Interiectis aliquot annis, iterum se Gal-  
lorum copiarum contra Romanos Tusceis Sam-  
nitibusque iunxerunt: sed cum Romam  
tenderent, à Cn. Cornelio Dolabella Con-  
sule deletæ sunt.

Eodem tempore Tarentinis, qui iam in  
ultima Italia sunt, bellum indictum est;  
quia legatis Romanorum iniuriam fecis-  
sent. Hi Pyrrhum Epiri regem contra Ro-  
manos in auxilium poposcerunt; qui ex  
genere Achillis originem trahebat. is mox  
ad Italiam venit; Tumque primum Roma-  
ni cum transmarino hoste dimicauerunt.  
Missus est contra eum Consul P. Valerius  
Læuinus: qui cum exploratores Pyrrhi ce-  
pisset; iussit eos per castra duci, ostendique  
omnem exercitum, tumque dimitti, vt re-  
nuntiatent Pyrrho, quæcumque à Romanis  
agerentur. Commissa mox pugna, cum iam  
Pyrrhus fugeret, elephantorum auxilio vi-  
cit: quos incognitos Romani expauerunt.  
sed nox prælio finem dedit. Læuinus ta-  
men per noctem fugit, Pyrrhus Romanos  
mille octingentos cepit, eosque summo ho-  
nore tractauit; occisos sepeliuit: quos cum  
aduerso vulnere & truci vultu, etiam mor-  
tuos;



tuos; iacere vidisset, tulisse ad cœlum manus dicitur, cum hac voce; Sé totius orbis dominum esse potuisse, si tales sibi milites contigissent.

Postea Pyrrhus iunctis sibi Samnitibus, Lucanis, Brutiisque Romam perrexit, omnia ferro igneque vastauit. Campaniam depopulatus est; atque ad Prænestem venit, milliario ab Urbe octauo-decimo. Mox terrore exercitus, qui cum Consule sequebatur, in Campaniam se recepit. Legati ad Pyrrhum de redimendis captiuis missi, ab eo honorifice suscepti sunt. captiuos sine pretio Romam misit. Vnum ex legatis Romanorum Fabricium sic admiratus est, vt cum eum pauperem esse cognouisset, quarta parte regni promissa, sollicitare voluerit, vt ad se transfirer: contemptusque à Fabricio est. Quare cum Pyrrhus ingenti Romanorum admiratione teneretur, legatum misit, qui pacem æquis conditionibus peteret, præcipuum virum Cineam nomine; ita vt Pyrrhus partem Italiæ, quam iam armis occupauerat, obtineret. Pax displicuit; remandatūque Pyrrho à Senatu est, cum cum Romanis, nisi ex Italia recessisset, pacem habere non posse. Tum Romani iusserunt captiuos omnes, quos Pyrrhus reddiderat, infames haberi, qui se armis defendere potuissent; nec ante eos ad veterem statum reuerti,

quam sibi notorum hostium occisorum spolia retulissent. Ita legatus Pyrrhi reuersus est. à quo cum quæreretur Pyrrhus, qualem Romam comperisset, Cineas dixit, regum se patriam vidisse: scilicet tales illuc fore omnes, qualis vnus Pyrrhus apud Epirum & reliquam Græciam putaretur. Missi sunt contra Pyrrhum duces P. Sulpicius, & Decius Mus Consules. Certamine commisso, Pyrrhus vulneratus est, elephanti interfecti, xx. millia cæsa hostium; & ex Romanis tantum quinque millia. Pyrrhus Tarentum fugatus. Interjecto anno, contra Pyrrhum Fabricius est missus; qui prius inter legatos sollicitati non potuerat, quarta parte regni promissa. Tum, cum vicina castra ipse & rex haberent, medicus Pyrrhi ad eum nocte venit, promittens veneno Pyrrhum occisurum, si sibi aliquid polliceretur; quem Fabricius vinctum reduci iussit ad dominum; Pyrrheque dici, quæ contra caput eius medicus spondidisset. Tunc rex admirans eum dixisse fertur, Ille est Fabricius, qui difficilior ab honestate quam sol à cursu suo auerti potest. Tum rex in Siciliam profectus est. Fabricius, victis Samnitibus & Lucanis, triumphauit. Consules deinde Manius Curius Dentatus, & Cornelius Lentulus, aduersum Pyrrhum missi sunt. & Curius contra eum pugnavit; exercitum eius cecidit; ipsum Tarentum fugauit, castra

cepit Ea die cæla sunt hostium xxiii. millia. Curius Dentatus in Consulatu triumphauit. Primus Romam elephantos quatuor duxit. Pyrrhus etiam à Tarento mox recessit, & apud Argos Græciæ ciuitatem occisus est.

Caio Fabricio Luscinio, C. Claudio Cinna, Consulibus, anno Urbis conditæ cccclxi. legati Alexandrini à Ptolemæo missi Romam uenêre; & à Romanis amicitiam, quam petierant, obtinuerunt.

Quintio Gulone, C. Fabio Pictore Consulibus, Picentes bellum commouere; & ab insequentibus Consulibus Publ. Sempronio, Appio Claudio uicti sunt: & de his triumphatum est. Conditæ à Romanis ciuitates, Ariminum in Gallia, & Beneuentum in Samnio.

Marco Attilio Regulo, Lucio Iunio Libone Consulibus, Salentinis in Apulia bellum indictum est: captique sunt cum ciuitate simul Brundusini, & de his iterum triumphatum est.

An. cccclxxvii. cum iam clarum urbis Romæ nomen esset, arma tamen extra Italiam mota non fuerant. Vt igitur cognosceretur, quæ copiæ Romanorum essent, census est habitus: inuenta sunt ciuium capitū cccxii. millia, cccxxxiv. quanquam à condita Urbe nunquam bella cessantes. Et contra Afros bellum susceptum est pri-



mum , Appio Claudio , Quinto Fulvio Consulibus. In Sicilia contra eos pugnatum est ; & Appius Claudius de Afris & rege Siciliae Hierone triumphauit.

Insequenti anno , Valerio Marco & Octacilio Consulibus in Sicilia à Romanis res magnæ gestæ sunt. Taurominitani, Catanenses , & præterea quinquaginta ciuitates , in fidem acceptæ sunt. Tertio anno in Sicilia contra Hieronem regem Siculorum bellum paratum est. Is cum omni nobilitate Syracusanorum pacem à Romanis impetrauit deditone argenti talenta ducenta, Afri in Sicilia victi sunt , & de his secundo Romæ triumphatum est.

Quinto anno belli Punici , quod contra Afros gerebatur , primum Romani Caio Duillio & Cnæo Cornelio Asina Consulibus, in mari dimicauerunt ; paratis nauibus rostratis , quas Liburnas vocant. Consul Cornelius fraude deceptus est. Duillius, commisso prælio, Carthaginensium ducem vicit , xxxi. nauēs cepit , quatuor-decim meruit , septem millia hostium cepit , tria millia occidit : neque vlla victoria Romanis gratior fuit. quod inuicti terra , iam etiam mari plurimum possent. Caio Aquilio Floro, Lucio Scipione Consulibus, Scipio Corsicam & Sardiniam vicit : multa millia inde captiuorum abduxit , & triumphauit.

L. Manlio Volsone, M. Attilio Regulo  
Consulibus, bellum in Africam translatum  
est: contra Hamilcarem Carthagenensium  
ducem in mari pugnatum, victusque est.  
nam perditis LXIV. nauibus, retro se recepit:  
Romani XXII. amiserunt, sed cum in Afri-  
cam transissent, primam Clypeam Africae  
ciuitatem in deditiōem acceperunt. Con-  
sules usque ad Carthaginem processerunt;  
multisque vastatis oppidis, Manlius victor  
Romam rediit, & XXV. I. millia captiuo-  
rum reduxit. Attilius Regulus in Africa  
remanfit. Is contra Afros aciem instruxit,  
contra tres Carthagenensium duces dimi-  
cans, victor fuit: XVIII. millia hostium  
cecidit, quinque millia cum VIII. elephan-  
tis cepit: septuaginta-tres ciuitates in fidem  
accepit. Tum victi Carthagenenses, pacem  
à Romanis petierunt, quam cum Regulus  
nollet nisi durissimis conditionibus dare,  
Afri auxilium à Lacedaemoniis petierunt:  
& duce Xanthippo, qui à Lacedaemoniis  
missus fuerat, Romanorum dux Regulus  
victus est vltima perniciē. nam duo millia  
hominum tantum ex omni Romano exer-  
citu remanserunt, quindecim millia cum  
Imperatore Regulo capta sunt, xxx. millia  
occisa; Regulus ipse in catenas coniectus.

Marco Æmilio Paulo, Seruio Fulvio  
Nobiliore Consulibus, ambo Romani Con-  
sules ad Africam profecti sunt, cum trecentis

tarum nauium classe; primum Afros nauali certamine superant. Æmilius Consul centum & quatuor naues hostium demersit, triginta cum pugnatoribus cepit; quindecim millia hostium aut occidit, aut cepit; militem suum ingenti præda ditauit. Et subacta Africa tum fuisset, nisi quod tanta fames erat, ut diutius expectare exercitus non posset. Consules cum victrice classe redeuntes, circa Siciliam naufragium passi sunt: & tanta tempestas fuit, ut ex quadringentis sexaginta-quatuor nauibus, octoginta seruari vix potuerint. Neque vlllo tempore tanta maritima tempestas audita est. Romani tamen statim ducentas naues reparauerunt, neque in aliquo animus his infractus fuit.

Cnæus Seruilius Cæpio, & C. Sempromnius Blæsus Consules cum ducentis sexaginta nauibus ad Africam profecti sunt: aliquot ciuitates ceperunt: prædam ingentem reducentes, naufragium passi sunt. Itaque cum continuæ calamitates Romanis displicerent, decreuit Senatus, ut à maritimis præliis recederetur, & tantum sexaginta naues ad præsidium Italiæ saluæ essent.

Lucio Cæcilio Metello, Caio Furio Pacilo Consulibus, Metellus in Sicilia Afro- rum ducem cum xxx. elephantis, & magnis copiis venientem superauit, xx millia hostium cecidit, sex & xx. elephantos cepit,



reliquos errantes per Numidas, quos in auxilium habebat, collegit, & Romam deduxit ingenti pompa; cum cxxx. elephantorum numerus omnia itinera compleret. Post hæc mala Carthaginenses Regulum ducem, quem ceperant, petierunt, ut Romam proficisceretur, & pacem à Romanis obtineret, ac permutationem captiuorum faceret. Ille Romam cum venisset, inductus in Senatum, nihil quasi Romanus egit; dixitque se ex illa die qua in potestatem Afrorum venisset, Romanum esse desisse. itaque & uxorem à complexu remouit, & Romanis suasit, ne pax cum Pœnis fieret. Illos enim, fractos tot casibus, spem nullam habere; se tanti non esse, ut tot millia captiuorum propter vnum se & senem, & paucos qui ex Romanis capti fuerant, redderentur. Itaque obtinuit. nam Afros pacem petentes nullus admisit. ipse Carthaginem rediit; offerentibusque Romanis, ut cum Romæ tenerent, negauit. se in ea vrbe mansurum, in qua, postquam Afris seruierat, dignitatem honesti ciuis habere non posset. Regressus igitur ad Africam, omnibus suppliciis extinctus est. P. Claudio Pulchro, C. Iunio Consulibus, Claudius contra auspicia pugnavit, & à Carthaginensibus victus est. Nam ex ducentis & viginti nauibus, cum triginta fugit; xc. cum pugnatoribus captæ sunt, de-

mersæ cæteræ , viginti millia capta. Alius quoque Consul classem naufragio amisit, exercitum tamen saluum habuit; quia vicina litora erant.

Caio Luctatio Catulo, Aulo Posthumio Albino Consulibus, anno belli Punici xxiii. Catulo bellum contra Afros commissum est. Profectus est cum ccc. nauibus in Siciliam. A tri contra ipsum cccc. parauerunt. Luctatius Catulus nauem æger ascendit: vulneratus enim in pugna superiore fuerat. Contra Lilybæum ciuitatem Siciliæ pugnatum est ingenti virtute Romanorum. nam Lxxiii. Carthagenensium naues captæ sunt, cxxv. demersæ; xxxii. millia hostium capta, xiiii. occisa: infinitum auri argentique pondus in potestatem Romanorum redactum. Ex classe Romana duodecim naues demersæ. pugnatum est vi. Idus Martias. statim Carthagenenses pacem petierunt: tributaque iis pax: captiui Romanorum, qui tenebantur à Carthagenensibus, redditi sunt. Etiam Carthagenenses petierunt, vt redimi eos captiuos liceret quos ex Afris Romani tenebant. Senatus iussit sine pretio dari eos qui in publica custodia essent: qui autem à priuatis tenebantur, vt, pretio dominis reddito, Carthaginem redirent; atque id pretium ex fisco magis quam à Carthagenensibus solueretur.

Quintus Luctatius, Aulus Manlius, Con-

sules creati bellum Faliscis intulerunt : quæ ciuitas Italiæ opulenta quondam fuit : quod ambo Contules intra sex dies quam venerant , transegerunt , xv. millibus hostium cæsis , cæteris pace concessa ; agro tamen ex medietate sublato.

---

## EVTROPII

## LIBER III.

**F**INITO igitur Punico bello, quod per XXII. annos contractum est , Romani iam clarissima gloria noti , legatos ad Ptolemæum Ægypti regem miserunt ; auxilia promittentes : quia rex Syriæ Antiochus ei bellum intulerat. Ille gratias Romanis egit , auxilia non accepit : iam enim fuerat pugna transacta. Eodem tempore potentissimus rex Siciliæ Hiero Romam venit ad ludos spectandos ; & ducenta millia modiorum tritici populo dono dedit.

Lucio Cornelio Lentulo , Fulvio Flacco Consulibus, quibus Hiero Romam venerat , etiam contra Ligures intra Italiam bellum gestum est , & de his triumphatum. Carthaginenses tum bella reparare tentabant , Sardinenses , qui ex conditione pa-



cis Romanis parère debebant , ad rebel-  
landum impellentes. Venit tamen legatio  
Carthaginensium Romam , & pacem im-  
petrauit.

Tito Manlio Torquato , Cajo Attilio  
Balbo Consulib. de Sardis triumphatum est:  
& pace omnibus locis facta , Romani nul-  
lum bellum habuerunt, quod bis post Ro-  
mam conditam semel tantum Numa Pom-  
pilio regnante contigerat.

Lucius Posthumius Albinus , Cnæus Ful-  
vius Centumalus Consules bellum contra  
Illyrios gesserunt : & multis ciuitatibus ca-  
ptis , etiam reges in deditionem accepe-  
runt ; tum primum de Illyrijs triumphatum  
est.

Lucio Æmilio Consule ingentes Gallo-  
rum copix Alpes trasierunt : sed pro Ro-  
manis tota Italia consensit ; traditumque  
est Fabio historico , qui ei bello interfuit ,  
decem. millia hominum parata ad id bel-  
lum fuisse : sed res per Consules tantum pro-  
spere gesta est. xl. millia hostium interfe-  
cta sunt , & triumphus Æmilio decretus.

Aliquot deinde annis post , contra Gal-  
los intra Italiam pugnatum est : finitumque  
est bellum Marco Claudio Marcello, Cnæo  
Cornelio Scipione Consulibus. Tunc Mar-  
cellus cum parua manu equitum dimicauit,  
& regem Gallorum , Viridomarum nomi-  
ne , manu sua occidit. Postea cum collega

suo ingentes copias Gallorum peremit; Mediolanum expugnauit; grandem prælam Romam pertulit: ac triumphans Marcellus spolia Galli stipiti imposita humeris suis vexit.

M. Minucio, P. Cornelio Coss. Istris bellum illatum est, quia latrocinati naues Romanorum fuerant, quæ frumenta exhibebant: perdomitique sunt omnes. Eodem anno bellum Punicum secundum Romanis illatum est per Annibalem Carthaginensium ducem: qui Saguntum Hispaniæ ciuitatem, Romanis amicam, oppugnare aggressus est, agens vicesimum ætatis annum; copiis congregatis cl. millibus peditum, & xx. millibus equitum. Huic Romani per legatos denuntiauerunt, vt bello abstineret. Is legatos admittere noluit. Romani etiam Carthaginem miserunt, vt mandaretur Annibali, ne bellum contra socios populi Romani gereret. sed dura responsa à Carthaginensibus reddita. Saguntini interea fame victi sunt; captique ab Annibale, vltimis pœnis afficiuntur. Tum Publius Cornelius Scipio cum exercitu in Hispaniam profectus est, Tiberius Sempronius in Siciliam: bellum Carthaginensibus indictum est. Annibal relictò in Hispania fratre Asdrubale, Pyrenæum transijt: Alpes, adhuc in ea parte inuias, sibi patefecit. Traditur ad Italiam lxxx. millia peditum,

& xx. millia equitum , septem & triginta elephantes adduxisse. Interea multi Ligures & Galli Annibali se iunxerunt. Sempronius Gracchus , cognito ad Italiam Annibalis aduentu , è Sicilia exercitum Ariminum traiecit. Publius Cornelius Scipio Annibali primus occurrit : commisso prælio , fugatis suis , ipse vulneratus in castra rediit. Sempronius Gracchus & ipse confixit apud Trebiam amnem. is quoque vincitur. Annibali multi se in Italia dederunt. Inde ad Tusciam veniens Annibal , Flaminio Consuli occurrit : ipsum Flamininum interemit : Romanorum viginti quinque millia cæsa sunt : cæteri diffugerunt. Missus aduersus Annibalem postea à Romanis Quintus Fabius Maximus. Is eum , differendo pugnam , ab impetu fregit : mox inuenta occasione vicit.

Quingentesimo & quadagesimo anno à condita Vrbe , Lucius Æmilius , P. Terentius Varro , contra Annibalem mittuntur , Fabioque succedunt : qui Fabius ambos Consules monuit , vt Annibalem callidum & impatientem ducem non aliter vincerent , quam prælium differendo ; verum cum impatientia Varronis Cons. contradicente Consule altero , apud vicum qui Cannæ appellatur , in Apulia pugnatum esset , ambo Consules ab Annibale vincuntur. In ea pugna tria millia Afrorum pereunt ; ma-



gnā pars de exercitu Annibalis sauciatur : nullo tamen Punico bello Romani grauius accepti sunt; periit enim in eo Æmilius Paulus Consul : Consulares & Prætorij , xx. Senatores capti aut occisi xxx. nobiliores viri ccc. militum xl. millia; equitum tria millia & quingenti, in quibus malis nemo tamen Romanorum, pacis mentionem habere dignatus est. Serui, quod nunquam ante, manumissi, & milites facti sunt. Post eam pugnam multæ Italiæ ciuitates, quæ Romanis paruerant, se ad Annibalem transtulerunt. Annibal Romanis obtulit, ut captiuos redimerent : responsumque est à Senatu, eos ciues non esse necessarios, qui, cum armati essent, capi potuissent. Ille omnes postea varijs supplicijs interfecit, & tres modios aureorum annulorum Carthaginem misit; quos è manibus equitum Romanorum, Senatorum, & militum, detraxerat. Interea in Hispania, vbi frater Annibalis Asdrubal remanserat cum magno exercitu, ut eam totam Afris subigeret, à duobus Scipionibus Romanis ducibus vincitur; perditque in pugna xxxv. millia hominum. ex his capiuntur x. millia, occiduntur xxv. Mittuntur ei à Carthaginensibus ad reparandas vires xli. millia pedum, iv. millia equitum, xx. elephantum.

Anno quarto postquam in Italiam Annibal venit, Marcus Claudius Marcellus Con-

ful apud Nolam, ciuitatem Campaniæ, contra Annibalem bene pugnavit. Annibal multas ciuitates Romanorum per Apuliam, Calabriam, & Brutios occupauit: quo tempore etiam rex Macedoniæ Philippus ad eum legatos misit; promittens auxilia contra Romanos, sub hac conditione, vt deletis Romanis, ipse quoque contra Græcos ab Annibale auxilia acciperet. Captis igitur legatis Philippi, & re cognita, Romani in Macedoniam Marcum Valerium Læuinum ire iusserunt; in Sardiniam Titum Manlium Torquatum Proconsulem: nam etiam ea sollicitata ab Annibale, Romanos deseruerat. Ita vno tempore quatuor locis pugnabatur; in Italia, contra Annibalem; in Hispania, contra fratrem eius Asdrubalem; in Macedonia, contra Philippum; in Sardinia, contra Sardos, & alterum Asdrubalem Carthaginensem. Is à Tito Manlio Proconsule, qui ad Sardiniam missus fuerat, vivus est captus; occisa cum eo xii. millia, capti mille-quin-genti; & à Romanis Sardinia subacta. Manlius victor captivos & Asdrubalem Romam reportauit. Interea etiam Philippus à Læuino in Macedonia vincitur, & in Hispania à Scipionibus Asdrubal, & Mago tertius frater Annibalis.

Decimo anno postquam Annibal in Italiam venerat. P. Sulpicio, Cnæo Fulvio

Consulib. Annibal vsque ad quartum miliarium Urbis accessit, equites eius vsque ad portas, mox Consulum metu, cum exercitu venientium, Annibal ad Campaniam se recepit. In Hispania à fratre Asdrubale ambo Scipiones, qui per multos annos victores fuerant, interficiuntur: exercitus tamen integer remansit: casu enim magis quam virtute erant decepti, quo tempore etiam à Consule Marcello Sicilia magna pars capta est, quam tenere Afri cœperant: & ex nobilissimæ urbe Syracusana præda ingens Romam perlata est. Lævinus in Macedonia cum Philippo & multis Græciæ populis, & rege Asiæ Attalo, amicitiam fecit: & ad Siciliam profectus, Annonem quendam Afrorum ducem apud Agrigentum ciuitatem cum ipso oppido cepit, eumque Romam cum captiuis nobilibus misit; XL. ciuitates in deditionem accepit, XXVI. expugnauit. Ita omni Sicilia recepta, Macedonia fracta, cum ingenti gloria Romam regressus est. Annibal in Italia Cnæum Fuluium Consulem subito aggressus, cum octo millibus hominum interfecit. Interea ad Hispanias, vbi occisis duobus Scipionibus nullus Romanus dux erat, Publius Cornelius Scipio mittitur, filius Publij Scipionis, qui ibidem bellum gesserat, annos natus quatuor & XX. vir Romanorum omnium & sua ætate, & posteriori tempo-



re fere primus. Is Carthaginem Hispaniæ capit; in qua omne aurum & argentum, & belli apparatus Afri habebant: nobilissimos quoque obsides, quos ab Hispanis acceperat: Magonem etiam fratrem Annibalis ibidem capit; quem Romam cum alijs mittit. Romæ ingens lætitia post hunc nuntium fuit. Scipio Hispanorum obsides parentibus reddidit. Qua re omnes fere Hispani ad eum vno animo transierunt. Post quæ Asdrubalem Annibalis fratrem victum fugat, & prædam maximam capit.

Interea in Italia Consul Q. Fabius Maximus Tarentum recepit; in qua ingentes copiæ Annibalis erant: & ibi etiam ducem Annibalis Carthalonem occidit, xxv. milia captiuorum vendidit: prædam militibus dispartivit, pecuniam hominum venditorum ad fiscum retulit. Tum multæ ciuitates Romanorum, quæ ad Annibalem transierant prius, rursus se Fabio Maximo reddiderunt. Insequenti anno Scipio in Hispania egregias res egit, & per se, & per fratrem suum Lucium Scipionem: lxx. ciuitates recepit. In Italia tamen male pugnatum est. Nam Claudius Marcellus Consul ab Annibale occisus est.

Tertio anno postquam Scipio ad Hispaniam profectus fuerat, rursus res inclytas gerit: regem Hispaniarum magno prælio victum,

vicium, in amicitiam accepit, & primus omnium à victo obsides non poposcit.

Desperans Annibal Hispanias contra Scipionem diutius posse retineri, fratrem suum Asdrubalem ad Italiam cum omnibus copiis euocauit. Is veniens eodem itinere quo etiam Annibal venerat, à Consulibus Appio Claudio Nerone, & Marco Livio Salinatore, apud Senam Piceni ciuitatem, in insidias compositas incidit: strenue tamen pugnans occisus est: ingentes eius copiarum captarum aut interfectarum sunt, magnum pondus auri atque argenti Romam relatum. Post hæc Annibal diffidere iam de belli cœpit euentu, & Romanis ingens animus accessit. Itaque & ipsi euocauerunt ex Hispania Publium Cornelium Scipionem. Is Romam cum ingenti gloria venit.

Quinto Cæcilio, Lucio Valerio Consulibus omnes ciuitates quæ in Brutiis ab Annibale tenebantur, Romanis se tradiderunt.

Anno xiv. postquam in Italiam Annibal venerat, Scipio, qui multa bene in Hispania egerat, Consul est factus, & in Africam missus: cui viro diuinum quiddam inesse existimabatur: adeo vt putaretur etiam cum Numinibus habere sermonem. Is in Africa contra Annonem ducem Afrorum pugnat, exercitum eius interfecit. Secundo prælio castra cepit, cum quatuor millibus

& quingentis militibus : xi. millibus occisus. Syphacem Numidiæ regem , qui se Afris coniunxerat , capit , & castra eius inuadit. Syphax cum nobilissimis Numidis , & infinitis spoliis , ab Scipione Romam mitritur ; qua re audita , omnis fere Italia Annibalem deserit ; ipse à Carthaginensibus in Africam redire iubetur , quam Scipio vastabat.

Ita anno xvi. ab Annibale Italia liberata est : ( quam flens dicitur reliquisse. ) Legati Carthaginensium pacem à Scipione petierunt : ab eo ad Senatum Romam missi sunt : xlv. dies his induciæ datæ sunt , quousque Romam ire & regredi possent : xxx. millia pondo argenti ab his accepta sunt. Senatus ex arbitrio Scipionis pacem iussit cum Carthaginensibus fieri. Scipio his conditionibus dedit , ne amplius quam xxx. naues haberent , quingenta millia pondo argenti darent , captiuos & perfugas redderent.

Interim Annibale veniente ad Africam , pax turbata est , multa hostilia ab Afris facta sunt ; legati tamen eorum ex Urbe venientes , à Romanis capti sunt , & iubente Scipione dimissi. Annibal quoque frequentibus præliis victus à Scipione , petijt etiam ipse pacem. Cum venum esset ad colloquium , iisdem conditionibus data est , quibus prius addita quingentis millibus pondo argenti , & millia librarum propter no-



uam perfidiam. Carthagenensibus conditiones displicuerunt, iusseruntque Annibalem pugnare. Infertur à Scipione, & Masinissa, alio rege Numidarum, qui amicitiam cum Scipione fecerat, Carthagini bellum. Annibal tres exploratores ad Scipionis castra misit: quos captos Scipio circumduci per castra iussit, ostendique eis totum exercitum; mox etiam prandium dari, dimittique, ut renuntiarent Annibali quæ apud Romanos vidissent. Interea prælium ab utroque duce instructum est, quale vix vlla memoria fuit: quum peritissimi viri copias suas ad bellum educerent. Scipio victor recedit, pæne ipso Annibale capto: qui primum cum multis equitibus, deinde cum xx. postremo cum quatuor euasit. Inuenta in castris Annibalis argenti pondo xx. millia, auri octingenta, cætera supellectili copiosa. Post id certamen pax cum Carthagenensibus facta est. Scipio Romam rediit, & ingenti gloria triumphauit, atque Africanus ex eo appellari cœptus est. Finem accepit secundum Punicum bellum, post annum nonum decimum quam cœperat.

## EVTROPII

## LIBER IV.

**T**RANSACTO Punico bello, sequutum est Macedonicum contra Philippum regem.

Quingentesimo & quinquagesimo primo anno ab Vrbe condita, T Quintius Flaminus aduersus Philippum regem mittitur: res prospere gessit: pax ei data est his legibus, ne Græciæ ciuitatibus, quas Romani contra eum defenderent, bellum inferret; vt captiuos & transfugas redderet; quinquaginta solum naues haberet, reliqua Romanis redderet: per annos decem quaterna millia pondo argenti præstaret; & obsidem daret filium suum Demetrium. T Quintius etiam Lacedæmonijs intulit bellum; ducem eorum Nabidem vicit; & quibus voluit conditionibus, in fidem accepit: ingenti gloria duxit ante currum nobilissimos obsides, Demetrium Philippi filium, & Armenem Nabidis.

Transacto bello Macedonico, sequutum est Syriacum contra Antiochum regem, P.

Cornelio Scipione , M. Acilio Glabrione Consulibus. Huic Antiocho Annibal se iunxerat ; Carthaginem patriam suam , ne Romanis traderetur , relinquens. M. Acilius Glabrio in Achaia pugnauit bene. Castra regis Antiochi nocturna pugna capta sunt : ipse fugatur. Philippo , quia contra Antiochum Romanis auxilio fuisset , filius Demetrius redditus est.

L. Cornelio Scipione , C. Laetio Consulibus ; Scipio Africanus fratri suo L. Cornelio Scipioni Consuli legatus contra Antiochum profectus est. Annibal , qui cum Antiocho erat , nauali praelio victus est. Ipse postea Antiochus circa Sipylum & Magnesium Asiae ciuitatem , à Consule Cornelio Scipione ingenti praelio fusus est. Auxilio fuit Romanis in ea pugna Eumenes , Attali regis frater , qui Eumeniam in Phrygia condidit. quinquaginta millia peditum , xv. millia equitum eo certamine ex parte regis occisa sunt. Tum rex Antiochus pacem petit : quae iisdem conditionibus datur à Senatu , quamquam victo , quibus ante offerebatur ; vt ex Europa & Asia recederet , atque intra Taurum se contineret ; x. millia talentorum , & xx. obsides praeberet ; Annibalem concitatore belli dederet Eumeni regi donatae sunt omnes Asiae ciuitates , quas Antiochus bello perdiderat : & Rhodiis , qui auxilium Romanis contra regem



Antiochum tulerant , multæ vrbes concessæ sunt. Scipio Romam rediit , ingenti gloria triumphauit : nomen & ipse , ad imitationem fratris , Asiatici accepit , quia Asiam vicerat : sicuti frater ipsius propter Africam domitam , Africanus appellabatur.

Spurio Posthumio Albino , Q. Marcio Philippo Consulibus , M. Fuluius de Ætolis triumphauit. Annibal , qui victo Antiocho , ne Romanis traderetur , ad Prusiam Bythyniæ regem fugerat , reperitus etiam ab eo est per Titum Quintium Flamininum : & , cum tradendus esset Romanis , venenum bibit , & apud Libyssam in finibus Nicomediensium sepultus est.

Philippo rege Macedonia mortuo , qui & aduersum Romanos bellum gesserat , & postea Romanis contra Antiochum auxilium tulerat , filius eius Perseus in Macedonia rebellauit , ingentibus copiis ad bellum paratis. Nam adiutores habebat Cotyn Thraciæ regem ; & Illyrici regem , Gentium nomine. Romanis autem in auxilium erant Eumenes Asiæ rex , Ariarathes Cappadociæ , Antiochus Syriæ , Ptolemæus Ægypti , Masinissa Numidiæ. Prusias autem rex Bythyniæ , quamquam sororem Persei vxorem haberet , utrisque se æquum præbuit. Dux Romanorum P. Licinius Consul est à rege graui prælio victus : neque tamen Romani , quamquam superati , regi petenti pacem

præstare voluerunt, nisi his conditionibus; ut se & suos Senatui & Populo Romano dederet. Mox missus contra eum Lucius Æmilius Paulus Consul, & in Illyricum C. Anicius Prætor, contra Gentium. Sed Gentius facile vno prælio victus, mox se dedit. Mater eius & vxor, & duo filij, frater quoque eius, simul in potestatem Romanorum venerunt. Ita bello intra dies xxx. perfecto, ante cognitum est Gentium victum, quam cœptum bellum nuntiaretur.

Cum Perseo autem Æmilius Paulus Consul tertio nonas Septembris dimicauit; vicitque eum, xx. millibus peditum eius occisis: equitatus cum rege fugit integer, Romanorum c. milites amissi sunt: vrbes Macedoniæ omnes, quas rex tenuerat, Romanis se dediderunt. ipse rex, cum defereretur ab amicis, venit in Pauli potestatem. sed honorem ei Æmilius non quasi victo habuit: nam & volentem sibi ad pedes cadere non permisit; sed iuxta se in sella collocauit. Macedonibus & Illyriis hæc leges datæ sunt; ut liberi essent, & dimidium eorum tributorum præstarent, quæ regibus præstitissent: ut appareret Populum Romanum pro æquitate magis quam auaritia dimicare; atque in conuentu infinitorum populorum Paulus hæc pronuntiauit, & legationes multarum gentium, quæ ad eum venerant, magnificentissimo paut conuiuio; dicens, Eiusdem

hominis esse debere & bello vincere, & conuiuij apparatu elegantem esse. Mox septuaginta ciuitates Epiri, quæ rebellarant, cepit: prædam militibus distribuit: Romam cum ingenti pompa rediit, in naue Persei: quæ inusitata magnitudinis fuisse traditur: adeo ut xvi. ordines habuisse dicatur remorum. Triumphauit autem magnificentissime in curru aureo, cum duobus filiis utroque latere astantibus. ducti sunt ante currum duo regis filij, & ipse Perseus, xlv. annos natus. Post eum etiam C. Anicius de Illyriis triumphauit: Gentius cum fratre & filiis ante currum ductus est. Ad hoc spectaculum multarum gentium reges Romam uenerunt: inter alios etiam uenit Attalus atque Eumenes Asiæ reges, atque Prusias Bithyniæ; magno honore accepti sunt & permittente Senatu dona quæ attulerant, in Capitolio posuerunt. Prusias etiam filium suum Nicomedem Senatui commendauit.

Insequenti anno Lucius Memmius in Hispania bene pugnavit. Marcellus postea Consul res ibidem prospere gessit.

Tertium deinde bellum contra Carthaginem suscipitur, nc. & altero anno ab Urbe condita L. Manlio Censorino, & Marco Manlio Consulibus, anno LI. postquam secundum Punicum bellum transactum erat. Hi profecti, Carthaginem oppugnaverunt. Contra eos Asdrubal dux Carthaginensium



dimicabat; Famea dux alius, equitatus præerat Carthaginensium. Scipio tunc, Scipionis Africani nepos, Tribunus ibi militabat, cuius apud omnes ingens metus & reuerentia erat. Nam & paratissimus ad dimicandum, & consultissimus habebatur. Itaque per eum multa prospere à Consulibus gesta sunt. neque quidquam magis vel Asdrubal vel Famea vitabant, quam contra eam Romanorum partem pugnam committere, vbi Scipio dimicabat.

Per idem tempus Masinissa rex Numidarum, per annos sexaginta fere amicus Populi Romani, anno vitæ suæ xcvii mortuus est. xlv. filiis relictis. Scipionem diuisorem regni inter filios esse iussit.

Cum igitur clarum Scipionis nomen esset, iuuenis adhuc, Consul est factus: & contra Carthaginem missus. Is eam cepit, ac diruit, spolia ibi inuenta, quæ de variarum ciuitatum excidijs Carthago collegerat: & ornamenta urbium ciuitatibus Siciliae, Italiae, Africae reddidit: quæ sua recognoscebant. Ita Carthago, septingentesimo anno postquam condita erat, deleta est. Scipio nomen quod avus eius acceperat, meruit: scilicet vt propter virtutem etiam ipse Africanus Iunior vocaretur.

Interim in Macedonia quidam Pseudo-philippus arma mouit: & Romanum prætorem Publium Inuencium contra se mis-

sum, ad internecionem vicit. Post eum Q. Cæcilius Metellus dux à Romanis contra Pseudophilippum missus est: & viginti quinque millibus ex militibus eius occisis, Macedoniam recepit. Ipsum etiam Pseudophilippum in potestatem suam redegit.

Corinthis quoque bellum indictum est, nobilissimæ Græciæ ciuitati, propter iniuriam legatorum Romanorum. Hanc Mummius Consul cepit ac diruit. Tres igitur Romæ simul celeberrimi triumphi fuerunt: Africani, ex Africa; ante cuius currum ductus est Asdrubal: Metelli, ex Macedonia; cuius currum præcessit Andrisclus, qui & Pseudophilippus dicitur: Mummi, ex Corintho; ante quem signa ænea & pictæ tabulæ, & alia vrbs clarissimæ ornamenta prælata sunt.

Iterum in Macedonia Pseudoperseus, qui se Persei filium esse dicebat, collectis servis, rebellauit; & cum septemdecim armatorum millia haberet, à Tremellio quaestore superatus est. His diebus Androgynus Romæ visus, iussu aruspicum in mare missus est.

Eodem tempore Metellus in Celtiberia apud Hispanos res egregias gessit. Successit ei quintus Pompeius. Nec multo post, Quintus quoque Cæpio ad idem bellum missus est; quod quidam Viriatus contra Romanos in Lusitania gerebat. Quo metu

Viriatuſ à ſuis interfectuſ eſt ; cum quatuordecim annos Hiſpanias aduerſum Romanos mouiſſet. Paſtor primo fuit ; mox latronum dux : poſtremo tantos ad bellum populoſ concitauit , vt aſſertor contra Romanos Hiſpaniæ putaretur , & cum interfectoreſ eiſ præmium à Cæpione Conſule peterent , reſponſum eſt , nunquam Romanis placuiſſe , imperatorem à ſuis militibuſ interfici.

Quintuſ Pompeiuſ deinde Conſul à Numantiniſ , quæ Hiſpaniæ ciuitaſ fuit opulentiffima , ſuperatuſ pacem ignobilem fecit. Poſt eum Caiuſ Hoſtiliuſ Mancinuſ Conſul iterum cum Numantiniſ pacem fecit infamem : quam Pop. & Senatuſ iuſſit infringi , atque ipſum Mancinum hoſtibuſ tradi : vt in illo , quem auctorem fœderiſ habebant , iniuriam ſoluti fœderiſ vindicarent. Poſt tantam igitur ignominiam , qua à Numantiniſ biſ Romani exercituſ fuerant ſubiugati , Publiuſ Scipio Africanuſ ſecundum Conſul factuſ , & ad Numantiam miſſuſ eſt. Iſ primum militem vitioſum & ignauum exercendo magiſ quam puniendo , ſine aliqua acerbitate correxit. Tum multas Hiſpaniæ ciuitateſ partim bello cepit , partim in deditiõem accepit. Poſtremo ipſam Numantiam diu obſeſſam , fame confecit : & à ſolo euerit : reliquam prouinciã in fidem accepit.



Eo tempore Attalus rex Asiæ, frater Eumenis, mortuus est; heredemque populum Romanum reliquit. ita imperio Romano per testamentum Asia accessit.

Mox etiam Decimus Iunius Brutus de Callæcis & Lusitanis triumphauit magna gloria: & Publius Scipio Africanus de Numantinis secundum triumphum egit, xiv. anno postquam priorem de Africa egerat.

Motum interim in Asia bellum est ab Aristonico Eumenis filio, qui ex concubina susceptus fuerat. Is Eumenes, frater Attali fuerat. Aduersus eum missus est P. Licinius Crassus. habuit infinita regum auxilia. nam & Bithyniæ rex Nicomedes Romanos iuuit: & Mithridates Ponticus, cum quo postea bellum grauissimum fuit: & Ariarathes Cappadox, & Pylæmenes Paphlagon. Victus est tamen Crassus, & in prælio interfectus. caput eius Aristonico oblatum est; corpus Smyrnæ sepultum. Postea Perpenna Consul Romanus, qui successor Crasso veniebat, audita belli fortuna, ad Asiam celerauit: & acie victum Aristonicum, apud Stratonicem ciuitatem, quo fugerat, fame ad deditionem compulit. Aristonicus iussu Senatus Romæ in carcere strangulatus: triumphari enim de eo non poterat, quia Perpenna apud Pergamum, rediens, diem obierat.

Lucio Cæcilio Metello, & Tito Quin-

tio Flaminio Consulibus Carthago in Africa iussu Senatus reparata est, quæ nunc manet; annis duobus & viginti postquam à Scipione fuerat eversa. Deducti eo sunt ciues Romani.

Anno dcccxvii. ab Vrbe condita, Caius Cassius Longinus, & Sextus Domitius Calvinus Consules, Gallis Transalpinis bellum intulerunt, & Arvernorum nobilissimæ cum ciuitati, atque eorum regi Bituito: infinitamque multitudinem iuxta Rhodanum fluvium interfecerunt. Præda ex torquibus Gallorum ingens Romam perlata est. Bituitus se Domitio deditit: atque ab eo Romam ductus est: magnæque gloria Consules ambo triumphauerunt.

Marco Porcio Catone, & Quinto Marcio Rege Consulibus, dcccxx. anno & tertio ab Vrbe condita, Narbona in Gallia colonia deducta est. Post à L. Metello & Quinto Mucio Scauola Consulibus de Dalmatia triumphatum est.

Ab vrbe condita anno dcccxxv. Caius Cato Consul Scordiscis intulit bellum; ignominioseque pugnavit.

C. Cæcilio Metello & Cnato Carbone Consulibus duo Metelli fratres eodem die alterum ex Thracia, ex Sardinia alterum triumphum egerunt. Nuntiarumque Romæ est, Cimbros à Gallia in Italiam transisse.

P. Scipione Nasica, & L. Calpurnio Bestia Consulibus Iugurthæ Numidarum regi bellum illatum est, quod Adherbalem & Hiempsalem, Micipsæ filios, fratres suos, reges, & P. Rom. amicos interemisset. Missus aduersus eum Consul Calpurnius Bestia, corruptus regis pecunia pacem cum eo flagitiosissimam fecit; quæ à Senatu reprobata est. Postea contra eundem insequenti anno Spurius Albinus Posthumius profectus est. Is quoque per fratrem ignominiose contra Numidas pugnavit. Terrio missus Quintus Cæcilius Metellus Consul, exercitum ingenti seueritate & moderatione correctum, cum nihil in quemquam cruentum faceret, ad disciplinam Romanam reduxit. Iugurtham varijs prælijs vicit, elephantos eius occidit, vel cepit. Et cum iam bello finem impositurus esset, successum est ei à C. Mario. Is Iugurtham, & Bocchum Mauritaniæ regem, qui auxilium Iugurthæ ferre cœperat, pariter superauit. Aliquanta & ipse oppida Numidiæ cepit: belloque terminum posuit, capto Iugurtha per quæstorem suum Cornelium Syllam, ingentem virum; tradente Boccho Iugurtham, qui pro eo ante pugnaverat.

A Marco Iunio Silano collega Quinti Metelli, Cimbri in Gallia, & à Minucio Rufo in Macedonia Scordisci & Triballi; & à Scriulio Cæpione in Hispania Lusitani



viſti ſunt : & duo triumphi de Iugurtha , primus per Metellum , ſecundus per Marium acti ſunt ; ante currum tamen Marij Iugurtha cum duobus filijs ductus eſt catenatus , & mox iuſſu Conſulis in carcere ſtrangulatus.

---

## EVTROPII

## LIBER V.

**D**V M bellum in Numidia contra Iugurtham geritur , Romani Conſules Marcus Manilius & Quintus Cæpio à Cimbriſ & Teutonibus & Tigurinis & Ambronibus , quæ erant Germanorum & Gallorum gentes , viſti ſunt iuxta flumen Rhodanum , & ingenti interneſione attriti , etiam caſtra ſua & magnam partem exercitus perdiderunt. Timor Romæ grandis fuit , quantus vix Annibalis tempore Punicis bellis , ne iterum Galli Romam venirent. Ergo Marius poſt victoriam Iugurthinam ſecundum Conſul eſt factus , bellumque ei contra Cimbrōs & Teutones decretum eſt. Tertio quoque ei & quarto declaratus eſt Conſulatus : quia bellum cum Cimbriſ prorrahebatur ; ſed in quarto Conſulatu

collegam habuit Quintum Lucretium Catulum. Cum Cimbris itaque conflixit, & duobus prælijs cc. millia hostium cecidit, lxxx. millia cepit, & ducem eorum Teutobodum; propter quod meritum absens quintum Consul est factus.

Interea Cimbri & Teutones, quorum copia adhuc infinita erat, ad Italiam transierunt. Iterum à Caio Mario & Quinto Catulo contra eos dimicatum est: sed à Catuli parte felicius. Nam eo prælio, quod simul ambo gesserunt, cxl. millia aut in pugna, aut in fuga cæsa sunt; & lx. millia capta. Romani milites ex utroque exercitu trecenti perierunt. Tria & triginta signa Cimbris sublata sunt; ex his exercitus Marij duo reportauit, Catuli exercitus xxx. & vnum. Is belli finis fuit: triumphus utrique decretus est.

Sexto Iulio Cæsare, & L. Marcio Philippo Consulibus sexcentesimo quinquagesimo nono anno ab Urbe condita, cum prope alia omnia bella cessassent, in Italia grauissimum bellum Picentes, Marfi, Pelignique mouerunt: qui, cum annis numerosis iam Pop. Romano obedirent, tum libertatem sibi æquam asserere cœperunt. Perniciosum admodum hoc bellum fuit. P. Rutilius Consul in eo occisus est: Cæpio nobilis iuuenis, & porcius Cato alius Consul. Duces autem aduersus Romanos Picentibus

Picentibus & Marſis fuerunt; Titus Vietius, Hierus Aſinius, Titus Herennius, Aulus Cluentius. A Romanis bene contra eos pugnatum eſt à C. Mario, qui ſexies Conſul fuerat; & à Cnæo Pompeio: maxime tamen à Lucio Cornelio Sylla, qui inter alia facta egregia; ita Cluentium hoſtium ducem, cum magnis copijs fudit, vt ex ſuis nec vnum amitteret. Quadriennio, cum graui ramen calamitate, hoc bellum tractum eſt. Quinto demum anno finem accepit per Lucium Cornelium Syllam Conſulem, cum antea in eodem bello ipſe multa ſtrenue Prætor geſſiſſet.

Anno Urbis conditæ DCLXII. primum Romæ bellum Ciuile commotum eſt: eodem anno etiam Mithridaticum. Cauſam bello Ciuili C. Marius ſexies Conſul dedit. Nam cum Sylla Conſul contra Mithridatem geſturus bellum, qui Aſiam & Achaiam occupauerat, mitteretur: iſque exercitum in Campania pauliſper teneret, vt belli Socialis, de quo diximus quod intra Italiam geſtum fuerat, reliquiæ tollerentur, Marius affectauit, vt ipſe ad bellum Mithridaticum mitteretur. Qua re Sylla commotus, cum exercitu ad Urbem venit. Illic contra Marium & Sulpicium dimicauit. primus urbem Romam ingreſſus eſt; Sulpicium interfecit, Marium fugauit: atque ita Conſulibus ordinatis in futurum an-



num , Cnæo Octauio , & L. Cornelio Cinna , ad Asiam profectus est Mithridates enim , qui Ponti rex erat , atque Armeniam Minorem , & totum Ponticum mare in circuitu cum Bosphoro tenebat , primo Nicomedem amicum P. R. Bithynia voluit expellere : Senatuque mandavit , bellum se ei propter iniurias quas passus fuerat , illaturum. A Senatu responsum est Mithridati , si id faceret , quod & ipse bellum à Romanis pateretur. Qua re iratus , Cappadociam statim occupauit , & ex ea Ariobarzanem regem & amicum Pop. Romani fugauit. Mox etiam Bithyniam inuasit , & Paphlagoniam , pulsus ex ea regionibus , amicis Pop. Romani , Pylæmene & Nicomede. Inde ad Ephesum contendit : & per omnem Asiam litteras misit , vt vbi-  
cumque inuenti essent ciues Romani , vno die occiderentur. Interea etiam Athenæ ciuitas Achaia ab Aristone Atheniensi Mithridati tradita est. Miserat enim iam ad Achaiam Mithridates Archelaum ducem suum , cum cxx. milibus equitum ac peditum : per quem etiam reliqua Græcia occupata est. Sylla Archelaum apud Piræum non longe ab Athenis obsedit , ipsamque urbem cepit ; postea commisso prælio contra Archelaum , ita eum vicit , vt ex cxx. millibus vix decem superessent Archelao , & ex Syllæ exercitu xiv. tantum ho-

mines interficerentur. Hac pugna Mithridates cognita, LXX. millia lectissima ex Asia Archelao misit, contra quem Sylla iterum commisit. Primo prælio viginti millia hostium interfecta sunt, filiusque Archelai Diogenes: omnes Mithridatis copiae extinctæ sunt: Archelaus ipse triduo nudus in paludibus latuit. Hac re audita Mithridates, cum Sylla de pace agere cœpit.

Interim eo tempore Sylla etiam Dardanos, Scordiscos, Dalmatas & Mœsos partim vicit, alios in fidem accepit. Sed cum legati à rege Mithridate, qui pacem petebant, venissent, non aliter se daturum Sylla esse respondit, nisi rex relictis his quæ occupauerat, ad regnum suum rediisset. Postea tamen ad colloquium ambo venerunt, pax inter eos ordinata est; ut Sylla ad bellum Ciuile festinans, à tergo periculum non haberet. Nam dum Sylla in Achaia atque Asia Mithridatem vicit, Marius qui fugatus erat, & Cornelius Cinna vnus ex Consulibus, bellum in Italia repararunt: & ingressi urbem Romam, nobilissimos ex Senatu & Consulares viros interfecerunt, multos proscripserunt: ipsius Syllæ domo euerfa, filios & vxorem ad fugam compulerunt: vniuersus reliquus Senatus ex Vrbe fugiens, ad Syllam in Græciam venit, orans ut patriæ subueniret. Ille in Italiam traiecit, bellum Ciuile gesturus aduer-

sus Norbanum & Scipionem Consules, & primo prælio contra Norbanum dimicauit, non longe à Capua; tum vii. millia eius cecidit, vi. millia cepit: cxxiv suorum amisit. Inde etiam se ad Scipionem convertit, & ante prælium totum eius exercitum sine sanguine in deditionem accepit. Sed cum Romæ mutati Consules essent, & Marius Marij filius, ac Papirius Carbo Consulatam accepissent, Sylla tamen contra Marium iuniorem dimicauit: & xv. millibus eius occisis, cccc. de suis perdidit. Mox etiam & Urbem ingressus est. Marium Marij filium, Præneste persequutus, obsedit, & ad mortem compulit. Rursus pugnam grauissimam habuit contra Lamponium & Carinatem duces partis Marianæ ad portam Collinam. lxxx. millia hostium in eo prælio contra Syllam fuisse dicuntur. xii. millia se Syllæ dederunt: cæteri in acie, in castris, in fuga, insatiabili ira victorum consumpti sunt. Cnæus quoque Carbo Consul alter, ab Arimino ad Siciliam fugit; & ibi per Cnæum Pompeium interfectus est: quem adolescentem Sylla annos vnum & xx. natum, cognita eius industria, traditis exercitibus præfecerat, vt secundus à Sylla haberetur. Occiso ergo Carbone, Pompeius Siciliam recepit. Transgressus inde ad Africam, Domitium Marianæ partis ducem, & Hiar-



bam regem Mauritaniae, qui Domitio auxilium ferebat, occidit. Post hæc Sylla de Mithridate ingenti gloria triumphauit. Cnaeus etiam Pompeius quod nulli Romanorum tributum erat, quartum & xx. annum agens, de Africa triumphauit. Hunc finem habuerunt duo bella funestissima; Italicum, quod & Sociale dictum; & Civile: quæ ambo tractata sunt per annos decem, consumpserunt ultra cl. millia hominum; viros Consulares xxiv. Prætorios vii. Ædilitios lx. Senatores fere ccc.

---

## EVTROPII

## LIBER VI.

**M**ARCO Æmilio Lepido, Quinto Catulo Consulibus, cum Sylla Rempublicam composuisset, bella noua exarserunt: vnum, in Hispania; aliud, in Pamphylia & Cilicia; tertium, in Macedonia; quartum in Dalmatia. Nam Sertorius, qui partium Marianarum fuerat, timens fortunam cæterorum qui interempti erant, ad bellum commouit Hispanias. Missi sunt contra eum duces, Quintus Cæcilius Metellus, filius eius qui Iugurtham

regem vicit : & Lucius Domitius Prætor. A Sertorij duce Hirtuleio Domitius occisus est : Metellus vario successu contra Sertorium dimicauit. Postea cum impar pugnae solus Metellus putaretur, Cnæus Pompeius ad Hispanias missus est. Ita duobus ducibus aduersis, Sertorius fortuna varia sæpe pugnavit. Octauo demum anno à suis occisus est, & finis ei bello datus est per Cn. Pompeium adolescentem, & Quintum Metellum Pium ; atque omnes prope Hispaniæ in ditionem Pop. Rom. redactæ sunt.

Ad Macedoniam missus est Appius Claudius post Consulatum. Leuia prælia habuit contra varias gentes, quæ Rhodopam provinciam incolebant : atque ibi morbo mortuus est. Missus ei successor Cnæus Scribonius Curio post Consulatum, is Dardanos vicit, & usque ad Danubium penetravit ; triumphumque meruit, & intra triennium finem bello dedit.

Ad Ciliciam & Pamphyliam missus est P. Seruilius ex Consule, vir strenuus. Is Ciliciam subegit, Lyciæ vrbes clarissimas oppugnauit, & cepit, in his Phaselidem, Olympum, Corycum Ciliciæ. Isauros quoque aggressus, in deditionem redegit, atque intra triennium bello finem dedit. Primus omnium Romanorum in Tauro iter fecit. Reuertens triumphum accepit, & nomen Isaurici meruit.

Ad Illyricum missus est Cnæus Cosconius pro Consule: multam partem Dalmatiæ subegit, Salonas cepit: & composito bello, Romam post biennium rediit.

Isdem temporibus, Consul Marcus Æmilius Lepidus, Caruli collega, bellum Ciuile voluit commouere: intra tamen vnam ætatem motus eius oppressus est. Ita uno tempore multi simul triumphi fuerunt: Metelli, ex Hispania: Pompeij, secundus ex Hispania: Curionis, ex Macedonia: Seruiliij, ex Isauria.

Anno vrbs conditæ DCLXXVI. L. Licinio Lucullo, & Marco Aurelio Cotta Consulibus mortuus est Nicomedes rex Bithyniæ, & per testamentum Populum Romanum fecit heredem. Mithridates, pace rupta, Bithyniam & Asiam rursus voluit invadere. Aduersus eum ambo Consules missi, variam habuere fortunam. Cotta apud Chalcedonem victus ab eo acie, etiam intra oppidum coactus est, & obsessus. Sed cum se inde Mithridates Cyzicum transtulisset, vt Cyzico capto, totam Asiam invaderet, Lucullus ei alter Consul occurrit: ac dum Mithridates in obsidione Cyzici commoraretur, ipse eum à tergo obsedit, fameque consumpsit, & multis prælijs vicit. Postremo Byzantium (quæ nunc Constantinopolis est) fugauit, nauali quoque prælio duces eius Lucullus oppressit. Ita



vna hieme & æstate, à Lucullo ad centum fere millia hominum ex parte regis extincta sunt.

Anno vrbis Romæ DCLXXVIII. Macedoniam prouinciam M. Licinius Lucullus accepit, consobrinus Luculli qui contra Mithridatem bellum gerebat. Et in Italia novum bellum subito commotum est. LXXX. enim & quatuor gladiatores ducibus Spartaco, Chryso, & Oenomao, effracto Capuæ ludo, effugerunt: & per Italiam vagantes, pæne non leuius bellum in ea, quam Annibal mouerat, parauerunt; nam multis ducibus, & duobus simul Romanorum Consulibus victis, sexaginta fere millium armatorum exercitum congregauerunt: viæque sunt in Apulia à M. Licinio Crasso Proconsule, & post multas calamitates Italiæ, tertio anno, bello huic finis imponitur.

Sexcentesimo octogesimo primo Vrbis conditæ anno, P. Cornelio Lentulo & Cnæo Aufidio Oreste Consulibus duo tantum grauia bella in Imperio Romano erant, Mithridaticum & Macedonicum, hæc duo Luculli agebant, L. Lucullus, & M. Lucullus. L. ergo Lucullus post pugnam Cyzicenam, qua vicerat Mithridatem; & naualem, qua duces eius oppresserat, persequutus est eum: & recepta Paphlagonia atque Bithynia, etiam regnum eius inuasit. Sinopen & Amisum ciuitates Ponti nobilissi-

mas , cepit. secundo prælio apud Cabira ciuitatem , quo ingentes copias ex omni regno adduxerat Mithridates , cum xxx. millia lectissima regis à quinque Romanorum millibus vastata essent , Mithridates fugatus , & castra eius direpta. Armenia quoque Minor , quam tenuerat , eidem sublata est. Susceptus tamen est Mithridates post fugam à Tigrane Armeniæ rege ; qui tum ingenti gloria imperabat , Persas sæpe vicerat , Mesopotaniam occupauerat , & Syriam , & Phœnices partem. Ergo Lucullus repetens hostem fugatum , etiam regnum Tigranis , qui Armenijs imperabat , ingressus est. Tigranocerta ciuitatem Armeniæ nobilissimam , cepit ; ipsum regem , cum sexcentis millibus clibanariorum , & centum millibus sagittariorum & armatorum venientem , octodecim millia militum habens , ita vicit , vt magnam partem Armeniorum deleuerit. Inde Nisibin profectus , eam quoque ciuitatem cum regis fratre cepit. Sed hi quos in Ponto Lucullus reliquerat , cum exercitus parte , vt regiones victas , etiam Romanos , tuerentur , negligenter se & auare agentes , occasionem iterum Mithridati in Pontum irrumpendi dederunt : atque ita bellum renouatum est , Lucullo paranti , capta Nisibi , contra Persas expeditionem , successor est missus. Alter Lucullus , qui Mæcedoniam administra-

bat, Bessis Romanorum primus intulit bellum, atque eos ingenti prælio in Æmo monte superauit: oppidum Vscudamam, quod Bessi habitabant, eodem die quo aggressus est, vicit: Cabylen cepit; usque ad Danubium penetrauit. Inde multas super Pontum positas ciuitates aggressus est. Illic Apolloniam euertit; Calatin, Parthenopolin, Tomos, Histrum, Buziam omnem cepit: belloque confecto, Romam rediit. ambo tamen triumphauerunt: Lucullus qui contra Mithridatem pugnauerat, maiori gloria, cum tantorum regnorum victor rediisset.

Confecto bello Macedonico, manente Mithridatico, quod recedente Lucullo, rex collectis auxilijs reparauerat, bellum Creticum ortum est; ad id missus Cæcilius Metellus, ingentibus prælijs intra triennium omnem prouinciam cepit; appellatusque est Creticus; atque ex insula triumphauit. Quo tempore Libya quoque Romano imperio per testamentum Apionis, qui rex eius fuerat, accessit: in qua inclytæ ciuitates erant, Berenice, Ptolemaïs, & Cyrene.

Dum hæc geruntur, Piratæ omnia maria infestabant; ita vt nauigatio Romanis toto orbe victoribus, sola tuta non esset. Quare id bellum Cnæo Pompeio decretum est: quod intra paucos menses ingenti



felicitate & celeritate confecit. Mox ei delatum bellum etiam contra regem Mithridatem & Tigranem : quo suscepto, Mithridatem in Armenia Minore, nocturno proelio vicit, castra diripuit : quadraginta milibus eius occisis, viginti tantum de exercitu suo perdidit, & duos Centuriones. Mithridates cum vxore fugit, duobus comitibus; Neque multo post, cum in suos scuiret, Pharnacis filij sui seditione apud milites, ad mortem coactus, venenum hausit. Hunc finem habuit Mithridates. periit autem apud Bosphorum, vir ingentis industriæ consilijque. Regnavit annos sexaginta : vixit septuaginta duobus : contra Romanos bellum habuit annos quadraginta.

Tigrani deinde Pompeius bellum intulit, ille se ei dedit, in castra Pompeij sexto-decimo milliaro ab Artaxata venit : ac diadema suum, cum procubisset ad genua Pompeij, in manibus eius collocavit : quod ei Pompeius reposuit ; honorificeque cum habitum, regni tamen parte mulcavit, & grandi pecunia ; adempta est ei Syria, Phoenice, Sophene : sex millia præterea talentorum argenti, quæ Populo Romano daret : quia bellum sine causa Romanis commouisset.

Pompeius mox etiam Albanis bellum intulit, & eorum regem Orodem ter vicit :

postremo per epistolas & munera rogatus ;  
veniam ei ac pacem dedit. Iberiæ quoque  
regem Arthacem vicit acie , & in deditio-  
nem accepit. Armeniam Minorem Deio-  
taro Galatiæ regi donauit , quia socius belli  
Mithridatici fuerat. Attalo & Pylæmeni  
Paphlagoniam reddidit , Aristarchum Col-  
chis regem imposuit. Mox Ituræos & Ara-  
bes vicit : & cum venisset in Syriam , Se-  
leuciam , vicinam Antiochiæ ciuitatem ,  
libertate donauit ; eo quod regem Tigranem non recepisset. Antiochenis obsides reddidit : aliquantum agrorum Daphnensibus dedit , quo locus ibi spatiosior fieret ; delectatus amœnitate loci , & aquarum abundantia. Inde ad Iudæam transfessus , Hierosolymam caput gentis tertio mense cepit ; duodecim millibus Iudæorum occisis , cæteris in fidem acceptis. His gestis , in Asiam se recepit , & finem antiquissimo bello dedit.

Marco Tullio Cicerone C. Antonio Consulibus anno ab Vrbe condita DCLXXXIX. Lucius Sergius Catilina , nobilissimi generis vir , sed ingenij prauissimi , ad delendam patriam coniurauit , cum quibusdam claris quidem , sed audacibus viris. A Cicerone Vrbe expulsus est : socij eius deprehensi , in carcere strangulati sunt. Ab Antonio , altero Consule , Catilina ipse in prælio victus est , & interfectus.

Sexcentesimo nonagesimo anno ab Vrbe condita, D. Iunio Silano & L. Muræna Consulibus Metellus de Creta triumphauit: Pompeius de bello Piratico & Mithridatico. Nulla vnquam pompa triumphi similis fuit; ducti sunt ante eius currum filius Mithridatis, filius Tigranis, Aristobulus rex Iudæorum: prælata ingens pecunia, auri atque argenti infinitum pondus. Hoc tempore nullum per orbem terrarum graue bellum erat.

Anno Urbis conditæ DCCXIII. Caius Iulius Cæsar, qui postea imperauit, cum L. Bibulo Consul est factus; decreta est ei Gallia, & Illyricum cum legionibus decem. Is primo vicit Heluetios, qui nunc Sequani appellantur, deinde vincendo per bella grauissima, vsque ad Oceanum Britannicum processit. Domuit autem annis fere ix. omnem Galliam, quæ inter Alpes, flumen Rhodanum, Rhenum, & Oceanum est, & circuitu patet ad bis & tricies centena millia passuum. Britannis mox bellum intulit; quibus ante eum ne nomen quidem Romanorum cognitum erat: & eos quoque victos, obsidibus acceptis stipendiarios fecit. Galliæ autem tributi nomine annum imperauit sestertium quadringenties. Germanosque trans Rhenum aggressus, immaniſſimis prælijs vicit. Inter tot successus ter male pugnavit:



apud Aruernos semel præsens, & absens in Germania bis, nam legati eius duo, Titurius & Arunculeius, per insidias cæsi sunt.

Circa eadem tempora, anno Urbis conditæ dcccvii. Marcus Licinius Crassus, collega Cnæi Pompeij Magni, in Consulatu secundo, contra Parthos missus est: & cum circa Carras contra omnia & auspicia dimicasset, à Surena Orodis regis duce victus, ad postremum interfectus est, cum filio clarissimo & præstantissimo iuvene. Reliquæ exercitus per C. Cassium Quæstorem seruatæ sunt: qui singulari animo perditas res tanta virtute restituit, vt Persas, rediens, trans Euphratem crebris prælijs vinceret.

Hinc iam bellum Ciuile successit, execrandum & lacrymabile; quo præter calamitates quæ prælijs acciderunt, etiam Romani nominis fortuna mutata est. Cæsar enim, rediens è Gallia victor, cœpit deponere alterum Consulatum: atque, cum sine dubietate aliqua deferretur, contradictum est à Marcello Consule, à Bibulo, à Pompeio à Catone; iussusque dimissis exercitibus ad Urbem redire: propter quam iniuriam ab Arimino, vbi milites congregatos habebat, aduersum patriam cum exercitu venit. Consules cum Pompeio, Senatusque omnis, atque vniuersa nobilitas ex Urbe fugit, & in Græciam transiit: apud Epi-

rum, Macedoniam, Achaiam, Pompeio duce, contra Cæsarem bellum parauit. Cæsar, vacuam Urbem ingressus, Dictatorem se fecit, inde Hispanias petijt. Ibi Pompeij exercitus validissimos & fortissimos, cum tribus ducibus, L. Afranio, M. Petreio, M. Varrone superauit. Inde reuertus, in Græciam transiit; aduersum Pompeium dimicauit. ; primo prælio victus est, & fugatus: euasit tamen: quia nocte interueniente, Pompeius sequi noluit, dixitque Cæsar, nec Pompeium scire vincere; & illo tantum die se potuisse superari. Deinde in Thessalia apud Palæophasalum productis utrimque ingentibus copijs dimicauerunt. Pompeij acies habuit xl. millia peditum; equitum in sinistro cornu vii. millia, in dextro D. præterea totius Orientis auxilia, totamque nobilitatem, innumeros Senatores, Prætorios, Consulares, & qui magnorum iam populorum victores fuissent. Cæsar in acie sua habuit peditum non integra xxx. millia, equites mille.

Nunquam adhuc Romanæ copiarum in unum neque maiores, neque melioribus ducibus conuenerant, totum terrarum orbem facile subacturæ, si contra Barbaros ducerentur; pugnatum tamen est ingenti contentione: victusque ad postremum Pompeius, & castra eius direpta sunt: ipse fu-

gatus , Alexandriam petijt , vt à rege Ægypti , cui tutor à Senatu datus fuerat , propter iuuenilem eius ætatem , acciperet auxilia : qui fortunam magis , quam amicitiam sequutus , occidit Pompeium , caput eius & annulum Cæsari misit : quo conspecto , Cæsar etiam lacrymas fuisse dicitur , tanti viri intuens caput , & generi quondam sui.

Mox Cæsar Alexandriam venit ; ipsi quoque Ptolemæus parare voluit insidias ; qua caussa regi bellum illatum est : victus in Nilo perijt ; inuentumque est corpus eius cum lorica aurea. Cæsar Alexandria potitus , regnum Cleopatrx dedit , Ptolemæi sorori , cum qua consuetudinem stupri habuerat. Rediens inde Cæsar , Pharnacem Mithridatis magni filium , qui Pompeio in auxilium apud Thessaliam fuerat , rebellantem in Ponto , & multas Pop. Romani prouincias occupantem , vicit acie : postea ad mortem coëgit. Inde Romam regressus , tertio se Consulem fecit cum M. Æmilio Lepido , qui ei Magister equitum Dictatori ante annum fuerat. Inde in Africam profectus est ; vbi infinita nobilitas cum Iuba Mauritanix rege bellum reparauerat , duces autem Romani erant , P. Cornelius Scipio ; ex genere antiquissimo Scipionis Africani : (hic etiam socer Magni Pompeij fuerat ) M. Petreius , Q. Varus



Varus, M. Porcius Cato, L. Cornelius Faustus, Syllæ Dictatoris filius. Contra hos commisso prælio, post multas dimicationes victor fuit. Cato, Scipio, Petreius, Iuba, ipsi se occiderunt: Faustus Pompeij gener à Cæsare interfectus est.

Post annum Cæsar Romam regressus, quarto se Consulem fecit, & statim ad Hispanias est profectus; vbi Pompeij filij, Cnæus & Sextus, ingens bellum repara-  
verant. Multa prælia fuerunt; vltimum prælium apud Mundam ciuitatem: in quo adeo Cæsar pæne victus est, vt fugientibus suis, se voluerit occidere; ne post tantam rei militaris gloriam, in potestatem adolescentium, natus annos sex & quinquaginta, veniret. Denique reparatis suis, vicit, & Pompeij filius maior occisus est, minor fugit. Inde Cæsar bellis Ciuilibus toto orbe compositis, Romam redijt; agere insolentius cœpit, & contra consuetudinem Romanæ libertatis. Cum ergo & honores ex sua voluntate præstaret, qui à Populo antea deferebantur, nec Senatui ad se venienti assurgeret, aliaque regia ac pæne tyrannica faceret, coniuratum est in eum à LX. vel amplius Senatoribus Equitibusque Romanis; præcipui fuerunt inter coniuratos, duo Bruti, ex eo genere Bruti qui primus Romæ Consul est factus, & reges expulserat. C. Cassius, & Seruilius Casca. Er-

go Cæsar, cum Senatus die quadam inter cæteros venisset ad curiam, tribus & viginti vulneribus confossus est.

---

# EVTROPII

## LIBER VII.

**A**NNO Urbis dcc. fere ac nono, interfecto Cæsare, bella Ciuilia reparata sunt, percussoribus enim Cæsaris Senatus fauebat. Antonius Consul, partium Cæsaris, Ciuili bello opprimere eos conabatur. Ergo turbata Republ. multa Antonius scelera committens, à Senatu hostis iudicatus est; missi ad eum persequendum duo Consules Pansa & Hirtius, & Octavianus, adolescens annos xviii. natus, Cæsaris nepos; quem ille testamento heredem reliquerat, & nomen suum ferre iusserat; hic est qui postea Augustus est dictus, & rerum potitus. Quare profecti contra Antonium tres duces, vicerunt eum. Euenit tamen vt victores Consules ambo morerentur. Quare tres exercitus vni Cæsari paruerunt. Fugatus Antonius, amisso exercitu, confugit ad Lepidum, qui Cæsari Magister Equitum fuerat, & tum copias

militum grandes habebat ; à quo susceptus est. Mox Lepido operam dante, Cæsar cum Antonio pacem fecit : & quasi vindicaturus patris sui mortem , à quo per testamentum fuerat adoptatus , Romam cum exercitu profectus est ; extorsitque ut sibi x x. anno Consulatus daretur. Senatum proscripsit cum Antonio & Lepido , & Rempublicam armis tenere cœpit ; per hos etiam Cicero orator occisus est , multique alij nobiles.

Interea Brutus & Cassius , interfectores Cæsaris , ingens bellum mouerunt ; erant enim per Macedoniam & Orientem multi exercitus, quos occupauerunt. Profecti igitur contra eos , Cæsar Octavianus Augustus , & M. Antonius , ( remanserat enim ad defendendam Italiam Lepidus ) apud Philippos , Macedoniæ urbem , contra eos pugnaverunt. Primo proelio victi sunt Antonius & Cæsar : periit tamen dux nobilitatis Cassius : secundo , Brutus & infinita nobilitas quæ cum illis bellum gesserat : ac sic inter eos diuisa est Respubl. ut Augustus Hispanias , Gallias , Italiam teneret ; Antonius Asiam , Pontum , Orientem ; Sed intra Italiam L. Antonius Consul bellum Ciuile commouit , frater eius qui cum Cæsare contra Brutum & Cassium dimicauerat. Is apud Perusium Tusciæ ciuitatem victus & captus est , neque occisus.



Interim à Sexto Pompeio , Cnæi Pompeij Magni filio ingens bellum in Sicilia commotum est , his qui superfuerant ex partibus Bruti , Cassique ad eum confluentibus. Bellatum per Cæsarem Augustum Octavianum , & M. Antonium , aduersus Sextum Pompeium : pax postremo conuenit.

Eo tempore M. Agrippa in Aquitania rem prospere gessit , & L. Ventidius Bassus irrumpentes in Syriam Persas , tribus prælijs vicit. Pacorum regis Orodis filium interfecit , eo ipso die quo olim Orodes Persarum rex per ducem Surenam Crassum occiderat. Hic primus de Parthis iustissimum triumphum Romæ egit.

Interim Pompeius pacem rupit : & nauali prælio victus , fugiens ad Asiam , interfectus est. Antonius , qui Asiam & Orientem tenebat , repudiata sorore Cæsaris Augusti Octavianiani , Cleopatram , reginam Ægypti , duxit uxorem. Contra Persas ipse etiam pugnavit : primis eos prælijs vicit : regrediens tamen , fame & pestilentia laborauit : & cum instarent Parthi fugienti , ipse pro victo recessit.

Hic quoque ingens bellum Ciuile commouit , cogente uxore Cleopatra , regina Ægypti ; dum cupiditate muliebri optat etiam in Vrbe regnare. Victus est ab Augusto , nauali pugna clara & illustri , apud

Actium, qui locus in Epiro est: ex qua fugit in Ægyptum: & desperatis rebus, cum omnes ad Augustum transirent, ipse se interemit. Cleopatra ibi aspidem admisit, & veneno eius extincta est. Ægyptus per Octavianum Augustum imperio Romano adiecta est: præpositusque eius factus est Cn. Cornelius Gallus. hunc primum Ægyptus Romanum iudicem habuit. Ita bellis toto orbe confectis, Octavianus Augustus Romam redijt XII. anno postquam Consul fuerat, ex eo Rempublicam per XLIV. annos solus obtinuit, ante enim XII. annis cum Antonio & Lepido tenuerat. Ita ab initio principatus eius vsque ad finem LVII. anni fuerunt. Obijt autem LXXXVI. anno, morte communi in oppido Campaniæ Atella. Romæ in Campo Martio sepelitur; vir qui non immerito ex maxima parte Deo similis est putatus, neque enim facile ullus eo aut in bellis felicior fuit, aut in pace moderatior, XLIV. annis quibus solus gessit imperium ciuillissime vixit: in cunctos liberalissimus, in amicos fidissimus: quos tantis euexit honoribus, vt pæne æquaret fastigio suo. Nullo tempore ante cum res Romana magis floruit; nam exceptis Ciuilibus bellis, in quibus inuictus fuit, Romano adiecit imperio Ægyptum, Cantabriam, Dalmatiam sæpe ante victam, sed penitus tunc subactam:

Pannoniam , Aquitaniam , Illyricum ,  
Rhatiam , Vindelicos , & Salassos in Al-  
pibus : omnes Ponti maritimas ciuitates :  
in his nobilissimas , Bosphorum , & Pan-  
ticapzon. Vicit autem prælijs Dacos :  
Germanorum ingentes copias cecidit : ipsos  
quoque trans Albim fluvium submovit , qui  
in Barbarico longe ultra Rhenum est ; hoc  
tamen bellum per Drusum priuignum suum  
administrauit ; sicut per priuignum Ti-  
berium alterum , Pannonicum ; quo bello  
c c c c. millia captiuorum ex Germania  
transtulit , & super ripam Rheni in Gal-  
lia collocauit. Armeniam à Parthis recepit ,  
obsides (quod nulli antea) Persæ ei dede-  
runt : reddiderunt etiam signa Romana ,  
quæ Crasso victo ademerant. Scythæ &  
Indi , quibus antea Romanorum nomen  
incognitum fuerat , munera & legatos ad  
eum miserunt. Galatia quoque sub hoc  
Prouincia facta est , cum antea regnum  
fuiſſet ; primusque eam M. Lollius pro Præ-  
tore administrauit. Tanto autem amore  
etiam apud Barbaros fuit , vt reges Po-  
puli Rom. amici , in honorem eius conde-  
rent ciuitates , quas Cæsareas nominarent ;  
sicut in Mauritania à rege Iuba , & in Pa-  
læstina , quæ nunc est vrbs clarissima. Mul-  
ti autem reges ex regnis suis venerunt , vt  
ei obsequerentur : & habitu Romano , to-  
gati scilicet , ad vehiculum vel equum



ipſius cucurrerunt. Moriens Divus appellatus eſt. Rempubicam beatiffimam Tiberio ſucceſſori reliquit; qui priuignus eius, mox gener, poſtremo adoptione filius fuerat.

Tiberius ingenti ſocordia imperium geſſit, graui crudelitate, ſceleſta auaritia, turpi libidine, nam nuſquam ipſe pugnauit: bella per legatos ſuos geſſit, quoldam reges ad ſe per blanditias euocatos, nunquam remiſit, in quæis Archelaum Cappadocem: cuius etiam regnum in prouinciæ formam redegit, & maximam ciuitatem appellari ſuo nomine iuſſit; quæ nunc Cæſarea dicitur, cum Mazaca antea vocaretur. Hic tertio & vigefimo imperij anno, ætatis LXXXIII. ingenti omnium gaudio mortuus eſt in Campania.

Succeſſit ei Caius Cæſar, cognomento Caligula, Druſi priuigni Auguſti, & ipſius Tiberij nepos: ſceleratiſſimus, ac funeſtiſſimus, & qui etiam Tiberij dedecora purgauerit. Bellum contra Germanos ſuſcepit: & ingreſſus Sueuiam, nihil ſtrenue fecit. Stupra ſororibus intulit, ex vna etiam natam filiam cognouit. Cum aduerſum cunctos ingenti auaritia, libidine, crudelitate ſæuiren, interfectus in Palatio eſt, anno ætatis ſuæ XXXIX. imperij III. menſe X. dieque VIII.

Poſt hunc Claudius fuit, patruus Caligulæ, Druſi, qui apud Moguntiacum mo-

numentum habet, filius: cuius & Caligulæ nepos erat. Hic medic imperauit; multa gerens tranquille atque moderate, quædam crudeliter atque insulse. Britannia intulit bellum, quam nullus Romanorum post Iulium Cæsarem attigerat: eaque deuicta per Cnæum Sentium & Aulum Plautium, illustres & nobiles viros, triumphum celebrem egit. Quasdam insulas etiam vltra Britanniam in Oceano positas, Romano imperio addidit; quæ appellantur Orcades: filioque suo Britannici nomen imposuit. Tam ciuilis autem circa quosdam amicos exstitit, vt etiam Plautium nobilem virum, qui in expeditione Britannica multa ac egregia fecerat, triumphantem ipse prosequeretur, & conscendenti Capitolium lævus incederet. Is vixit annos LXIV. imperauit XIV. post mortem consecratus est, Divusque appellatus.

Successit huic Nero, Caligulæ avunculo suo simillimus: qui imperium Romanum & deformauit, & diminuit: inusitatae luxuriæ sumptuumque; vt qui exemplo Caij Caligulæ, calidis & frigidis se lauaret vnguentis, retibus aureis piscaretur, quæ blatteis funibus extrahebat. Infinitam partem Senatus interfecit; bonis omnibus hostis fuit, ad postremum se tanto dedecore prostituit, vt saltaret & cantaret in scena citharædico habitu & tragico, par-

ricidia multa commisit, fratre, vxore, matre, interfectis, urbem Romam incendit; vt spectaculi eius imaginem cerneret, quali olim Troia capta arserat. In re militari nihil omnino ausus, Britanniam pæne amisit. Nam duo sub hoc nobilissima oppida capta illîc atque euerfa sunt: Armeniam Parthi sustulerunt, legionesque Romanas sub iugum miserunt. Duæ tamen Prouinciæ sub eo factæ sunt; Pontus Polemoniacus, concedente rege Polemone; & Alpes Cotiæ, Cotio rege defuncto. Propter hoc Romanæ Vrbi execrabilis, ab omnibus simul destitutus, & à Senatu hostis iudicatus, quum quæreretur ad pœnam (quæ pœna erat talis, vt nudus per publicum ductus, furca capiti eius inserta, virgis vsque ad mortem caderetur, atque ita præcipitaretur de saxo) è Palatio fugit: & in sub-urbanò se liberti sui, quod est inter Salariam & Numentanam viam, ad quartum vrbis milliarium, interfecit. Is ædificauit Romæ thermas, quæ ante Neronianæ dictæ, nunc Alexandrinæ appellantur. Obijt trigesimo & altero ætatis anno, imperij xiv. atque in eo omnis familia Augusti consumpta est.

Huic Ser. Galba successit, antiquissimæ nobilitatis Senator, cum lxxiii. annum ageret ætatis, ab Hispanis & Gallis Imperator electus, mox ab vniuerso exercitu



libenter acceptus est. Nam priuata eius vita insignis fuerat militaribus & ciuilibus rebus; sæpe Consul, sæpe Proconsul; frequenter dux in grauissimis bellis. Huius breue imperium fuit, & quod bona haberet exordia, nisi ad seueritatem propensior videretur. Insidijs tamen Othonis occisus est, imperij mense septimo, iugulatus in foro Romæ, sepultusque in hortis suis, qui sunt Aurelia via, non longe ab Vrbe Roma.

Otho, occiso Galba inuasit imperium: materno genere nobilior quam paterno, neutro tamen obscuro: in priuata vita mollis, in imperio documentum sui non potuit ostendere. Nam cum iisdem temporibus quibus Otho Galbam occiderat, etiam Vitellius factus esset à Germanicianis exercitibus Imperator, bello contra eum suscepto, cum apud Bebriacum in Italia leui prælio victus esset, ingentes tamen copias haberet, sponte semetipsum occidit, perentibus militibus, ne tam cito de belli desperaret euentu, cum tanti se non esse dixisset, vt propter eum Ciuile bellum commoueretur, voluntaria morte obiit, trigésimo & octauo ætatis anno, nonagesimo & quinto imperij die.

Dein Vitellius imperio potitus est, familia honorata magis quam nobili, nam pater eius non admodum clare natus, tres

tamen ordinarios gesserat Consulatus. Hic cum multo dedecore imperavit, & graui scuitia notabilis, præcipue ingluvie & voracitate: quippe cum de die sæpe quarto vel quinto feratur epulatus. Notissima certe cœna memoriæ mandata est, quam ei Vitellius frater exhibuit: in qua super cæteros sumptus, duo millia piscium, septem auium millia appositâ traduntur. Hic cum Neroni similis esse veller, atque id adeo præ se ferret, vt etiam exsequias Neronis, quæ humiliter sepultæ fuerant, honoraret, à Vespasiani ducibus occisus est, interfecto prius Sabino Vespasiani Imperatoris fratre, quem cum Capitolio incendit. Interfectus autem, & cum magno dedecore tractus per vrbe[m] Romam publice, nudus, erecta coma & capite, subiecto ad mentum gladio; stercore in vultum & pectus ab omnibus obuijs appetitus: postremo iugulatus, & in Tiberim deiectus, etiam communi caruit sepultura. Perijt autem ætatis anno septimo & quinquagesimo, Imperij mense viii. & die vno.

Vespasianus huic successit, factus apud Palæstinam Imperator: princeps obscure quidem natus, sed optimis comparandus, priuata vita illustris; vt qui à Claudio in Germaniam, deinde in Britanniam missus, tricies & bis cum hoste conflixerit; duas validissimas gentes, xx. oppida, insulam

Vestam Britanniae proximam, imperio Romano adiecerit. Romae se in imperio moderatissime gessit: pecuniae tamen au-  
diot fuit, ita ut eam nulli iniuste auferret:  
quam cum omni diligentiae prouisione col-  
ligeret, tamen studiosissime largiebatur,  
praecipue indigentibus, nec facile ante eum  
cuiusquam principis vel maior est liberali-  
tas comperta, vel iustior; placidissimae  
bonitatis; ut qui maiestatis quoque contra  
se reos non facile puniret ultra exsilij pae-  
nam. Sub hoc Iudaea Romano accessit im-  
perio: & Hierosolyma, quae fuit vrbs cla-  
rissima Palaestinae: Achaia, Lyciam,  
Rhodum, Byzantium, Samum, quae li-  
berae ante hoc tempus fuerant: item Thra-  
ciam, Ciliciam Tracheam, Commage-  
nen, quae sub regibus amicis erant, in Pro-  
uinciarum formam redegit. Offensarum &  
inimicitiarum immemor fuit, conuitia à  
causidicis & philosophis in se dicta, leni-  
ter tulit, diligens tamen coercitor disci-  
plinæ militaris. Illic cum Tito filio de  
Hierosolymis triumphauit. Per hæc cum  
Senatui & Populo, postremo cunctis ama-  
bilis ac iucundus esset, profluvio ventris  
extinctus est in villa propria, circa Sabi-  
nos, annum ætatis agens L XIX. imperij no-  
num, & diem septimum: arque inter Diuos  
relatus est. Genituram filiorum ita cogni-  
tam habuit, ut cum multae contra eum



coniurationes fierent, quas patefactas ingenti dissimulatione contempsit, in Senatu dixerit; aut filios sibi successuros, aut neminem.

Huic Titus filius successit; qui & ipse Vespasianus est dictus: vir omnium virtutū genere mirabilis; adeo ut amor & deliciæ humani generis diceretur, facundissimus, bellicosissimus, moderatissimus: causas Latine egit; poemata & tragædias Græce composuit. In oppugnatione Hierosolymorum sub patre militans, XII. propugnatores XII. sagittarum ictibus confixit. Romæ tantæ civilitatis in imperio fuit, ut nullum omnino puniret; convictos adversum sese coniurationis ita dimiserit; ut in eadem familiaritate, qua antea, habuerit. Facilitatis tantæ fuit & liberalitatis, ut nulli quidquam negaret: & cum ab amicis reprehenderetur, respondit, Nullum tristem debere ab Imperatore discedere. Propterea cum quadam die in cœna recordatus fuisset, nihil se illo die cuiquam præstitisse, dixit; ô Amici, hodie diem perdidi. Hic Romæ amphitheatrum ædificavit, & quinque millia ferarum in dedicatione eius occidit.

Per hæc inusitato favore dilectus, morbo periit, in ea qua pater villa, post biennium, menses octo, dies xx. quam Imperator erat factus, ætatis anno altero & xl.

Tantus luctus eo mortuo publicus fuit , ut omnes tanquam in propria doluerint orbitate , Senatus obitu ipsius circa vesperam nuntiato , nocte irrupit in curiam : & tantas ei mortuo gratias laudesque concessit , quantas nec viuo vnquam egerat , nec præsenti. Inter Diuos relatus est.

Domitianus mox accepit imperium, frater ipsius iunior, Neroni aut Caligulæ, aut Tiberio similior , quam patri vel fratri suo, primis tamen annis moderatus in imperio fuit : mox ad ingentia vitia progressus, libidinis, iracundiæ, crudelitatis, auaritiæ, tantum in se odium concitauit, ut merita & patris & fratris aboleret. Interfecit nobilissimos ex Senatu. Dominum se & Deum primus appellari iussit : nullam sibi nisi auream & argenteam statuam in Capitolio poni passus est , consobrinos suos interfecit, superbia quoque in eo execrabilis fuit. Expeditiones quatuor habuit; vnā aduersus Sarmatas, alteram aduersus Catos, duas aduersum Dacos. De Dacis Cattisque duplicem quidem triumphum egit; de Sarmatis solam lauream usurpauit. Multas quidem calamitates iisdem bellis passus est, nam in Sarmatia legiones eius cum duce interceptæ : & à Dacis Appius Sabinus Consularis & Cornelius Fulcus præfectus prætorio , cum magnis exercitibus occisi sunt. Romæ quoque mul-

ea opera fecit ; in his Capitolium & Forum Transitorium, Odeum, porticus, Isium ac Serapium, & Stadium. Verum cum ob scelera vniuersis exosus esse cœpisset, interfectus est suorum coniuratione in Palatio, anno ætatis XLV. imperij quintodecimo. Funus eius cum ingenti dedecore per vespillones exportatum, & ignobiliter est sepultum.

# EV TROPII

## LIBER VIII.

**A**NNO octingentesimo & quinquagesimo ab Urbe condita, Vetere & Valente Consulibus, Respub. ad prosperissimum statum redijt, bonis principibus ingenti felicitate commissa. Domitiano enim exitiali tyranno Nerva successit ; vir in priuata vita moderatus, & strenuus ; nobilitatis mediæ, qui senex admodum, operam dante Petronio Secundo, præfecto prætorio ; item Parthenio interfectore Domitiani, Imperator factus, æquissimum se & ciuillissimum præbuit. Reipubl. diuina prouisione consuluit, Traianum adoptando. Mortuus est Romæ post annum & qua-



tuor menses imperij sui , ac dies octo :  
ætatis LXX. & altero anno , atque inter  
Diuos relatus est.

Successit ei Vlpus Traianus Crinitus ,  
natus Italicae in Hispania , familia anti-  
qua magis quam clara : nam pater eius  
primum Consul fuit. Imperator autem  
apud Agrippinam ciuitatem in Gallijs fa-  
ctus est. Rempublicam ita administravit ,  
vt omnibus principibus merito præferatur.  
Inusitatae ciuilitatis & fortitudinis fuit.  
Romani imperij , quod post Augustum de-  
fensum magis fuerat quam nobiliter am-  
pliatum , fines longè lateque diffudit : vr-  
bes trans Rhenum in Germania reparauit :  
Daciam Decibalo victo subegit , prouin-  
cia trans Danubium facta in his agris quos  
nunc Taiphali habent , & Victophali &  
Theruingi. Ea prouincia decies centena  
millia in circuitu tenet. Armeniam , quam  
occupauerant Parthi , recepit , Pharnace  
Syro occiso , qui eam tenebat. Albanis re-  
gem dedit. Iberorum regem & Sauroma-  
tarum & Bosphoranorum & Arabum , &  
Osdroënorum , & Colchorum in fidem  
accepit , & Adiabenos , Marchomedos  
occupauit : & Anthemisium magnam Per-  
sidis regionem , Seleuciam & Ctesio-  
phontem , Babylonem & Edessios vicit ,  
ac tenuit vsque ad Indiae fines , & mare  
Rubrum accessit : atque ibi tres prouincias  
fecit ;

fecit, Armeniam; Assyriam, Mesopotamiam, cum his gentibus quæ Mæcedenam attingunt. Arabiam postea in prouinciæ formam redegit, in mari Rubro classem instituit; vt per eam Indiæ fines vastaret. Gloriam tamen militarem ciuilitate & moderatione superauit, Romæ & per prouincias æqualem se omnibus exhibens; amicos salutandi causa frequentans, vel ægro-  
tantes, vel cum festos dies habuissent; con-  
uiuia cum iisdem indiscreta vicissim ha-  
bens, sæpe in vehiculis eorum sedens; nul-  
lum senatorum lædens, nihil iniustum ad  
augendum fiscum agens: liberalis in cun-  
ctos, publice priuatimque ditans omnes &  
honoribus augens, quos vel mediocri fa-  
miliaritate cognouisset: orbem terrarum  
ædificans, multas immunitates ciuitatibus  
tribuens; nihil non tranquillum & placi-  
dum agens; adeo vt omni eius ætate vnus  
tantum Senator damnatus sit; at is tamen  
per Senatum ignorante Traiano. Ob hoc  
per orbem terrarum Deo proximus, nihil  
non venerationis meruit & vivus & mor-  
tuus. Inter alia dicta hoc illius fertur egre-  
gium: amicis enim culpantibus, quod ni-  
mis circa omnes comis esset, respondit;  
Talem se Imperatorem esse priuatis, qua-  
les esse sibi Imperatores priuatus optasset.  
Post ingentem igitur gloriam belli domique  
quæsitam, è Perside rediens, apud Seleu-

ciam Isauriæ profluuiio ventris exstinctus est. Obijt autem ætatis anno LXII. mense nono, & die quarto: imperij anno XIX. mense VI. die XV. Inter Diuos relatus est, solusque omnium intra Urbem sepultus. Ossa eius collocata in urna aurea, in foro quod ædificauit, sub columna sita sunt: cuius altitudo, CXLIV. pedes habet. Huius tantum memoriæ delatum est, vt vsque ad nostram ætatem non aliter in Senatu principibus acclametur, nisi, Felicior Augusto, melior Traiano; Adco in eo gloria bonitatis obtinuit, vt vel assentantibus, vel vere laudantibus occasionem magnificentissimi præstet exempli.

— Defuncto Traiano, Ælius Adrianus creatus est princeps; sine aliqua quidem voluntate Traiani, sed operam dante Plotina Traiani vxore, nam cum Traianus, quamquam consobrinæ filium, viuens noluerat adoptare. Natus & ipse Italiciæ in Hispania, qui Traiani gloriæ inuidens, statim provincias tres reliquit, quas Traianus addiderat; & de Assyria, Mesopotamia, & Armenia, reuocauit exercitus; ac finem imperij esse voluit Euphratem. Idem de Dacia facere conatum, amici deterruerunt; ne multi ciues Romani Barbaris traderentur: propterea quod Traianus victa Dacia, ex toto orbe Romano infinitas eo copias hominum transtulerat,



ad agros & vrbes colendas. Dacia enim diuturno bello Decibali viris fuerat exhausta. Pacem tamen omni tempore imperij sui habuit; semel tantum per præsidem dimicauit: orbem Romanum circumiuit, & multa ædificauit. Facundissimus Latino sermone, Græco eruditissimus fuit. Non magnam clementiæ gloriam habuit: diligentissimus tamen circa ærarium, & militum disciplinam. Obijt in Campania, maior sexagenario, imperij anno xxi. mense x. die xxix. Senatus ei tribuere noluit diuinos honores, tamen cum successor ipsius Titus Aurelius Fulvius Antoninus hoc vehementer exigeret, & vniuersi Senatores palam resisterent, tandem obtinuit.

Ergo Adriano successit T. Antoninus Fulvius Boionius; idem etiam Pius nominatus; genere claro, sed non admodum vetere: vir insignis, & qui merito Numæ Pompilio conferatur; ita vt Romulo Traianus æquetur. Vixit ingenti honestate priuatus, maiori, in imperio, nulli acerbus, cunctis benignus: in re militari moderata gloria: defendere magis prouincias quam amplificare studens; viros iustissimos ad administrandam Rempub. quærens; bonis honorem habens, improbos sine aliqua acerbitate detestans, regibus amicis venerabilis non minus quam terribilis; adeo vt Barbarorum plurimæ nationes, deposti-

tis armis, ad eum controuersias suas litesque deferrent, sententiæque eius parerent. Hic ante imperium ditissimus, opes quidem suas stipendijs militum, & circa amicos liberalitatibus minuit; verum ærarium opulentum reliquit. Pius propter clementiam dictus est. Obijt apud Lorium villam suam milliario ab vrbe xii. vitæ anno lxxiii. imperij xxiii. atque inter Diuos relatus est, & merito consecratus.

Post hunc imperauit M. Antoninus Verus; haud dubie nobilissimus: quippe cum eius origo paterna à Numa Pompilio, materna à Salentino rege penderet: & cum eo L. Annius Antoninus Verus; tumq; primum Romana Respublica duobus æquo iure imperium administrantibus paruit; cum vsque ad eum singulos semper habuisset Augustos. Hi & genere inter se coniuncti fuerunt, & affinitate, nam Verus Annius Antoninus M. Antonini filiam in matrimonium habuit: M. autem Antoninus gener Antonini Pij fuit, per vxorem Galeriam Faustinam, iuniorem consobrinam suam. Hi bellum contra Párthos gesserunt; qui post victoriam Traiani tum primum rebellauerant. Verus Antoninus ad id profectus est: qui Antiochiæ & circa Armeniam agens, multa per duces & ingentia patrauit: Seleuciam Assyriæ urbem nobilissimam cum d. milli-

bus hominum cepit : Parthicum triumphum reuexit ; cum fratre eodemque socero triumphauit. Obijt tamen in Venetia, cum à Concordia ciuitate Altinum proficisceretur, & cum fratre in vehiculo sederet, subito sanguine ictus, casu morbi quem Græci ἀπὸ πλῆθους vocant, vir ingenij parum ciuilis ; reuerentia tamen fratris nihil vnquam atrox ausus. Cum obijisset xi. imperij anno, inter Diuos relatus est. Post eum Marcus Antoninus solus Rempub. tenuit ; vir quem mirari facilius quis quam laudare possit. A principio vitæ tranquillissimus : adeo vt in infantia quoque vultum nec ex gaudio, nec ex mœrore mutaret. Philosophiæ deditus Stoicæ, ipse etiam non solum vitæ moribus, sed etiam eruditione philosophus, tantæ admirationis adhuc iuuenis, vt eum successorem parauerit Adrianus relinquere, adoptato tamen Antonino Pio generum esse ei idcirco voluerit, vt hoc ordine ad imperium perueniret. Institutus est ad philosophiam per Apollonium Chalcedonium ; ad scientiam Græcarum litterarum, per Sextum Chæronensem, Plutarchi nepotem. Latinas autem litteras eum Fronto orator nobilissimus docuit. Hic cum omnibus Romæ æquo iure egit ; ad nullam insolentiam elatus imperij fastu : liberalitatis promptissimæ, prouincias ingenti benignitate & modera-



tione tractauit. Contra Germanos eo principe res feliciter gestæ sunt. Bellum ipse vnum gessit Marcomannicum : sed quantum nulla memoria fuit , adeo vt Punicis conferatur , nam eo grauius est factum , quod vniuersi exercitus perierant , sub hoc enim tantus calus pestilentiaë fuit , vt post victoriam Persicam, Romæ ac per Italiam prouinciasque , maxima hominum pars , militum omnes fere copiæ languore defecerint. Ingenti ergo labore & moderatione, cum apud Carnuntum iugi triennio perseuerasset , bellum Marcomannicum confecit ; quod cum his Quadi , Vandali , Sarmatæ , Sueui , atque omnis Barbaria commouerat : multa hominum millia interfecit : ac Pannonijs seruitio liberatis , Romæ rursus cum Commodo Antonino filio suo , quem iam Cæsarem fecerat , triumphauit. Ad huius belli sumptum ærario exhausto , cum largitiones nullas haberet , neque indicere prouincialibus aut Senatui aliquid vellet , instrumentum regij cultus , facta in foro Diui Traiani sectione , distraxit : vasa aurea , pocula crystallina & murrhina , vxoriam ac suam sericam ac auream vestem , multa ornamenta gemmarum : ac per duos continuos menses venditio habita est , multumque auri redactum. Post victoriam tamen emptoribus pretia restituit , qui reddere comparata vo-

Iuerunt : molestus nulli fuit, qui maluit semel empra retinere. Hic permisit viris clarioribus, vt conuiuia eodem cultu quo ipse, & ministris similibus exhiberent. In editione munerum post victoriam adeo magnificus fuit, vt centum simul leones exhibuisse tradatur. Cum igitur fortunatam Rempubl. & virtute & mansuetudine reddidisset, obiit xviii. imperij anno, vitæ lxi. & omnibus certatim adnitentibus, inter Diuos relatus est.

Huius successor L. Antoninus Commodus, nihil paternum habuit; nisi quod contra Germanos feliciter & ipse pugnavit. Septembrem mensem ad nomen suum transferre conatus est, vt Commodus diceretur, sed luxuria & obscœnitate deprauatus, gladiatorijs armis sæpissime in ludo, deinceps etiam in amphitheatro cum huiusmodi hominibus sæpe dimicauit. Obijt morte subita; adeo vt strangulatus, vel veneno interfectus putaretur: cum annis xii. post patrem, & viii. mensibus imperasset; tanta execratione omnium, vt hostis humani generis etiam mortuus iudicaretur.

Huic successit Pertinax; grandæuus iam; vt qui septuagenariam attingisset ætatem; præfecturam Vrbi tum agens; ex S. C. imperare iussus. Octogesimo imperij die Prætorianorum militum seditione, & Iuliani scelere occisus est.

Post eum Saluius Iulianus Rempubl. inuasit; vir nobilis, & iuris peritissimus; nepos Saluij Iuliani, qui sub Diuo Adriano Perpetuum composuit Edictum. Victus est à Seuero apud Muluium pontem, interfectus in Palatio, vixit mensibus septem, postquam cœperat imperare.

Hinc imperij Romani administrationem Septimius Seuerus accepit: oriundus ex Africa, prouincia Tripolitana, oppido Lepti, solus omni memoria & ante & postea ex Africa Imperator fuit. Hic primum fisci aduocatus, mox militaris Tribunus, per multa deinde & varia officia atque honores vsque ad administrationem totius Reipublicæ peruenit, Pertinacem se appellari voluit, in honorem eius Pertinacis qui à Iuliano fuerat occisus. Parcus admodum fuit, natura sævus. Bella multa & feliciter gessit. Pescennium Nigrum, qui in Ægypto & Syria rebellaucrat, apud Cyzicum interfecit. Parthos vicit: Arabas eo vsque superauit, vt etiam prouinciam ibi faceret, idcirco Parthicus & Arabicus dictus est. Multa toto Romano orbe reparauit. Sub eo etiam Clodius Albinus, qui in occidendo Pertinace socius fuerat Iuliano, Cæsarem se in Gallia fecit: victusque apud Lugdunum est & interfectus. Seuerus autem præter bellicam gloriam, etiam ciuilibus studijs clarus fuit, & litte-



ris doctus, philosophiæ scientiam ad plenum adeptus. Nouissimum bellum in Britannia habuit : utque receptas provincias omni securitate muniret, vallum per xxxii. millia passuum à mari ad mare deduxit. Decessit Eboraci admodum senex, imperij anno xviii. mense iv. & Divus appellatus est, nam filios suos successores reliquit, Bassianum & Getam : sed Bassiano Antonini nomen à Senatu voluit imponi, itaque dictus est M. Aurelius Antoninus Bassianus : patrique successit. Nam Geta hostis publicus iudicatus, confestim periit.

Marcus igitur Aurelius Antoninus Bassianus, idemque Caracalla, morum fere paternorum fuit, paulo asperior, & minax. Opus Romæ egregium fecit lauacri; quæ Antoninianæ appellantur; nihil præterea memorabile. Impatiens libidinis; ut qui nouercam suam Iuliam, uxorem duxerit. Defunctus in Osdroëne apud Edeßam, moliens aduersum Parthos expeditionem, anno imperii vi. mense ii. vix egressus ætatis xliii. annum, funere publico clatus est.

Opilius deinde Macrinus, qui præfectus prætorio erat, cum filio Diadumeno facti Imperatores, nihil memorabile ex temporis breuitate gesserunt; nam imperium eorum duum mensium, & vnius anni fuit:

seditione militari ambo pariter occisi sunt.

Creatus est post hos M. Aurelius Antoninus : Hic Antonini Caracallæ filius putabatur : sacerdos autem Heliogabali templi erat. Is cum Romam ingenti & militum & Senatus expectatione venisset, probris se omnibus contaminavit. Impudicissime, & obscœnissime vixit, biennioque post & VIII. mensibus tumultu interfectus est militari ; & cum eo mater Semia Syra.

Successit huic Aurelius Alexander ; ab exercitu Cæsar, à Senatu Augustus nominatus, iuvenis admodum : susceptoque adversus Persas bello, Xerxem eorum regem gloriosissime vicit, militarem disciplinam severissime rexit ; quasdam tumultuantes legiones integras exauctoravit. Affectorem habuit, vel scrinii magistrum, Vlpianum iuris conditorem. Romæ quoque fauorabilis fuit. Perijt in Gallia, militari tumultu XIII. imperii anno, & die VII. in matrem suam Mammæam vnice pius.

## EVTROPII

## LIBER IX.

**P**OST hunc Maximinus ex corpore militari primus ad imperium accessit: sola militum voluntate, cum nulla Senatus intercessisset auctoritas, neque ipse Senator esset. Is bello aduersus Germanos feliciter gesto, cum à militibus esset Imperator appellatus, à Pupieno Aquileiæ occisus est, deferentibus eum militibus suis, cum filio adhuc puero, cum quo imperauerat triennio, & paucis diebus.

Postea tres simul Augusti fuerunt, Pupienus, Balbinus, & Gordianus: duo superiores obscurissimo genere, Gordianus, nobilis: quippe cuius pater senior Gordianus, consensu militum, cum Proconsulatum Africae gereret, Maximino imperante, princeps fuisset electus. Itaque cum Romam venissent Balbinus & Pupienus, in Palatio interfecti sunt; soli Gordiano imperium reservatum. Gordianus, admodum puer, cum Tranquillinam Romæ duxisset uxorem, Ianum Geminum aperuit: & ad Orientem profectus, Parthis bellum



intulit, qui iam moliebantur erumpere; quod quidem mox feliciter gessit, prælijsque ingentibus Persas afflixit. Rediens, haud longe à Romanis finibus interfectus est fraude Philippi, qui post eum imperavit. Miles ei tumulum xx. milliario à Circesio, quod castrum nunc Romanorum est, Euphrati imminens, ædificavit; exsequias Romam reuexit; ipsum Divum appellavit.

Philippi duo, filius & pater, Gordiano occiso, imperium inuasit: atque exercitu incolumi reducto, ad Italiam è Syria profecti sunt. His imperantibus, millesimus annus Romæ vrbis ingenti ludorum apparatu spectaculorumque celebratus est. Ambo inde ab exercitu interfecti sunt: senior Philippus Veronæ, Romæ iunior. Annis v. imperauerunt, inter Diuos tamen relati sunt.

Post hos Decius è Pannonia inferiore, Bubaliæ natus, imperium sumpsit. Bellum civile quod in Gallia motum fuerat, oppressit, filium suum Cæsarem fecit. Romæ lauacrum ædificavit. Cum biennio ipse & filius eius imperassent, vterque in Barbarico interfecti sunt, & inter Diuos relati.

Mox Imperatores creati sunt, Gallus Hostilianus, & Galli filius Volusianus. Sub his Æmilianus in Mœsia res novas molitus est: ad quem opprimendum cum ambo profecti essent, Interamnæ interfecti

sunt, non completo biennio. nihil omnino clarum gesserunt. Sola pestilentia & morbis atque ægritudinibus notus eorum principatus fuit.

Æmilianus obscurissime natus, obscurius imperavit; ac tertio mense extinctus est.

Hinc Licinius Valerianus in Rhætia & Norico agens, ab exercitu Imperator, & mox Augustus est factus. Gallienus quoque Romæ à Senatu Cæsar est appellatus. Horum imperium Romano nomini perniciosum, & pæne exitiabile fuit, vel infelicitate principum, vel ignavia. Germani Rauennam vsque venerunt. Valerianus in Mesopotamia bellum gerens, à Sapore Persarum rege superatus est: mox etiam captus, apud Parthos ignobili seruitute contemnit.

Gallienus, cum adolescens factus esset Augustus, imperium primum feliciter, mox commode, ad vltimum perniciose gessit. Nam iuuenis in Gallia & Illyrico multa strenue fecit, occiso apud Mursum Ingenuo, qui purpuram sumpserat, & Trebelliano. Diu placidus & quietus: mox in omnem lasciuiam dissolutus, tenendæ Reipub. habenas probrosa ignauia & desperatione relaxauit. Alamanni vastatis Gallis in Italiam irruerunt. Dacia quæ à Traiano vltra Danubium fuerat adiecta, amis-

sa est. Græcia, Macedonia, Pontus, Asia; vastata per Gothos. Pannonia à Sarmatis Quadiisque populata est: Germani vsque ad Hispanias penetrauerunt, & ciuitatem nobilem Tarraconem expugnauerunt. Parthi Mesopotamia occupata; Syriam sibi cœperunt vindicare. Tum iam desperatis rebus, & delete pæne imperio Romano, Posthumus in Gallia, obscurissime natus, purpuram sumpsit: & per annos decem ita imperauit, vt consumptas pæne prouincias ingenti virtute & moderatione reparauerit, qui seditione militum interfectus est, quod Moguntiacum, quæ aduersum eum rebellauerat, Lolliano res novas moliente, diripiendam militibus tradere noluiſſet. Post eum Marius vilissimus opifex purpuram accepit: & secundo die interfectus est. Victorinus postea Galliarum accepit imperium; vir strenuissimus: sed cum nimia libidinis esset, & matrimonia aliena corrumpere, Agrippinæ occisus est, Acturio quodam machinante dolum, imperij sui anno secundo. Huic successit Tetricus Senator, qui Aquitaniam honore præsidis administrans, absens à militibus Imperator electus est; & apud Burdegalam purpuram sumpsit; seditiones multas militum pertulit. Sed dum hæc in Gallia geruntur, in Oriente per Odenatum Persæ victi sunt: defensa Syria, recepta Mesopotamia, vsque



ad Ctesiphontem Odenatus penetrauit. Ità Gallieno Rempub. deferente, Romanum imperium in Occidente per Posthumum, per Odenatum in Oriente seruatum est. Gallienus interea, Mediolani cum fratre Valeriano occisus est, imperij anno nono: Claudiusque ei successit, à militibus electus, à Senatu appellatus Augustus. Hic Gothos, Illyricum Macedoniamque vastantes; ingenti prælio vicit, parcus vir, ac modestus, & iusti tenax, atque Reip. gerendæ idoneus: qui tamen intra biennium imperij morbo interiit, & Divus appellatus est. Senatus ingenti cum honore decorauit, scilicet vt in curia clypeus ipsi aureus, item in Capitolio statua aurea poneretur.

Quintilius post eum, Claudij frater, consensu militum Imperator electus est, vir vnica moderationis & ciuitatis laude æquandus fratri vel præponendus, consensu Senatus appellatus Augustus, septimo decimo die imperij occisus est.

Post eum Aurelianus suscepit imperium, Dacia Ripensi oriundus, vir in bello potens, animi tamen immodici, & ad crudelitatem propensioris: quique Gothos strenuissime vicit. Romanam ditionem ad fines pristinos, varia bellorum felicitate reuocauit, superauit in Gallia Tetricum apud Catalaunos, ipso Tetrico prodente exer-

citum suum ; cuius assiduas seditiones ferre non poterat : quin etiam per litteras occultas Aurelianum ita fuerat deprecatus , vt inter alia versu Virgiliano vteretur ; *Eripe me his, inuicte, malis*. Zenobiam quoque, occiso marito Odenato , qui Orientem tenebat , hand longe ab Antiochia non sine graui prælio cepit : ingressusque Romam , nobilem triumphum quasi receptor Orientis Occidentisque egit ; currum præcedentibus Tetrico & Zenobia : qui quidem Tetricus etiam Corrector Lucaniæ postea fuit , ac priuatus diutissime vixit. Zenobia autem , posteros , qui adhuc manent Romæ , reliquit. Hoc imperante etiam monetarij in Vrbe rebellauerunt , vitiatis pecuniis , & Felicissimo Rationali interfecto : quos Aurelianus victos , vltima crudelitate compescuit ; plurimos nobiles capite damnavit : sævus & sanguinarius , ac necessarius magis in quibusdam , quam amabilis Imperator : trux omni tempore , etiam filii sororis interfector : disciplinæ tamen militaris & morum dissolutorum magna ex parte corrector. Urbem Romam muris firmioribus cinxit ; templum Soli ædificauit ; in quo infinitum auri gemmarumque constituit. Prouinciam Daciam , quam Traianus vltra Danubium fecerat , intermisit , vastato omni Illyrico & Mœsia , desperans eam posse retineri : abductosque

que Romanos ex urbibus & agris Daciæ in media Mœsia collocauit : & est in dextera Danubio in mare fluenti , cum antea fuerit in laua. Occiditur serui sui fraude, qui ad quosdam militares viros amicos ipsius nomina pertulit annotata , falso manum eius imitatus , tamquam Aurelianus ipsos pararet occidere ; itaque vt præveniretur ab iisdem , interfectus est in itineris medio , quod inter Constantinopolim & Heracleam est straræ veteris, locus Cænophrurium appellatur ; mors tamen eius inulta non fuit. Meruit quoque inter Diuos referri ; Imperauit annos v. menses vi.

Tacitus post hunc suscepit imperium , vir egregie moratus ; & Reipub. gerendæ idoneus , nihil tamen clarum potuit ostendere , intra vi. mensem imperij morte præuentus. Florianus , qui Tacito successerat , duobus mensibus , & diebus xx. in imperio fuit ; neque quidquam dignum memoria egit.

Post hunc Probus , vir illustris gloria militari , ad administrationem Reipubl. accessit. Gallias à Barbaris occupatas , ingenti præliorum felicitate restituit. Quosdam imperium vsurpare conatos , scilicet Saturninum in Oriente , Proculum & Bonosum Agrippinæ , multis certaminibus oppressit. Vineas Gallos & Pannonios habere permisit. opere militari Almun montem



Sirmium, & Aureum apud Mœsiam superiorem, vineis conseruit, & provincialibus colendos dedit. Hic cum bella innumera gessisset, pace parta, dixit breui milites necessarios non futuros, vir acer ac strenuus, iustus, & qui Aurelianum æquaret gloria militari, morum tamen ciuilitate superaret. Interfectus est tamen Sirmij tumultu militari in Turre Ferrata. Imperauit annos sex, menses iv.

Post hunc Carus est factus Augustus Narbonæ natus in Gallia: qui contestim Carinum & Numerianum filios Cæsares fecit; cum quibus regnauit duobus annis, sed dum bellum aduersum Sarmatas gerit, nuntiato Persarum tumultu, ad Orientem profectus, res contra Persas nobiles gessit: ipsos prælio fudit: Seleuciam & Ctesiphontem vrbes nobilissimas cepit: & cum castra supra Tigridem haberet, ictu diuini fulminis periit. Numerianus quoque filius eius, quem secum ad Persas duxerat, adolescens egregiæ indolis, cum oculorum dolore correptus, lecticula veheretur, impulsore Apro, qui socer eius erat, per insidias occisus est, & cum dolo occultaretur ipsius mors quousque Aper inuadere posset imperium, foetore cadaueris prodita est, milites enim qui eum sequebantur, foetore commoti, diductis lecticulæ pallijs, post aliquot dies mortem eius notam habere po-

tuerunt. Interea Carinus, quem Cæsarem in Parthos proficiscens Carus, in Illyrico, Gallia, Italia, reliquerat; omnibus se sceleribus coinquinavit: plurimos innoxios fidei criminibus occidit: matrimonia nobilia corripit: condiscipulis quoque, qui eum in auditorio vel leui fatigatione taxaerant, perniciosus fuit. Ob quæ omnibus hominibus inuisus, non multo post pœnas dedit. Nam de Perfide victa exercitus rediens, cum Carum Augustum fulmine, Numerianum Cæsarem insidijs perdidisset, Diocletianum Imperatorem creauit, Dalmatia oriundum, virum obscurissime natum: adeo ut à plerisque scribæ filius, à nonnullis Anulini senatoris libertinus fuisse credatur. Is prima militum concione iurauit, Numerianum nullo suo dolo interfectum, & cum iuxta eum Aper, qui Numeriano insidias fecerat, constitisset, in conspectu exercitus manu Diocletiani gladio percussus est. Postea Carinum, omni odio & detestatione viuentem, apud Murgum ingenti prælio vicit proditum ab exercitu suo, quem fortiozem habebat, certe desertum inter Viminarium atque Aureum montem. Ita rerum Romanarum positus, cum tumultum rusticani in Gallia concitassent, & factioni suæ Bagaudarum nomen imponerent, duces autem haberent Amandum & Ælianum, ad subigendos eos

Maximianum Herculium Cæsarem misit; qui leuibus prælijs agrestes domuit, & partem Galliæ reformauit. Post hæc tempora etiam Carausius, qui vilissime natus, in strenuo militiæ ordine famam egregiam fuerat consecutus, cum apud Bononiam per tractum Belgicæ & Armoricæ pacandum mare accepisset, quod Franci & Saxones infestabant, multis Barbaris sæpe captis; nec præda integra, aut prouincialibus reddita, aut Imperatoribus missa, cum suspicio esse cœpisset, consulto ab eo admitti Barbaros, vt transcentes cum præda exciperet, atque hac se occasione ditaret; à Maximiano iussus occidi, purpuram sumpsit, & Britannias occupauit. Ita cum per omnem orbem terrarum res turbatæ essent, & Carausius in Britannis rebellaret: Achilles in Ægypto; Africam Quinquegentiani infestarent, Narseus Orienti bellum inferret; Diocletianus Maximianum Herculium ex Cæsare fecit Augustum; Constantium & Maximianum, Cæsares: quorum Constantius per filiam nepos Claudii traditur; Maximianus Galerius in Dacia haud longe à Sardica natus. Atque vt eos etiam affinitate coniungeret, Constantius priuignam Herculi Theodoram accepit; ex qua postea sex liberos Constantini fratres habuit: Galerius filiam Diocletiani Valeriam: ambo



vxores, quas habuerant, repudiare compulsi. Cum Carausio tamen, cum bella frustra tentata essent contra virum rei militaris peritissimum, ad postremum pax conuenit. cum post septennium Allectus socius eius occidit; atque ipse post eum Britannias triennio tenuit: qui ductu Asclepiodoti præfecti prætorio est oppressus. Ita Britannia decimo anno recepta. Per idem tempus à Constantio Cæsare in Gallia pugnatum est, circa Lingones, die vna aduersam & secundam fortunam expertus est; nam cum repente Barbaris ingruentibus, intra ciuitatem esset coactus, tam præcipiti necessitate, vt clausis portis, in murum funibus tolleretur; vix quinque horis mediis aduentante exercitu, lx. fere millia Alamannorum cecidit. Maximianus quoque Augustus bellum in Africa profligauit, domitis Quinquegentianis, & ad pacem reductis. Diocletianus obsessum Alexandria Achilleum viii. fere mense superauit, eumque interfecit. victoria acerbè vsus est, totam Ægyptum grauibus proscriptionibus cædibusque cædauit. Ea tamen occasione ordinauit prouide multa, & disposuit; quæ ad nostram ætatem manent. Galerius Maximianus primo aduersum prælium, exin secundum habuit, inter Callinicum. Carrasque congressus, cum inconsulte magis quam ignaue dimicasset,

admodum enim parua manu cum copiosissimo hoste commisit. Pulsus igitur, & ad Diocletianum profectus, cum ei in itinere occurrisset, tanta insolentia fertur à Diocletiano exceptus, vt per aliquot passuum millia purpuratus tradatur ad vehiculum cucurrisse. Mox tamen per Illyricum Mœsiamque contractis copijs, rursus cum Narseo Ormisdæ & Saporis auo, in Armenia Maiore pugnavit successu ingenti, nec minore consilio simulque fortitudine: quippe qui etiam speculatoris munus cum altero ac tertio equite suscepit. pulso Narseo, castra eius diripuit; vxores, sorores, liberos suscepit; infinitam extrinsecus Persarum nobilitatem, gazam Persicam copiosissimam, ipsum in vltimas regni solitudines coëgit; quare à Diocleriano, in Mesopotamia cum præsidijs tum morante, ouans regressus, ingenti honore susceptus est. Varia deinceps & simul & viritim bella gesserunt. Carpis & Basternis subactis, Sarmatis victis: quarum nationum ingentes captiuorum copias in Romanis sinibus locauerunt. Diocletianus moratus callide fuit, sagax præterea, & admodum subtilis ingenio, & qui seueritatem suam aliena inuidia vellet explere, diligentissimus tamen & sollertissimus princeps, & qui in imperio Romano primus regiae consuetudinis formam magis quam Romanæ liber-

tatis, inuexit; adorarique se iussit, cum ante eum cuncti salutarentur: ornamenta gemmarum vestibus calceamentisque indidit. Nam prius imperij insigne in chlamyde purpurea tantum erat: reliqua communia. Herculus autem, propalam ferus, & inciuilis ingenij, asperitatem suam etiam vultus horrore significans; Hic naturæ suæ indulgens, Diocletiano in omnibus est seuerioribus consilijs obsecutus. Cum tamen ingrauescente ævo, parum se idoneum Diocletianus moderando imperio esse sentiret, auctor Herculio fuit, ut in priuatam vitam concederent, & stationem tuendæ Reipub. viridioribus iunioribusque manderent; cui ægre collega obtemperauit, tamen uterque vna die priuato habitu, imperij insigne mutauit; Nicomediæ Diocletianus, Herculus Mediolani; post triumphum inclytum quem Romæ ex numerosis gentibus egerant, pompa ferculorum illustri, qua Narsei coniuges sororesque & liberi ante currum ducti sunt. Concesserunt autem Salonas vnus, alter in Lucaniam. Diocletianus priuatus in villa quæ haud procul à Salonis est, præclaro otio senuit; inusitata virtute usus; ut solus omnium post conditum Romanum imperium, ex tanto fastigio sponte ad priuatæ vitæ statum ciuilitatemque remearet. Contigit igitur ei quod nulli post natos homines, ut cum



priuatus obisset, inter Diuos tamen referretur.

---

# E V T R O P I I

## LIBER X.

**H**is igitur abeuntibus, ad administrationem Reipubl. Constantius & Galerius Augusti creati sunt; diuisusque inter eos Romanus orbis; vt Galliam, Italiam, Africam Constantius; Illyricum, Asiam, Orientem Galerius obtineret; sumptis duobus Cæsaribus. Constantius tamen, contentus dignitate Augusti, Italiæ atque Africæ administrandæ sollicitudinem recusauit: vir egregius, & præstantissimæ ciuilitatis; diuinis prouincialium ac priuatorum studijs, fisci commoda non admodum affectans: ducensque melius, publicas opes à priuatis haberi, quam intra vnum claustrum referuari, adeo autem cultus modici, vt feriatis diebus, si cum amicis numerosioribus esset epulandum, priuatorum eis argento ostiatim petito triclinia sternerentur. Hic non modo amabilis, sed etiam venerabilis Gallis fuit: præcipue quod Diocletiani suspectam pru-

Maxentium, & Maximiani sanguinariam temeritatem imperio eius euaserant. Obijt in Britannia, Eboraci, principatus anno tertio-decimo; atque inter Diuos relatus est.

Galerius, vir & probe moratus, & egregius in re militari, cum Italiam quoque, sinente Constantio, administrationi suæ accessisse sentiret, Cæsares duos creauit. Verum Constantio mortuo, Constantinus, ex obscuriore matrimonio eius filius, in Britannia creatus est Imperator, & in locum patris exoptatissimus moderator accessit. Romæ interea prætoriani, excitato tumultu, Maxentium Herculij filium, qui haud procul ab Vrbe in Villa Publica morabatur, Augustum nuncupauerunt, quo nuncio Maximianus Herculius ad spem erectus resumendi fastigij, quod inuitus amiserat, Romam aduolauit è Lucania, quam sedem priuatus elegerat, in agris amœnissimis consenescens: Diocletianumque etiam per litteras adhortatus est, ut depositam resumeret potestatem: quas ille irritas habuit, sed aduersum motum prætorianorum atque Maxentij, Seuerus Cæsar Romam missus à Galerio, cum exercitu venit: obsidensque Urbem militum suorum scelere, desertus est. auctæ Maxentio opes, confirmatumque imperium. Seuerus fugiens, Rauennæ interfectus est. Herculius tamen Maximianus, post hæc in concione

exercitus filium Maxentium denudare conatus, seditionem & conuitia militum tulit. Inde ad Gallias profectus est; dolo composito, tanquam à filio esset expulsus; vt Constantino genero jungeretur: moliens tamen Constantinum reperta occasione interficere, qui in Gallijs, & militum & provincialium ingenti iam fauore regnabat, cæsis Francis, atque Alamannis, captisque eorum regibus: quos etiam bestijs, cum magnificum spectaculum muneris parasset, obiecit. Detectis igitur insidijs per Faustam filiam, quæ dolum viro enuntiauerat, profugit Herculus Massiliam, ibique oppressus. ex ea etenim nauigare ad filium præparabat, pœnas dedit iustissimo exitu; vitæ ad omnem asperitatem sœuitiamque proclivus, infidus, incommodus, ciuilitatis penitus expers.

Per hoc tempus Licinius à Galerio Imperator est factus, Dacia oriundus, notus ei antiqua consuetudine, & in bello quod aduersus Narseum gesserat, strenuis laboribus & officijs acceptus: mors Galerij confestim secuta est. Respub. tum ab his quatuor Imperatoribus tenebatur, Constantino; & Maxentio, filijs Augustorum; Licinio & Maximino, novis hominibus. Quinto tamen Constantinus imperij sui anno, bellum aduersum Maxentium Ciuile commouit, copias eius multis prælijs



fudit : ipsum postremo Romæ aduersus nobiles omnibus exitiis sæuientem , apud pontem Miluium vicit , Italiaque est potitus. Non multo post deinceps in Oriente quoque aduersus Licinium Maximinus res novas molitus , vicinum exitium fortuito apud Tarsum morte præuenit.

Constantinustamen , vir ingens , & omnia efficere nitens quæ animo præparasset , simul principatum totius orbis affectans , Licinio bellum intulit ; quamuis necessitudo illi & affinitas cum eo esset : nam soror eius Constantia , nupta Licinio erat , ac primo eum in Pannonia , secundo ingenti apparatu bellum apud Cibalas instruentem , repentinus oppressit : omnique Dardania , Mœsia , Macedonia potitus , numerosas provincias occupauit. Varia deinceps inter eos bella , & pax reconciliata ruptaque est. Postremo Licinius nauali & terrestri prælio victus apud Nicomediam , se dedit , & contra religionem sacramenti Thessalonicæ priuatus occisus est. Eo tempore res Romana sub vno Augusto & tribus Cæsaribus ( quod nunquam alias ) fuit ; cum liberi Constantini Galliæ , Orienti , Italiaque præessent. Verum insolentia rerum secundarum aliquantum Constantinum ex illa fauorabili animi docilitate mutauit. Primum necessitudines persecutus , egregium virum , & sororis filium , commodæ

indolis iuuenem interfecit, mox vxorem;  
post numerosos amicos. Vir primo imperij  
tempore optimis principibus, vltimo me-  
dijs comparandus. Innumeræ in eo animi  
corporisque virtutes claruerunt, militaris  
gloriæ appetentissimus, fortuna in bellis  
prospera fuit; verum ita, vt non superaret  
industriam. Nam etiam Gothos post Ci-  
uile bellum varie profligauit, pace his ad  
postremum data; ingentemque apud Bar-  
baras gentes memoriam gratiæ collocauit.  
Ciuibus artibus & liberalibus studiis de-  
ditus: affectator iusti amoris, quem omni-  
no sibi & liberalitate & docilitate quæsiuit,  
sicut in nonnullos amicos dubius, ita in re-  
liquos egregius: nihil occasionum præter-  
mittens, quo opulentiores eos clarioresque  
præstaret. Multas leges rogauit; quasdam  
ex bono & æquo, plerasque superfluas, non-  
nullas seueras, primusque Urbem nominis  
sui ad tantum fastigium euehere molitus  
est, vt Romæ æmulam faceret. Bellum ad-  
uersum Parthos moliens, qui iam Mesopo-  
tamiam fatigabant, vno & trigesimo anno  
imperii, ætatis sexto & sexagesimo, Nico-  
mediæ in Villa Publica obiit. denuntiata  
mors eius etiam per crinitam stellam, quæ  
invisitæ magnitudinis aliquamdiu fulsit;  
eam Græci κομήλη vocant; atque inter Di-  
pos meruit referri.

Successores filios tres reliquit, atque v-

num fratris filium. Verum Dalmatius Cæsar prosperrima indole, neque patruo ab-  
similis, haud multo post oppressus est fa-  
ctione militari, & Constantio patruele suo  
sinente potius quam iubente. Constanti-  
num porro, fratri bellum inferentem, &  
apud Aquileiam inconsultius prælium ag-  
gressum, Constantis duces interemerunt;  
ita Respublica ad duos Augustos redacta  
est. Constantis Imperium, strenuum ali-  
quandiu & iustum fuit; mox cum & vale-  
tudine improspira, & amicis prauioribus  
vteretur; ad graua vitia conuersus, cum  
intolerabilis prouincialibus, militibus in-  
iucundus esset, factione Magnentij occisus  
est. Obiit autem non longe ab Hispaniis,  
in castro cui Helenæ nomen est, anno im-  
perii xvii. ætatis trigésimo: rebus tamen  
plurimis strenue militia gestis; exercitui-  
que per omne vitæ tempus sine graui crude-  
litate terribilis. Diuersa Constantii fortu-  
na fuit, à Persis enim multa & graua per-  
pessus, sæpe captis oppidis, obsessis vrbi-  
bus, cæsis exercitibus; nullumque ei con-  
tra Saporem prosperum prælium fuit; nisi  
quod apud Singaram, haud dubiam victo-  
riam ferocia militum amisit; qui pugnant  
seditiose & stolide contra rationem belli,  
diciam præcipiti poposcerunt. Post Con-  
stantis necem, Magnentio Italiam, Afri-  
cam, Gallias, obtinente; etiam Illyricum



res nouas habuit, Veteranione ad imperium consensu militum electo : quem grandæuum iam, & cunctis amabilem diuturnitate & felicitate militiæ, ad tuendum Illyricum principem creauerunt : virum probum, & morum veterum, ac iucundæ ciuilitatis : sed omnium liberalium artium expertem ; adeo vt ne elementa quidem prima litterarum, nisi grandæuus, & iam Imperator, acceperit. Sed à Constantio, qui ad vltionem fraternæ necis, bellum Ciuile commouerat, abrogatum est Veteranioni imperium : qui nouo inusitatoque more, consensu militum deponere insigne compellus est. Romæ quoque tumultus fuit; Nepotiano Constantini sororis filio, per gladiatoriam manum imperium inuadente : qui sæuis exordiis dignum exitum nactus est ; vigesimo enim atque octano die à Magnentianis ducibus oppressus ; pœnas dedit : caputque eius pilo per Urbem circumlatum est : grauissimæ proscriptiones & nobilium cædes fuerunt.

Non multo post Magnentius apud Murciam profligatus acie est, ac pæne captus : ingentes Romani imperii vires ea dimicatione consumptæ sunt, ad quælibet bella externa idoneæ, quæ multum triumphorum possent securitatisque conferre. Orienti mox à Constantio Cæsar est datus, patrui filius Gallus; Magnentiusque diuersis pro-

lij's victus, vim vitæ suæ apud Lugdunum attulit, imperij anno tertio, mense septimo; frater quoque eius Senonis; quem ad tuendas Gallias Cæsarem miserat.

Per hæc tempora etiam à Constantio multis incivilibus gestis, Gallus Cæsar occisus est: vir natura ferus, & ad tyrannidem pronior, si suo iure imperare licuisset. Sylvanus quoque in Gallia res novas molitus, ante diem trigesimum exstinctus est. Solus in imperio Romano eo tempore Constantius Princeps & Augustus fuit. Mox Iulianum Cæsarem ad Gallias misit, patruelem suum, Galli fratrem; tradita ei in matrimonium sorore; cum multa oppida Barbari expugnassent, alia obsiderent, ubique fœda vastitas esset, Romanumque imperium non dubia iam calamitate nutaret: à quo modicis copijs apud Argentoratum Galliæ urbem ingentes Alamannorum copię exstinctæ sunt, rex nobilissimus captus; Galliæ restitutæ; multa postea per eundem Iulianum egregie aduersum Barbaros gesta sunt; submotique ultra Rhenum Germani, & finibus suis Romanum imperium restitutum. Neque multo post, cum Germanici iam exercitus à Galliarum præsidio tollerentur, consensu militum Iulianus factus Augustus est: interiectoque anno, ad Illyricum obtinendum profectus est, Constantio Parthicis bellis occupato: quibus re-

bus cognitis ad bellum Ciuile conuersus, in itinere obiit, inter Ciliciam Cappadociamque, anno imperii octauo & xxx. ætatis quinto & xl. meruitque inter Diuos referri: vir egregiæ tranquillitatis, placidus, nimis amicis & familiaribus credens; mox etiam vxoribus deditior: qui tamen primis imperij annis ingenti se modestia egerit: familiarium etiam locupletator: neque inhonoros sinens, quorum laboriosa expertus fuisset officia; ad seueritatem tamen propensior, si suspicio imperij moueretur, mitis alias: & cuius in Ciuilibus magis quam in externis bellis sit laudanda fortuna.

Hinc Iulianus rerum potitus est; ingentique apparatu Parthis intulit bellum, cui expeditioni ego quoque interfui. Aliquot oppida & castella Persarum in deditionem accepit, vel vi oppugnauit. Assyriamque populatus, castra apud Ctesiphontem statiuā aliquamdiu habuit: remeansque victor, dum se inconsultius præliis inserit, hostili manu interfectus est, sexto Kalend. Iulias imperii anno septimo, ætatis altero & trigésimo: atque inter Diuos relatus est: vir egregius, & Rempublicam insigniter moderaturus, si per fata licuisset: liberalibus disciplinis apprime eruditus, Græcis doctior; atque adeo, vt Latina eruditione nequaquam cum Græca scientia conueniret:

facun-



facundia ingenti ; promptæ memoriæ & tenacissimæ ; in quibusdam philosopho propior : in amicos liberalis : sed minus diligens quam tantum principem decuit : fuerunt enim nonnulli , qui vulnera gloriæ eius inferrent ; in prouinciales iustissimus : & tributorum , quatenus ferri posset , oppressor : ciuilis in cunctos : mediocrem habens ærarij curam : gloriæ auidus , ac per eam animi plerumque immodici : nimius religionis Christianæ insectator ; perinde tamen vt cruore abstineret. Marco Antonino non absimilis : quem etiam æmulari studebat.

Post hunc Iouianus , qui tunc domesticus militabat , ad obtinendum imperium consensu exercitus electus est , commendatione patris quam sua militibus notior , qui iam turbatis rebus , exercitu quoque inopia laborante , vno à Persis atque altero prælio victus , pacem cum Sapore necessariam quidem , sed ignobilem fecit , multatus finibus , ac nonnulla imperij Romani parte tradita : quod ante eum annis mille centum & duobus-de-viginti fere , ex quo Romanum imperium conditum erat , nunquam accidit. Quinetiam legiones nostræ ita & apud Caudium per Pontium Telesinum , ita & in Hispania apud Numantiam , & in Numidia sub iugum missæ sunt , vt nihil tamen finium traderetur. Ea pacis conditio non penitus reprehendenda foret , si

fœderis necessitatem, cum integrum fuit,  
 mutare voluisset: sicut à Romanis omni-  
 bus his bellis quæ commemoravi, factum  
 est. Nam & Samnitibus, & Numantinis,  
 & Numidis confestim bella illata sunt: ne-  
 que pax rata fuit. Sed dum æmulum im-  
 perij veretur intra Orientem residens, glo-  
 riæ parum consuluit. Itaque iter ingressus,  
 atque Illyricum petens, in Galatiæ finibus  
 repentina morte obiit: vir alias neque in-  
 ers neque imprudens. Multi exanimatum  
 opinantur nimia cruditate: inter cœnan-  
 dum enim epulis indulserat: alij odore cu-  
 biculi, quod ex recenti tectorio calcis, gra-  
 ue quiescentibus erat: quidam nimietate  
 prunarum, quas graui frigore adoleri mul-  
 tas iusserat. Decessit imperij mense septi-  
 mo, quartodecimo Kal. Martias: ætatis,  
 ut qui plurimum ac minimum tradunt, ter-  
 tio & trigésimo anno: ac benignitate prin-  
 cipum qui ei successerunt, inter Diuos rela-  
 tus est; nam & ciuilitati propior, & na-  
 tura admodum liberalis fuit. Is status erat  
 Romanæ rei, Iouiano eodem & Varronia-  
 no Consulibus, anno Urbis conditæ millesi-  
 mo centesimo & nonodecimo. Quia autem  
 ad inclytos principes venerandosque per-  
 uentum est, interim operi modum dabimus.  
 Nam reliqua stylo maiore dicenda sunt:  
 quæ nunc non tam prætermittimus, quam ad  
 maiorem scribendi diligentiam reseruamus.

F I N I S.

SEXT. AVRELII  
VICTORIS  
DE  
VIRIS ILLUSTRIBVS  
VRBIS ROMÆ  
LIBER.



SENT AVERTIT

VICTORIS

DE

VERIS LEVSTIBVS

VERIS ROMA

LIBE



SEX. AVR. VICTORIS  
DE  
VIRIS ILLVSTRIBVS  
VRBIS ROMÆ  
LIBER.

---

C A P. I.

*Proca Rex Albanorum.*

**P**ROCA rex Albanorum Amulium,  
& Numitorem filios habuit, quibus  
regnum annuis vicibus habendum re-  
liquit, & ut alternis imperarent: sed Amu-  
lius fratri imperium non dedit: &, ut cum  
sobole primaret, Rheam Siluiam filiam eius  
Vestæ sacerdotio præfecit: ut virginitate  
perpetua teneretur: quæ à Marte compres-  
sa, Romulum & Remum edidit. Amulius  
ipsam in vincula compegit: paruulos in  
Tiberim abiecit: quos aqua in sicco reli-

quit. Ad vagitum lupa accurrit, eosque vberibus suis aluit : Mox Faustulus pastor collectos Accæ Laurentiæ coniugi educandos dedit. Qui postea, Amulio interfecto, Numitori auctore regnum restituerunt, ipsi pastorebus adunatis ciuitatem condiderunt; quam Romulus augurio victor, quod ipse XII. Remus VI. vultures viderat, Romam vocauit : & vt eam prius legibus, quam mœnibus munitet; edixit ne quis vallum transili- ret : quod Remus irridens, transiit, & à Fabio Celere centurione rutro fertur occisus.

*Romulus Romanorum rex I.*

ROMVLVS asylum conuenis patefecit, & magno exercitu facto, cum videret coniugia deesse, per legatos à finitimis ciuitatibus petiit. Quibus negatis, ludos Consualia simulauit : ad quos cum vtriusque sexus multitudo venisset, dato suis signo virgines raptæ sunt : ex quibus cum vna pulcerrima cum magna omnium admiratione duceretur, Thalassio eam duci responsum. Quæ nuptiæ quia feliciter cesserunt, institutum est vt omnibus in nuptijs Thalassij nomen inuocaretur. Cum feminas ergo finitimorum Romani rapuissent, primi Caninenses contra eos bellum sum- pserunt. Aduersus quos Romulus processit, & exercitum eorum, ac ducem Acronem



singulari prælio deuicit. Spolia opima Ioui Feretrio in Capitolio consecrauit. Antemnates, Crustumini, Fidenates, Veientes, Sabini etiam ob raptas bellum aduersus Romanos sumpserunt. Et cum Romæ appropinquarent Tarpeiam virginem nacti, quæ aquæ, causa sacrorum, hauriendæ descenderat, ei T. Tatius optionem muneri dedit, si exercitum suum in Capitolium produxisset: Illa petijt quod illi in sinistris manibus gerebant, videlicet annulos & armillas, quibus dolose repromissis, Sabinos in arcem perduxit, vbi Titus scutiscam obrui præcepit, nam & ea in læuis habuerant. Romulus aduersus Tatium, qui montem Tarpeium tenebat, processit, & in eo loco vbi nunc Romanum forum est, pugnam conseruit: ibi Hostus Hostilius fortissime dimicans cecidit: cuius interitu consternati Romani fugere cœperunt. Tunc Romulus Ioui Statori ædem vouit, & exercitus seu forte, seu diuinitus, restitit. Tunc raptæ in medium processerunt: & hinc patres inde coniuges deprecata, pacem conciliarunt. Romulus fœdus percussit, & Sabinos in Urbem recepit: populum à Curiis oppido Sabinorum, Quirites vocauit. Centum Senatores, à pietate Patres appellauit. Tres Equitum centurias instituit, quas à suo nomine Ramnenses; à Tito Tatio Tatenses; à Lucumone Luceres appellauit.

Plebem in triginta curias distribuit, easque raptarum nominibus appellavit. Cum ad Capræ paludem exercitum lustraret, nusquam comparuit, vnde inter Patres & Populum seditione orta, Iulius Proculus, vir nobilis, in concionem processit, & iureiurando firmavit, Romulum à se in Quirinali visum augustiore forma, cum ad deos abiret, eundemque præcipere, ut seditionibus abstinerent, virtutem colerent: futurum ut omnium gentium domini existerent. Huius auctoritati creditum est: ædes in colle Quirinali Romulo constituta, ipse pro deo cultus, & Quirinus est appellatus.

*Numa Pompilius Romanorum rex II.*

Post consecrationem Romuli, cum diu interregnum esset, & seditiones orirentur, Numa Pompilius Pomponis filius, Curibus oppido Sabinorum accitus, cum addicentibus auibz Romam venisset, ut populum ferum religione molliret, sacra plurima instituit, ædem Vestæ fecit, virgines Vestales legit; Flamines tres, Dialem, Martialem, Quirinalem: Salios Martis sacerdotes, quorum primus, Præsul vocatur, xii. instituit, Pontificem Maximum creavit. Portas Iano Gemino ædificavit. Annum in xii. menses distribuit, additis Ianuario & Februario, Leges quoque plurimas & vti-

## DE VIRIS ILLVSTR.

tes tulit : omnia quæ gerebat , iussu Egeriæ nymphæ , vxoris suæ , se facere simulans. Ob hanc tantam iustitiam bellum ei nemo intulit. Morbo solutus , in Ianiculo sepultus est , vbi post multos annos arcula cum libris à Terentio quodam exarata : qui libri quia leueis quasdam sacrorum causas continebant , ex auctoritate Patrum cremati sunt.

### *Tullus Hostilius Romanorum rex III.*

Tullus Hostilius , quia bonam operam aduersum Sabinos nauauerat , rex creatus , bellum Albanis indixit , quod trigeminarum certatione finiuit , & Albam propter perfidiam ducis Metij Fufetij diruit. Albanos Romam transire iussit. Curiam Hostiliam constituit. Montem Cœlium Vrbi addidit. Et dum Numam Pompilium sacrificijs imitatur , Ioui Elicio litare non potuit ; fulmine ictus cum regia conflagrauit.

### *Horatij & Curiatij.*

Quum inter Romanos & Albanos bellum fuisset exortum , ducibus Hostilio & Fufetio , placuit rem paucorum certatione finire. Erant apud Romanos trigemini Horatij , tres apud Albanos Curiatij : quibus fœdere icto concurrentibus , statim duo



Romanorum ceciderunt, tres Albanorum vulnerati. Vnus Horatius, quamuis integer, quia tribus impar erat, fugam simulauit, & singulos per interualla, vt vulnerrum dolor patiebatur, insequentes, interfecit; Et cum spolijs onustus rediret, sororem obuiam habuit, quæ viso paludamento sponsi sui, qui vnus ex Curiatjs erat, flere cœpit: frater eam occidit. Quare apud Duumviros condemnatus, apud populum prouocauit: vbi patriis lacrymis condonatus, ab eo expiandi gratia sub tigillum missus, quod nunc quoque viæ suppositum, Sororium appellatur.

*Metius Fufetius.*

Metius Fufetius dux Albanorum, cum se inuidiosum apud ciueis videret, quod bellum sola trigeminorum certatione finisset, vt rem corrigeret, Veientes & Fidenares aduersum Romanos incitauit. Ipse ab Tullo in auxilium arcessitus, aciem in collem subduxit, vt fortunam belli experiretur ac sequeretur. Qua re Tullus intellecta, magna voce ait, suo illud iussu Metium facere. Quare hostes territi victique sunt. Postera die Metius cum ad gratulandum Tullo venisset, iussu ipsius quadrigis religatus, & in diuersa distractus est.

*Ancus Marcius Romanorum rex IV.*

Ancus Marcius Numæ Pompilij ex filia nepos, æquitate & religione aucto similis, Latinos bello domuit: Auentinum & Ianiculum monteis Vrbi addidit: Noua moenia oppido circumdedit. Siluas ad vsum nauium publicauit. Salinarum vectigal instituit. Carcerem primus ædificauit. Ostiam coloniam, maritimis comitatibus opportunam, in ostia Tiberis deduxit. Ius Faciale, quo legati ad res repetundas uerentur, ab Æquicolis transtulit: quod primus fertur Rhesus extogitasse. His rebus intra paucos dies confectis, immatura morte præreptus, non potuit præstare, qualem promiserat, regem.

*L. Tarquinius Priscus Romanorum rex V.*

Lucius Tarquinius Priscus, Damarati Corinthij filius, eius qui Cypseli tyrannidem fugiens, in Etruriam commigravit, ipse Lucumo dictus, vrbe Tarquinij profectus Romam petijt. Aduenienti aquila pileum sustulit: & cum alte subuolasset, reposuit, Tanaquil coniux, auguriorum perita, regnum ei portendi intellexit. Tarquinius pecunia & industria dignitatem, atque etiam Anci regis familiaritatem

## SEX. AVR. VICTORIS

consecutus est : à quo tutor liberis relictus, regnum interceptit, & ita administravit, quasi iure adeptus fuisset. Centum Patres in Curiam legit, qui minorum gentium sunt appellati. Equitum centurias numero duplicavit : nomina mutare non potuit, Accij Nauij auguris auctoritate deterritus, qui fidem artis suæ nouacula & cote firmavit. Latinos bello domuit. Circum Maximum ædificavit. Ludos Magnos instituit. De Sabinis & Priscis Latinis triumphavit. Murum lapideum vrbi circumdedit. Filium xiii. annorum, quod in prælio hostem percussisset, prætexta & bulla donavit : vnde hæc ingenuorum puerorum insignia esse cœperunt. Post ab Anci liberis, immixtis percussoribus, per dolum regia excitus & interfectus est.

### *Seruius Tullius Romanorum rex VI.*

Seruius Tullius P. Corniculani, & Ocrisæ captivæ filius, cum in domo Tarquinij Prisci educaretur, flammæ species caput eius amplexa est. Hoc viso Tanaquil summam ei dignitatem portendi intellexit. Coniugi suavit ut ita eum, ut liberos suos, educaret. Cumque adoleuisset, gener à Tarquinio assumptus est : Et cum rex occisus esset, Tanaquil ex altiore loco ad populum despiciens, ait Priscum Tarqui-



nium graui quidem, sed non lethali vulnere accepto, petere vt interim dum conualefcit, Seruio Tullio dicto audientes essent. Seruius Tullius quasi precario regnare cœpit: sed recte imperium administrauit. Etruscos sæpe domuit: collem Quirinalem & Viminalem & Esquilias Vrbi addidit; Aggerem, fossasque fecit. Populum in quatuor tribus distribuit, ac post plebi distribuit annonam: mensuras, pondera, classes, centuriasque constituit. Primus omnium censum ordinauit, qui adhuc per orbem terrarum incognitus erat. Latino- rum populis persuasit, vt exemplo eorum qui Dianæ Ephesiæ ædem fecissent, & ipsi ædem Dianæ in Auentino ædificarent: Quo facto, bos cuidam Latino miræ magnitudinis nata, & responsum somnio datum, cum populum summam imperij habiturum, cuius ciuis bouem illam immolasset. Latinus bouem in Auentinum egit, & caussam sacerdoti Romano exposuit. Ille callidus, dixit prius cum viuo flumine manus abluere debere. Latinus dum ad Tiberim descendit, sacerdos bouem immolauit. Ita imperium ciuibus, sibi gloriam facto consilioque vindicauit.

*Tullia.*

Seruius Tullius filiam alteram se rocem

mitem alteram habens, cum Tarquinij Prisci filios pari animo videret, vt omnium mentes morum diuersitate leniret, ferocem miti, mitem feroci in matrimonium dedit. Sed mites seu forte, seu fraude perierunt; feroces morum similitudo coniunxit. Statim Tarquinius Superbus à Tullia incitatus, aduocato Senatu regnum paternum repetere cœpit. Qua re audita Seruius, dum ad Curiam properat, iussu Tarquinij gradibus deiectus, & domum refugiens, interfectus est. Tullia in forum properauit, & prima coniugem regem salutauit, à quo iussa è turba decedere, cum domum rediret, viso patris corpore, mulionem euitantem, super ipsum corpus carpentum agere præcepit: vnde vicus ille, Sceleratus dictus est. Postea Tullia cum coniuge in exilium acta.

*Tarquinius Superbus Romanorum rex VII.*

Tarquinius Superbus cognomen moribus meruit. Occiso Seruio Tullio regnum scelestè occupauit: tamen bello strenuus, Latinos Sabinosque domuit; Sueciam Potmetiam Volscis eripuit: Gabios per Sextum filium, simulato transfugio, in potestatem redegit: & ferias Latinas primus instituit. Locos in Circo, & Cloacam Maximam fecit, vbi totius populi viribus vsus

est, vnde illæ fossæ, Quiritium sunt dictæ. Cum Capitolium inciperet, caput hominis inuenit: vnde cognitum est, eam urbem caput gentium futuram: & cum in obsidio Ardeæ filius eius Lucretiæ stuprum intulisset, cum eo in exilium actus, ad Porsennam Etruriæ regem confugit: cuius ope regnum retinere tentauit. Pulsus, Cumas concessit: vbi per summam ignominiam reliquum vitæ tempus exegit.

*L. Tarquinius Collatinus, & Lucretia vxor.*

Tarquinius Collatinus, sorore Tarquinij Superbi genitus, in contubernio iuuenum regionum Ardeæ erat: vbi cum forte in liberiore conuiuio coniugem suam vnusquisque laudaret, placuit experiri. Itaque equis Romam petunt. Regias nurus in conuiuio & luxu deprehendunt, exinde Collatiam petunt; Lucretiam inter ancillas in Ianificio offendunt, itaque ea pudicissima iudicatur. Ad quam corrumpendam Tarquinius Sextus nocte Collatiam rediit, & iure propinquitatis in domum Collatini venit, & in cubiculum Lucretiæ irrupit, pudicitiam expugnauit. Illa postero die aduocatis patre & coniuge, rem exposuit, & se cultro, quem veste texerat, occidit. Illi in exitium regum coniurarunt, eorumque exilio necem Lucretiæ vindicauerunt.



*Iunius Brutus I. Romanorum Consul.*

L. Iunius Brutus sorore Tarquinij Superbi genitus, cum eandem fortunam timeret in quam frater iuciderat, qui ob diuitias & prudentiam fuerat ab auunculo occisus, stultitiam finxit, vnde Brutus dictus. Iuuenibus regiis Delphos euntibus deridiculi gratia comes adscitus, baculo sambuceo aurum infusum Deo donum tulit. Vbi responsum est, cum Romæ summam potestatem habiturum, qui primus matrem oscularetur: ipse terram osculatus est. Deinde propter Lucretiæ stuprum, cum Tricipitino & Collatino in exitium regum coniurauit. Quibus in exsilium actis, primus Consul creatus, filios suos, fratrisque, quod cum Aquilijs & Vitellijs ad recipiendum in Urbem Tarquinius coniurauerant, virgis cæsos securi percussit. Deinde in prælio, quod aduersus eos gerebat, singulari certamine cum Arunte filio Tarquinij congressus est, vbi ambo mutuis vulneribus ceciderunt. Cuius corpus in foro positum, à collega laudatam, matronæ anno luxerunt.

*Horatius Cocles.*

Porfenna rex Etruscorum, cum Tarqui-

nios in urbem restituere tentaret, & primo impetu Ianiculum cepisset: Horatius Cocles illo cognomine, quod in alio prælio oculum amiserat, pro ponte Sublicio stetit, & aciem hostium solus sustinuit, donec pons à tergo interromperetur, cum quo statim in Tiberim decidit, & armatus ad suos transnavit. Ob hoc ei tantum agri publice datum est, quantum vno die circumarari potuisset: statua quoque ei in Vulcanali posita.

*Mutius Scauola.*

Cum Porsenna rex Urbem obsideret, Mutius Cordus vir Romanæ constantiæ, Senatum adiit & veniam transfugiendi petiit, necem regis repromittens. Accepta potestate, in castra Porsennæ venit, ibique purpuratum pro rege, deceptus, occidit. Apprehensus & ad regem pertractus, dexteram aris imposuit: hoc supplicij à re exigens, quod in eade peccasset. Vnde cum misericordia regis abstraheretur, quasi beneficium referens, ait, trecentos aduersus eum simileis coniurasse. Qua re ille territus, bellum acceptis obsidibus deposuit. Murio prata trans Tiberim data, ab eo Muria appellata. Statua quoque ei honoris gratia constituta est.

*Clælia virgo,*

Porsenna Clæliam virginem nobilem inter obsides accepit : quæ deceptis custodibus, noctu castris eius egressa, equum quem fors dederat, arripuit & Tiberim traiecit. A Porsenna per legatos repetita & reddita. Cuius ille virtutem admiratus, cum quibus optasset, in patriam redire permisit : illa virgines puerosque elegit, quorum ætatem iniuriæ obnoxiam sciebat. Huic statua equestris in foro posita.

*Fabij trecentisex.*

Romani cum aduersum Veientes bellarent, eos sibi hosteis familia Fabiorum priuato nomine depoposcit, & profecti trecentisex, duce Fabio Consule, fuerunt. Cum sæpe victores exstitissent, apud Cremeram fluuium castra posuerunt. Veientes ad dolos conuersi, pecora ex aduerso in conspectu illorum posuerunt : ad quæ progressi Fabij, in insidias delapsi, ad vnum occisione perierunt. Dies, quo id factum est, inter nefastos relatus. Porta qua profecti fuerant, Scelerata est appellata. Vnus ex ea gente propter impuberem ætatem domi relictus, genus propagauit ad Q. Fabium Maximum, qui Annibalem mora fregit, Cunctator ab ob trectatoribus dictus.



*P. Valerius Poplicola.*

Publius Valerius, Volusi filius, primum de Veientibus, iterum de Sabinis, tertio de vtrisque gentibus triumphauit. Hic, quia in locum Bruti collegæ Consulem non subrogauerat, & domum in Velia tutissimo loco habebat, in suspicionem regni affectati venit. Quo cognito, apud populum questus, quod de se tale aliquid timuissent; immisit qui domum suam diruerent. Secures etiam fascibus dempsit, eosque in populi concione submisit. Legem de prouocatione à magistratibus ad populum tulit; hinc Poplicola dictus. Qui cum quater Consul diem obiisset, adeo pauper exstiterit vt collectis à populo nummis publice sepultus sit, & annuo matronarum luctu honoratus.

*A. Posthumus.*

Tarquinius eiectus, ad Mamilium Tullulanum generum suum confugit, qui cum Latio concitato Romanos grauitè vrgeret, A. Posthumus Dictator dictus, apud Rhegilli lacum cum hostibus conflixit. Vbi cum victoria nutaret, Magister Equitum equis frenos detrahi iussit, vt irrenocabili impetu ferrentur: vbi & aciem Latinorum

fuderunt & castra ceperunt. Sed inter eos duo iuvenes candidis equis insigni virtute apparuerunt, quos Dictator quæsitos ut dignis muneribus honoraret, non reperit: Castorem & Pollucem ratus, ædem communi titulo dedicauit.

*L. Quinctius Cincinnatus.*

Lucius Quinctius Cincinnatus filium Kæsonem petulantissimum abdicauit; qui & à Cenforibus notatus, ad Volscos & Sabinos confugit, qui duce Clælio Graccho bellum aduersum Romanos gerebant, & Q. Minucium Consulem in Algido monte cum exercitu obsidebant. Quinctius Dictator dictus; ad quem missi legati, nudum eum arantem trans Tiberim offenderunt: qui insignibus sumptis Consulem obsidio liberauit. Quare & à Minucio & eius exercitu obsidionali corona donatus est. Vicit hosteis: ducem eorum in dedicationem accepit & triumphi die ante currum egit. Sextodecimo die Dictaturam, quam acceperat, deposuit: & ad agriculturam reuersus est. Iterum post viginti annos Dictator dictus, Spurium Mælium regnum affectantem, à Seruilio Ahala Magistro equitum occidi iussit. Domum eius solo æquauit: vnde locus ille Æquimælium dictus.

*Menenius Agrippa Lanatus.*

Menenius Agrippa, cognomento Lanatus, dux electus aduersum Sabinos de iis triumphauit. Et cum Populus à Patribus secessisset, quod tributum & militiam non toleraret, nec reuocari posset; Agrippa apud eum, Olim, inquit, humani artus cum ventrem otiosum cernerent, ab eo discordarunt, & suum illi ministerium negarunt. Cum eo pacto & ipsi deficerent, intellexerunt ventrem acceptos cibos per omnia membra differere: & cum eo in gratiam redierunt. Sic Senatus & Populus quasi vnum corpus discordia pereunt; concordia valent. Hac fabula populus regressus est. Creauit tamen Tribunos plebis, qui libertatem suam aduersum nobilitatis superbiam defenderent: Menenius autem tanta paupertate decessit, vt eum Populus collatis quadrantibus sepeliret, locum sepulcro Senatus publicè daret.

*C. Marcius Coriolanus.*

Caius Marcius, à captis Coriolis vrbe Volscorum Coriolanus dictus: ob egregia militiæ facinora à Posthumio optionem inunerum accipiens, equum tantum & hospitium sumpsit, virtutis & pietatis exemplum.



## SEX. AVR. VICTORIS

Hic Consul, graui annona, aduectum è Sicilia frumentum magno pretio dandum Populo curauit; vt hac iniuria plebs agros, non seditiones coleret. Ergo à Tribuno pleb. Decio die dicta, ad Volscos concessit; eosque duce Attio Tullo aduersus Romanos concitauit, & ad quartum ab Vrbe lapidem castra posuit. Cumque nullis ciuium legationibus flecteretur, à Veturia matre, & Volumnia vxore matronarum numero comitatis, motus, omissio bello, vt proditor occisus est. ibi templum Fortunæ Muliebri constitutum est.

### *C. Licinius Stolo.*

Fabius Ambustus ex duabus filiabus alteram Licinio Stoloni plebeio, alteram Aulo Sulpicio patricio coniugem dedit: quarum plebeia cum sororem saluaret, cuius vir Tribunus militum consulari-potestate erat, fasces lictorios foribus appositos indecenter expauit, à sorore irrita, marito quæsta est: qui adiuuante socero, vt primum Tribunatum plebis aggressus est, legem tulit, vt alter Consul ex plebe crearetur. Lex, resistente Appio Claudio, lata tamen: & primus Licinius Stolo Consul factus. Idem lege sanciuir, ne cui plebeio plus quingenta iugera agri habere liceret. Et ipse cum iugera quingenta haberet, &

altera emancipati filij nomine possideret , in iudicium vocatus , & primus omnium sua lege punitus est.

*L. Virginius Centurio.*

Populus Romanus cum seditiosos magistratus ferre non posset , Decemviros legibus scribendis creauit , qui eas ex libris Solonis tralatas , duodecim Tabulis exposuerunt. Sed cum pacto dominationis magistratum sibi prorogarent ; vnus ex ipsis Appius Claudius Virginiam Virginij Centurionis filiam , in Alcido militantis admauit : quam cum corrumpere non posset , clientem subornaui , qui eam in seruitutem deposceret ; facile victurus , cum ipse esset & accusator , & iudex. Pater , re cognita , cum ipso die iudicij superuenisset , & filiam iam addictam videret , vltimo eius adloquio impetrato , eam in secretum abduxit , & occidit : corpus eius humeris gerens ad exercitum profugit , & milites ad vindicandum facinus accendit : qui creatis decem Tribunis , Auentinum occuparunt , Decemviros abdicare se magistratu coegerunt , eosque omnes aut morte aut exsilio punierunt. Appius Claudius in carcere necatus est.

*Æsculapius Romam aduectus.*

Romani ob pestilentiam responso monente, ad Æsculapium Epidauro arcessendum decem legatos principe Q. Ogulnio miserunt. Qui cum eo venissent, & simulacrum ingens mirarentur, anguis è sedibus suis elapsus, venerabilis, non horribilis, per mediam urbem cum admiratione omnium ad naucm Romanorum perrexit, & se in Ogulnij tabernaculo conspirauit. Legati Deum vehentes, Antium prouecti sunt, vbi per mollitiem maris, anguis proximum Æsculapij fanum petijt, & post paucos dies ad nauim rediit: & cum aduerso Tiberi subueheretur, in proximam insulam desiliuit, vbi templum ei constitutum: & pestilentia mira celeritate sedata est.

*M. Furius Camillus.*

Furius Camillus cum Faliscos obsideret, ac ludi litterarij magister principum filios ad eum adduxisset, vinctum cum iisdem pueris in urbem redigendum & verberandum tradidit. Statim Falisci se ei ob tantam iustitiam dediderunt. Veios decenni obsidio domuit, deque his triumphauit. Postmodum est crimini datum, quod albis equis triumphasset, & prædam inique di-



nississet die dicta ab D. Apuleio Tribuno plebis, damnatus; Ardeam concessit. Mox cum Galli Senones relictis ob sterilitatem agris suis, Clusium Etruriæ oppidum obsiderent, missi sunt Roma tres legati, qui Gallos monerent, ut ab oppugnatione desisterent. Ex his vnus contra ius gentium in aciem processit, & ducem Senonum interfecit. Quo commoti Galli, petitis in deditionem legatis, nec impetratis, Romam petierunt, & exercitum Romanum apud Alliam fluuium ceciderunt, die xvi. Kalend. Augusti, qui dies inter nefastos relatus, Alliensis dictus. Victores Galli Urbem intrauerunt, vbi nobilissimos senum in curulibus & honorum insignibus, primo ut deos venerati, deinde ut homines despicati, interfecere. Reliqua iuuentus cum Manlio in Capitolium fugit, vbi obsessa, Camilli virtute liberata est; qui absens Dictator dictus, collectis reliquiis, Gallos improuisos interneccione occidit. Populum Romanum migrare Veios volentem retinuit. Sic & oppidum ciuibus & ciueis oppido reddidit.

*M. Manlius Capitolinus.*

Manlius ob defensum Capitolium Capitolinus dictus, sedecim annorum voluntarium militem se obtulit. Triginta se-

ptem militaribus donis à suis ducibus ornatus, triginta treis cicatrices in pectore habuit. Capta Vibe auctor in Capitolium confugiendi fuit. Quadam nocte clangore anseris excitus, Gallos ascendentes deiecit. Patronus à ciuibus appellatus, & farre donatus est. Domum etiam in Capitolio publice accepit. Qua superbia elatus, cum à Senatu suppressisse Gallicos thesauros argueretur, & addictos propria pecunia liberaret, regni affectati suspicione in carcerem coniectus, Populi consensu liberatus est. Rursus cum in eadem culpa, & grauius perseueraret, reus factus, & ab conspectu Capitoli ampliatus est. Alio deinde loco damnatus, & de saxo Tarpeio præcipitatus: Domus diruta: bona publicata. Gentilitas eius Manlij cognomen ciurauit, nequis postea Capitolinus vocaretur.

*A. Cornelius Cossus.*

Fidenates [Fidei] Romanorum hostes, vt sine spe veniæ fortius dimicarent, legatos ad se missos interfecerunt: ad quos Quinctius Cincinnatus Dictator missus Magistrum equitum habuit Cornelium Cossum, qui Lartem Tolumnium ducem sua manu interfecit. De eo spolia opima Ioui Feretrio secundus ab Romulo consecrauit.

*P. Decius pater.*

P. Decius Mus bello Samnitico sub Valerio Maximo & Cornelio Cossio Consulibus Tribunus militum exercitu in angustiis Gauri montis insidiis hostium clauso, accepto, quod postulauerat, præsidio, in superiorem locum euasit: hosteis terruit. Ipse intempesta nocte per medias custodias somno oppressas incolumis euasit. Ob hoc ab exercitu ciuica corona, de quercu, quæ dabatur ei qui ciueis in bello seruasset, obsidionali, quæ dabatur ei qui obsidione ciueis liberasset, donatus est. Consul bello Latino, collega Manlio Torquato, positus apud Velerim fluium castris, cum utrique Consuli somnio obuénisset, eos victores futuros, quorum dux in prælio cecidisset, Tum collato cum collega somnio, cum conuenisset, ut cuius cornu in acie laboraret, dijs se Manibus voueret, inclinante sua parte, se & hosteis per Valerium Pontificem dijs Manibus deuouit, & impetu in hosteis facto, victoriam suis reliquit.

*P. Decius filius.*

Publius Decius Decij filius, primo Consul de Samnitibus triumphans, spolia ex



his Cereri consecrauit. Iterum & tertio Consul, multa domi militiæque gessit. Quarto Consularu cum Fabio Maximo, cum Galli, Samnites, Umbri, Tusci contra Romanos conspirassent: ibi exercitu in aciem educto, & cornu inclinante exemplum patris imitatus, aduocato Marco Liuiio pontifice, hastæ insists & solennia verba respondens, se & hostes diis Manibus deuouit. Imperu in hostes facto, victoriam suis reliquit. Corpus à collega laudatum, magnifice sepultum est.

*T. Manlius Torquatus.*

Titus Manlius Torquatus ob ingenij & linguæ tarditatem à patre rus relegatus, cum audisset ei diem dictam à Pompeio Tribuno plebis, nocte Urbem petiit: Secretum colloquium à Tribuno impetrauit, & gladio stricto dimittere eum accusationem terrore multo compulit. Sulpicio Dictatore Tribunus militum Gallum prouocatore occidit. Torquem ei detractum, ceruici suæ indidit. Consul bello Latino filium suum, quod contra imperium pugnasset, securi percussit. Latinos apud Verim fluuium, Decij collegæ deuotione superauit. Consulatū recusauit, quod diceret neque se Populi vitia, neque illum seueritatem suam posse susterre.

*M. Valerius Corvinus.*

Reliquias Senonum Camillus persequeretur. aduersum ingentem Gallum provocatorem solus Valerius Tribunus militum, omnibus territis, processit. coruus ab ortu solis galeæ eius inleat, & inter pugnandum ora oculosque Galli verberavit. Hoste deuicto, Valerius Corvinus dictus. Hinc, cum ingens multitudo ære alieno oppressa, Capuam occupare tentasset, & ducem sibi Quinctium necessitate compulsum fecisset, sublato ære alieno, seditionem compressit.

*Sp. Posthumius.*

Titus Veturius, & Spurius Posthumius Consules bellum aduersum Samnites gerentes, à Pontio Thelesino duce hostium in insidias inducti sunt: nam ille simulatos transfugas misit, qui Romanos docerent, Luceriam Apulam à Samnitibus obsideri, quo duo itinera ducebant, aliud longius & tutius, aliud breuius & periculosius: Festinatio breuius elegit. Itaque cum in insidias venissent, qui locus Furculæ Caudinæ vocabatur, C. Pontius accitum patrem Herennium rogauit, quid fieri placeret. Ille ait, aut omneis occidendos, vt vires

frangerentur; aut omnes dimittendos, ut beneficio obligarentur. Vtroque improposito consilio, omnes sub iugum misit, icto fœdere, quod à Romanis postea improbatum est. Posthumius Samnitibus deditus, nec receptus.

*L. Papirius Cursor.*

Lucius Papirius, à velocitate Cursor, cum Dictatorem se aduersis omnibus contra Samnites profectum esse sensisset, ad auspicia repetenda Romam regressus, edixit Fabio Rulliano, quem exercitui imponebat, ne manum cum hoste consereret. Sed ille opportunitate ductus, pugnavit. Reuersus Papirius securi eum ferire voluit: ille in Urbem confugit, nec supplicem Tribuni tuebantur. Dein pater lacrymis, Populus precibus veniam impetrarunt. Papirius de Samnitibus triumphauit. Idem comis & iocorum studiosus, cum Prænetinum Prætorem grauissime increpuisset, Expedi, inquit, licitor, secures; Et cum eum metu mortis attonitum vidisset; incommodam ambulanti bus radicem excindi iussit.

*Q. Fabius Rullianus.*

Quinctus Fabius Rullianus, primus ex ea familia ob virtutem Maximus: Magi-



ster equitum à Papirio Cursore ob Samnitum victoriam securi pæne percussus, primum de Apulis & Lucerinis; iterum de Samnitibus; tertio de Gallis, Vmbris, Marſis, atque Tuscis triumphauit. Censor libertinos tribu mouit. Iterum Censor fieri noluit, dicens non esse ex vsu Reipublicæ eosdem, Censores sæpius fieri. Hic primus instituit, vti Equites Romani Idibus Quinctilibus ab æde Honoris, albis equis insidentes in Capitolium transfirent. Mortuo huic tantum æris Populi liberalitate congestum est, vt inde filius viscerationem & epulum publice daret.

*Manius Curius Dentatus.*

Manius Curius Dentatus primo de Samnitibus triumphauit, quos vsque ad mare Superum perpacauit; Regressus, in concione ait: Tantum agri cepi, vt solitudo futura fuerit, nisi tantum hominum cepissem; tantum porro hominum cepi, vt fame perituri fuerint, nisi tantum agri cepissem. Iterum de Sabinis triumphauit. Tertio de Lucanis ouans Urbem introiuit. Pýrrhum Epeirotam Italia expulit. Quaterna dena agri iugera viritim populo diuisit. Sibi deinde toridem constituit, dicens neminem esse debere ciuem, cui non tantum sufficeret. Legatis Samnitum au-

rum offerentibus, cum ipse in foco rapa torreret: Malo, inquit, hæc in fictilibus meis esse, & aurum habentibus imperare. Cum interuersæ pecuniæ argueretur, guttum ligneum, quo uti ad sacrificia consueuerat, in medium protulit, iurauitque se nihil amplius de præda hostili in domum suam conuertisse. Aquam Anienem de manubijs hostium in Urbem induxit. Tribunus plebis Patres auctores fieri coëgit comitiis, quibus plebeius magistratus creabatur. Ob hæc merita domus ei apud Tiphatham, & agri iugera quingenta publice data.

*Appius Claudius Cæcus.*

Appius Claudius Cæcus in Censura libertinos quoque in Senatum legit, epulandi decantandique ius tribicinibus in publico ademit. Duæ familiæ ad Herculis sacra sunt destinatæ, Potitiorum & Pinariorum. Potitios Herculis sacerdotes pretio corrumpit, ut sacra Herculeæ seruos publicos edocerent: vnde cæcatus est: gens Potitiorum funditus periit. Ne Consulatus cum plebeiis communicaretur, acerrime restitit. Ne Fabius solus ad bellum mitteretur contradixit. Sabinos, Samnites, Etruscos bello domuit. Viam usque Brundisium lapide strauit: vnde illa Appia dicta. Aquam Anienem in Urbem induxit. Censuram

solus omni quinquennio obtinuit. Cum de pace Pyrrhi ageretur, & gratia potentum per legatum Cineam pretio quæreretur: senex & cæcus lectica in Senatum latus, turpissimas condiciones magnifica oratione discussit.

*Pyrrhus rex Epeirotarum.*

Pyrrhus rex Epeirotarum, paterno genere ab Achille, materno ab Hercule oriundus, cum imperium orbis agitaret, & Romanos potenteis videret, Apollinem de bello consuluit. Ille ambigue respondit:

*Aio te, Æacida, Romanos vincere posse.*

Hoc dicto in voluntatem tracto, auxilio Tarentinorum bellum Romanis intulit: Læuinum Consulem apud Heracleam elephantorum nouitate turbauit. Cumque Romanos aduersis vulneribus occisos videret, Ego, inquit, talibus viris breui orbem terrarum subigere potuissem. Amicis gratulantibus, Quid mihi cum tali victoria, inquit, vbi exercitus robur amittam? Ad vicesimum ab Vrbe lapidem castra posuit: Captiuos Fabricio gratis reddidit. Viso Læuini exercitu, eandem sibi ait aduersus Romanos, quam Herculi aduersus Hydram, fuisse fortunam, A Curio & Fabricio su-



peratus, Tarentum refugit, in Siciliam traiecit. Mox in Italiam Locros regressus, pecuniam Proserpinæ auferre tentauit : sed ea naufragio relata est. Tum in Græciam regressus, dum Argos oppugnat, ictu regulæ prostratus est. Corpus ad Antigonom regem Macedoniae delatum magnifice sepultum.

*Fabritius.*

Pyrrhus cum secundo prælio à Romanis esset pulsus Tarentum, interiecto anno contra Pyrrhum Fabritius missus est : qui prius inter legatos sollicitari non potuerat quarta regni parte promissa. Cum vicina castra ipse, & rex haberent, medicus Pyrrhi nocte ad eum venit, promittens se Pyrrhum veneno occisurum, si sibi quidquam pollicitaretur : Quem Fabritius vinctum reduci iussit ad dominum ; Pyrrhoque dici, quæ contra caput eius medicus spondisset. Tum rex admiratus eum, dixisse fertur ; Ille est Fabritius, qui difficilius ab honestate, quam Sol à suo cursu auerti posset.

*Decius Mus.*

Volsinij, Etruriæ nobile oppidum, luxuria pæne perierunt : Nam cum temere ser-

uos manumitterent, dein in curiam legerent, consensu eorum oppressi, cum multa indigna paterentur, clam Roma auxilium petierunt; Missusque Decius Mus mox libertinos omneis superavit, in carcere necavit, aut dominis in servitutem restituit.

*Appius Claudius Caudex.*

Appius Claudius victis Volfiniensibus, cognomento Caudex dictus, frater Cæci fuit. Consul ad Mamertinos liberandos missus est, quorum arcem Carthaginenses & Hiero rex Syracusanus obsidebant. Primo ad explorandos hosteis fretum piscatoria naue traiecit, & cum duce Carthaginensium egit ut præsidium arce deduceret. Rhegium regressus, quinquagemam hostium copijs pedestribus cepit: eâ legionem in Siciliam traduxit. Carthaginenses Messana expulit. Hieronem prælio apud Syracusas in deditiōem accepit: qui eo periculo territus, Romanorum amicitiam petijt, iisque postea fidiſſimus fuit.

*C. Duilius.*

Caius Duilius primo Punico bello dux contra Carthaginenses missus, cum videret eos multum mari posse, classem validam fabrefecit: & quos coruos vocauere,

manus ferreas cum irrisu hostium primus instituit, quibus inter pugnandum hostium naueis xxx. apprehendit, xlii. merfit: qui victi & capti sunt. Annibal dux classis, Carthaginem fugit, & à Senatu quæsiuit: quid faciendum censerent. Omnibus, ut pugnaret, acclamantibus: Feci, inquit, & victus sum: sic pœnam crucis effugit. Nam apud Pœnos dux male re gesta puniebatur. Duilio concessum est, ut prælucente funali, & præcinente tibicine à cœna publice rediret.

*A. Atilius Calatinus.*

Atilius Calatinus dux Romanorum aduersus Carthaginienes missus, ex maximis & munitissimis ciuitatibus, Enna, Drepano, Lilybæo, hostilia præsidia deiecit. Panorum cepit. Totam Siciliam peruagatus, paucis nauibus magnam hostium classem, duce Amilcare, superauit. Sed cum ad Camarinam ab hostibus obsessam festinaret, à Pœnis in angustijs clausus est, ubi Tribunus militum Calpurnius Flammas acceptis trecentis socijs in superiorem locum euasit, Consulem liberauit: ipse cum trecentis pugnans cecidit: postea ab Atilio semianimis inuentus est. Seruatus magnò postea terrori hostibus fuit. Atilius gloriose triumphauit.



*M. Atilius Regulus.*

Marcus Atilius Regulus Consul, fufis Salentinis triumphauit : primusque Romanorum ducum in Africam classem traiecit : ea quassata de Amilcare naueis longas treis & sexaginta accepit. Oppida ducenta, & hominum ducenta millia cepit. Absente eo, coniugi & liberis ob paupertatem sumptus publice dati. Mox arte Xantippi Lacedæmonij mercenarij militis captus in carcerem missus. Legatus de permutandis captiuis Romam missus dato iureiurando, vt si non impetrasset, ita demum rediret; in Senatu conditionem dissuasit : reiectisque à se coniuge & liberis, Carthaginem regressus : vbi in arcam ligneam coniectus, clauis introrsum actis, vigilijs ac dolore punitus est.

*C. Lutatius Catulus.*

Caius Lutatius Catulus primo Punico bello trecentis nauibus aduersum Pœnos profectus, sexcentas eorum naueis com meatibus & alijs oneribus impeditas, duce Annone apud Ægates iusulas, inter Siciliam & Africam, depressit, aut cepit, finemque bello imposuit. Pacem petentibus hac conditione concessit, Sicilia, Sardinia,

& ceteris insulis intra Italiam Africam-  
que decederent : Hispania citra Iberum  
fluvium vt abstinerent.

*Annibal Carthaginienſis dux.*

Annibal Amilcaris filius, nouem annos  
natus, à patre aris admotus, odium in  
Romanos perenne iurauit. Exinde socius  
& miles in castris patris fuit. Mortuo eo  
causſam belli quærens, Saguntum Romanis  
fœderatam intra sex menses euerit. Tum  
Alpibus patefactis, in Italiam traiecit.  
P. Scipionem apud Ticinum, Sëmpronium  
Longum apud Trebiam : Flaminium apud  
Trafimenum : Paullum & Varronem apud  
Cannas superauit. Cumque Vrbem capere  
posset, in Campaniam deuertit, cuius de-  
liciis elanguit. Et cum ad tertium ab Vrbe  
lapidem castra posuisset, tempeſtatibus  
repulſus, primum à Fabio Maximo fractus,  
deinde à Valerio Flacco repulſus, à Grac-  
cho & Marcello fugatus, in Africam re-  
trocatus, à Scipione superatus, ad Antio-  
chum regem Syriæ confugit, eumque ho-  
stem Romanis fecit: quo victo, ad Prusiam  
Bithyniæ regem concessit : vnde Romanâ  
legatione per Titum Flaminium repetitus  
ne Romanis traderetur, hauſto, quod sub  
annuli gemina habebat, veneno, abſumptus  
eſt. poſitus apud Libyſſam in arca lapidea,

in qua hodieque inscriptum est ; ANNIBAL  
HIC SITVS EST.

*Q. Fabius Maximus.*

Quinctus Fabius Maximus Cunctator, Verrucosus à verruca in labris sita, Ovicula à clementia morum dictus : Consul de Liguribus triumphauit. Annibalem mora fregit. Minucium Magistrum Equitum imperio sibi æquari passus est : nihilominus periclitanti subuenit. Annibalem in agro Falerno inclusit. Manlium Statilium transfugere ad hosteis volentem, equo & armis donatis retinuit : & Lucano cuidam fortissimo, ob amorem mulieris infrequenti, eandem emptam dono dedit. Tarentum ab hostibus recepit : Herculis signum inde tralatum in Capitolio dedicauit. De redemptione captiuorum cum hostibus pepigit : quod pactum cum à Senatu improbaretur ; fundum suum ducentis millibus vendidit, & fidei suæ satisfecit.

*P. Scipio Nasica.*

Publius Scipio Nasica, à Senatu vir optimus iudicatus, Matrem deum hospitio recepit. Is cum aduersum auspicia Consullem se à Graccho nominatum comperisset, magistratu se abdicauit. Censor sta-



tuas quas sibi quisque per ambitionem in foro ponebat, sustulit. Consul Delminium Urbem Delmatarum expugnauit. Imperatoris nomen à militibus, & ab Senatu triumphum oblatum recusauit: eloquentia primus, iuris scientia consultissimus, ingenio sapientissimus: vnde vulgo Corculum dictus.

*M. Claudius Marcellus.*

Marcus Marcellus Virдумarum Gallorum ducem singulari prælio fudit. Spolia opima Ioui Feretrio tertius à Romulo consecrauit. Primus docuit quomodo milites cederent, nec terga præberent. Annibalem apud Nolam, locorum angustia adiutus, vinci docuit. Syracusas per treis annos expugnauit. Er cum per calumniâ triumphus ei à Senatu negaretur, de sua sententia in Albano monte triumphauit. Quinques Consul, insidijs Annibalis deceptus occubuit, & magnifice sepultus. Ossa Romam remissa à prædonibus intercepta perierunt.

*Liuiâ Claudia virgo Vestalis.*

Annibale Italiam deuastante, ex responso librorum Sibyllinorum, Mater deûm à Pessinunte arcessita, cum aduerso Tiberi veheretur, repente in alto stetit; & cum

moueri nullis viribus posset, ex libris cognitum, castissimæ demum feminae manu moueri posse. Tum Claudia, virgo Vestalis, falso incestus suspecta, deam orauit, vt si pudicam sciret, sequeretur: & zona imposita nauem mouit. Simulacrum Martis deum, dum templum ædificatur, Natica, qui vir optimus iudicabatur, quasi hospiti datum.

*M. Porcius Cato Censorius,*

Marcus Porcius Cato, genere Tusculanus, à Valerio Flacco Romam sollicitatus: Tribunus militum in Sicilia; Quæstor sub Scipione fortissimus; Prætor iustissimus fuit: in Prætura Sardiniam subegit, vbi ab Ennio Græcis literis institutus. Consul Celtibetos domuit: & ne rebellare possent, literas ad ciuitates singulas misit, vt muros diruerent: cum vnaquæque sibi soli imperari putaret, fecerunt. Syriaco bello Tribunus militum sub M. Acilio Glabrione, occupatis Thermopylarum iugis, præsidium hostium depulit. Censor L. Flaminium Consularem Senatu mouit, quod ille in Gallia, ad cuiusdam scorti spectaculum, eductum quendam è carcere, in conuiuio iugulari iussisset. Basilicam suo nomine primus fecit Matronis, ornamenta erepta Oppia lege, repetentibus,

38      SEX. AVR. VICTORIS  
restitit. Accusator assiduus malorum, Gal-  
bam octogenarius accusauit, ipse quadra-  
gies quater accusatus, gloriose absolutus.  
Carthaginem delendam censuit. Post octo-  
ginta annos filium genuit. imago huius,  
funeris gratia produci solet.

*C. Claudius Nero, & Asdrubal frater  
Annibalis.*

Asdrubal frater Annibalis, ingentibus  
copijs in Italiam traiecit: actumque erat  
de Romano imperio, si iungere se Anni-  
bali potuisset: Sed Claudius Nero, qui in  
Apulia cum Annibale castra coniunxerat,  
relicta in castris parte, cum delectis ad  
Asdrubalem properauit, & se Liuius collegæ  
apud Senam oppidum & Metaurum flumen  
coniunxit: amboque Asdrubalem vicerunt.  
Nero regressus pari celeritate qua iverat,  
caput Asdrubalis ante vallum Annibalis  
proiecit, quo ille viso, vinci se Fortuna  
Carthaginis confessus est. ob hæc Liuius  
triumphans, Nero ouans, urbem introierunt.

*P. Cornelius Scipio Africanus.*

Publius Scipio ex virtutibus cognomi-  
natus Africanus, Iouis filius creditur: nam  
antequam conciperetur, serpens in lecto  
matris eius apparuit, & ipsi paruulo draco



circumfusus, nihil nocuit. In Capitolium intempesta nocte cuncti nunquam canes allatrauerunt; Nec hic quidpiam prius cepit, quam in cella Iouis diutissime sedisset, quasi diuinam mentem acciperet. Decem & octo annorum patrem apud Ticinum singulari virtute seruauit. Clade Cannensi nobilissimos iuuenes, Italiam deserere cupientes, sua auctoritate compescuit. Reliquias incolomes per media hostium castra Canusium perduxit. Viginti quatuor annorum Prætor in Hispaniam missus, Carthaginem Nouam qua die venit, cepit. Virginem pulcerrimam, ad cuius aspectum concurrebatur, ad se vetuit adduci, patrique eius ac sponso restitui iussit. Asdrubalem Magonemque, fratres Annibalis, Hispania expulit: amicitiam cum Syphace Maurorum rege coniunxit. Massanissam in societatem recepit. Victor domum regressus, Consul ante annos factus, concedente collega in Africam classe traiecit. Asdrubalis & Syphacis castra vna nocte perripuit. Reuocatum ex Italia Annibalem superauit. Victis Carthaginiensibus leges imposuit. Bello Antiochi legatus fratri fuit, captum filium gratis recepit. A Petilijs ac Næuio Tribunis plebis repetundarum accusatus, librum rationum in conspectu populi scidit: Hac die, inquit, Carthaginem vici; Bonum factum: in Capitolium ea-

40 SEX. AVC. VICTORIS  
mus, & dijs supplicemus. Inde in voluntarium exsilium concessit & vbi reliquam egit ætatem. Moriens ab vxore petijt, ne corpus suum Romam referretur.

*M. Linius Salinator.*

Linius Salinator, primo Consul de Illyrijs triumphauit: tandem ex inuidia peculatus reus, ab omnibus tribubus, excepta Metia, condemnatus. Iterum cum Claudio Nerone inimico suo Consul, ne Resp. discordia male administraretur, amicitiam cum eo iunxit, & de victo Asdrubale triumphauit. Censor cum eodem collega omneis tribus, excepta Metia, ærarias fecit: stipendio priuauit, eo crimine, quod aut prius se iniuste condemnassent; aut postea tantos honores non recte tribuissent.

*T. Quinctius Flaminius.*

Titus Quinctius Flaminius, Flaminijs, qui apud Trasimenum periit, filius, Consul, Macedoniam sortitus, ducibus Charopis principis pastoribus prouinciam ingressus, regem Philippum prælio fudit, castris exiit. Filium eius Demetrium obsidem accepit: quem pecunia multatum, in regnum restituit. A Nabide quoque Lacedæmonio filium obsidem accepit. Libe-

ros etiam Græcos Nemeæ per præconem pronunciauit. Legatus etiam ad Prusiam, vt Annibalem repeteret, missus.

*M. Fuluius Nobilior.*

Marcus Fuluius Nobilior Prætor Hispanos superauit : vnde ouans Urbem introiit. Consul Ætolos, Ambraciorasque, qui bello Macedonico Romanis adfuerant, post ad Antiochum defecerant, prælijs frequentibus victos, & in Ambraciam oppidum coactos, in deditiōem accepit : tantum signis tabulisque pictis spoliauit : de quibus triumphauit. Quam victoriam per se magnificam, Quinctus Ennius amicus eius, insigni laude celebrauit.

*L. Scipio Asiaticus.*

Scipio Asiaticus, frater Africani, infirmo corpore, tamen in Africa virtutis nomine à fratre laudatus, Consul, Antiochum regem Syriæ, legato fratre, apud Sipylum montem, cum arcus hostium pluuiæ hebetati fuissent, vicit : & regni relictæ à patre, parte priuauit, hinc Asiaticus dictus. Post reus pecuniæ interceptæ, ne in carcerem duceretur, Gracchus pater Tribunus plebis, licet inimicus eius, intercessit. M. Cato Censor equum ei ignominie causa ademit.



*Antiochus rex Syria.*

Antiochus Syriæ rex, nimia opum fiducia bellum Romanis intulit, specie Lysimachiae repetundæ, quam à maioribus suis in Thracia conditam Romani possidebant: statimque Græciam insulasque eius occupavit. In Eubœa luxuria clanguit. Aduentu Acilij Glabrionis excitatus, Thermopylas occupavit: vnde industria Marci Catonis ciectus, in Asiam refugit. Nauali prælio, cui Annibalem præfecerat, à L. Æmilio Regillo superatus: filium Scipionis Africani, quem inter nauigandum ceperat, patri remisit: qui ei, pro reddenda gratia, suavit, vt amicitiam Romanam peteret; Antiochus spreto consilio apud Sipylum montem cum L. Scipione conflictus: victus, & ultra Taurum montem relegatus, à sodalibus, quos temulentus in conuiuio pulsauerat, occisus est.

*Cn. Manlius Vulso.*

Cnæus Manlius Vulso Consul, missus ad ordinandam Scipionis Asiatici provinciam, cupiditate triumphis bellum Pisidis & Gallogræcis, qui Antiocho adfuerant, intulit. His facile victis, inter captiuos vxor regis Orgiagontis Centurioni cuidam in

custodiam data : à quo vi stuprata de iniuria tacuit , & post impetrata redemptione , marito adulterum Centurionem interficiendum tradidit.

*L. Æmilius Paullus Macedonicus.*

Lucius Paullus Æmilius , filius eius qui apud Cannas cecidit , primo Consulatu , quem post tres repullas adeptus erat , de Liguribus triumphavit. Rerum gestarum ordinem in tabula pictum publice posuit. Iterum Consul Persen Philippi filium , regem Macedonum , apud Samothracas cepit , victum flevit , & assidere sibi iussit : tamen in triumphum duxit. In hac lætitia duos filios amisit : & progressus ad Populum , gratias Fortunæ egit , quod si quid aduersi Reipublicæ imminerebat , sua esset calamitate decissum. Ob hæc omnia , ei à Populo & à Senatu concessum est , ut ludis Circensibus triumphali veste uteretur. Ob huius continentiam & paupertatem post mortem eius dos vxori , nisi venditis possessionibus , non potuit exsolui.

*Tiberius Sempronius Gracchus.*

Tiberius Sempronius Gracchus , nobilissima familia ortus , Scipionem Asiaticum quamvis inimicum , duci in carcerem non

est passus; Prætor Galliam domuit, Consul Hispaniam, altero Consulatu Sardiniam: tantumque captiuorum adduxit, ut longa venditione res in prouerbium ueniret, *Sardi venales*. Censor libertinos, qui rusticas tribus occuparant, in quatuor urbanas diuisit: ob quod à Populo collega eius Claudius, nam ipsum auctoritas ruebatur, reus factus est: & cum cum duæ classes condemnassent, Tiberius iurauit se cum illo in exsilium iturum: ita reus absolutus est. Cum in domo Tiberij duo angues è geniali toro repissent, responso dato, cum de dominis periturum; cuius sexus anguis fuisset occisus: amore Corneliæ coniugis marem iussit interfici.

*P. Scipio Æmilianus.*

Publius Scipio Æmilianus, Paulli Macedonici filius, à Scipione Africano adoptatus, in Macedonia cum patre agens, victum Persen tam pertinaciter persecutus est, ut media nocte in castra redierit. Lucullo in Hispania legatus, apud Interca-tiam oppidum prouocatorem singulari prælio vicit. Muros hostilis ciuitatis primus ascendit. Tribunus in Africa sub M. Manilio imperatore, cohortes octo obsidione vallatas consilio & virtute seruauit, à quibus corona obsidionali aurea donatus.



Cum Ædilitatem peteret, Consul ante annos vltro factus, Carthaginem intra sex menses deleuit. Numantiam in Hispania, correcta prius militum disciplina, fame vicit, hinc Numantinus dictus. Caio Lælio plurimum vsus: ad reges adeundos missus, duos secum, præter eum, seruos duxit. Ob res gestas superbus, Gracchum iure cæsum videri respondit, obstrepente Populo, Taceant, inquit, quibus Italia nouerca, non mater est: addidit, Quos iub corona vendidi. Censor, Mummius collega segnior, in Senatu ait: Vtinam mihi collegam aut dedissetis, aut non dedissetis. Suscepta Agrariorum causa domi repente exanimis inuentus, obuoluto capite elatus est ne liuor in ore appareret. Huius patrimonium tam exiguum fuit, vt xxxii. libras argenti, duas & selibram auri reliquerit.

*C. Hostilius Mancinus.*

Caius Hostilius Mancinus Consul aduersum Numantinos vetantibus auib, & nescio qua voce reuocante profectus, cum ad Numantiam venisset, exercitum Popillij acceptum prius corrigere decreuit: inde solitudinem petit. Eo die Numantini forte solemnem nuptu filias locabant: & vnā speciosā duobus competentibus, pater puellæ conditionem tulit, vt ei illa nube-

beret, qui hostis dextram retulisset. Profecti iuvenes, abscessum Romanorum in modum fugæ properantium cognoscunt: rem ad suos referunt. Illi statim quatuor millibus viginti millia Romanorum ceciderunt. Mancinus, auctore Tiberio Graccho Quæstore suo, in leges hostium fœdus percussit: quo per Senatum improbato, Mancinus Numantinis deditus, nec receptus, augurio in castra deductus: Præturam postea consecutus est.

*L. Mummius Achaicus.*

Lucius Mummius, deuicta Achaia, Achaicus; Consul aduersus Corinthios missus, victoriam alieno labore quæsitam intercepit. Nam cum illos Metellus Macedonicus apud Heracleam fudisset, & duce Critolao priuasset, cum lictoribus & paucis equitibus in Metelli castra properauit, & Corinthios apud Leucopetram vicit duce Diao, qui domum refugit, eamque incendit: coniugem interfecit, & in ignem præcipitauit: ipse veneno interijt. Mummius Corinthum signis tabulisque spoliauit: quibus cum totam repleisset Italiam, in domum suam nihil contulit.

*Q. Cæcilius Metellus Macedonicus.*

Quinctus Cæcilius Metellus à domita

Macedonia, Macedonicus : Prætor Pseudo-philippum, qui idem Andrisclus dictus est, vicit. Achæos bis prælio fudit: triumphandos Mummio tradidit. Inuisus plebi ob nimiam seueritatem: & ideo post duas repulsas Consul ægre factus, Arbachos in Hispania domuit. Apud Contrebiæ oppidum cohortes loco pulsas, redire & locum recipere iussit. Cum omnia proprio & subito consilio ageret, amico cuidam quid acturus esset roganti: Tunicam, inquit, meam exurerem, si eam consilium meum scire existimarem. Hic quatuor filiorum pater, supremo tempore humeris eorum ad sepulcrum elatus est: ex quibus treis Consulares, vnum etiam triumphantem vidit.

*C. Cæcilius Metellus Numidicus.*

Quinctus Cæcilius Metellus, Numidicus, quia Consul de Iugurtha rege Numidiæ triumphauit, Censor Quinctium, qui se Tiberij Gracchi filium mentiebatur, in censum non recepit. Idem in legem Apuleiam per vim laram iurare noluit, quare in exsilium actus, Smyrnæ exsulauit. Calidia deinde rogatione reuocatus, cum ludis forte litteras in theatro accepisset, non prius eas legere dignatus est quam spectaculum finiretur. Metellæ sororis suæ virum laudare noluit, quod is solus iudicium contra leges detrectarat.



*Q. Metellus Pius.*

Quinctus Metellus Pius Numidici filius: Pius, quia patrem lacrymis & precibus assidue ab exilio reuocavit, Prætor bello Sociali Q. Popedius, Marforum ducem, interfecit. Consul in Hispania Herculeios fratres oppressit: Sertorium Hispania expulit. Adolefcens in petitione Præturæ & pontificatus, Consularibus viris prælatus est.

*Tiberius Gracchus.*

Tiberius Gracchus, Africani ex filia nepos, quæstor Mancino in Hispania, fœdus eius flagitiosum probauit. Periculum deditiōis eloquentiæ grātia effugit. Tribunus plebis legem tulit, ne quis plus quingenta agri iugera haberet. Octauio collegæ intercedenti, nouo exemplo magistratum abrogauit. Dein tulit, vt ea familia, quæ ex Attali hereditate erat, ageretur: vt Populo diuideretur. Deinde cum prorogare sibi potestatem vellet, aduersis auspicijs in publicum processit, statimque Capitolium petijt, manum ad caput referens: quo salutem suam Populo commendabat: hoc nobilitas ita accepit, quasi diadema posceret: segniterque cessante Mucio Consule; Scipio Nasica sequi se iussis, qui saluam Rem-

Rempublicam vellent, Gracchum in Capitolium persecutus oppressit. Cuius corpus Lucretij Ædilis manu in Tiberim missum; unde ille Vespillo dictus. Nasica ut inuidiæ subtraheretur, per speciem legationis in Asiam ablegatus est.

*C. Gracchus.*

Caius Gracchus pestilentem Sardiniam Quæstor sortitus, non veniente successore, sua sponte discessit. Aseulanæ & Fregellanæ defectionis invidiam sustinuit. Tribunus plebis Agrarias & Frumentarias leges tulit. colonos etiam Capuam & Tarentum mittendos censuit. Triumviros agris diuidendis se, & Fulvium Flaccum, & C. Crassum constituit. Minucio Rufo Tribuno plebis legibus suis obrogante in Capitolium venit: ubi cum Atilius, præco Opimij Consulis, in turba fuisset occisus, in forum descendit, & imprudens concionem à Tribuno plebis auocavit; qua re arcessitus, cum in Senatum non venisset, armata familia Aventinum occupavit, ubi ab Opimio victus, dum à templo Dianæ defilit, talum intorsit, & Pomponio amico apud portam Trigeminam, P. Latorio in Ponte Sublicio persequentibus resistente, in lucum Furinæ peruenit. Ibi vel sua, vel serui Euphori manu interfectus: caput à Septi-

50      SEX. AVR. VICTORIS  
muleio amico Gracchi ad Opimum re-  
latum, auro expensum fertur, propter aua-  
ritiam infuso plumbo grauius effectum.

*M. Liuius Drusus.*

Marcus Liuius Drusus, genere & elo-  
quentia magnus, sed ambitiosus & super-  
bus, Ædilis munus magnificentissimum  
dedit: vbi Remmio collegæ, quædam de  
vtilitate Reipublicæ suggerenti: Quid tibi,  
inquit, cum Republica nostra? Quæstor  
in Asia nullis insignibus vti voluit, ne  
quid ipso esset insignius. Tribunus pl.  
Latinis ciuitatem, plebi agros, Equitibus  
curiam, Senatui iudicia permisit. Nimis  
liberalitatis fuit: ipse etiam professus, ne-  
mini se ad largiendum præter cælum &  
cœnum reliquille: ideoque cum pecunia  
egeret, multa contra dignitatem fecit. Ma-  
gulsam Mauritaniam principem ob regis  
simultatem profugum, accepta pecunia  
prodidit: quem ille elephanto obiecit.  
Adherbalem filium regis Numidarum ob-  
sidem domi suæ suppressit: redemptionem  
eius occultam à patre sperans. Cæpionem  
inimicum actionibus suis resistentem, ait  
se de saxo Tarpeio præcipitaturum. Phi-  
lippo Consuli legibus Agrarijs resistenti,  
ita collum in Comitio obtorsit, vt multus  
sanguis efflueret è naribus: quam ille lu-



xuriam obprobrans , muriam de turdis esse dicebat. Idem ex gratia nimia in inuidiam venit , nam plebs acceptis agris gaudebat ; expulsi dolebant : Equites in Senatum lecti lætabantur ; sed præteriti querebantur : Senatus permissis iudicijs exultabat ; sed societatem cum Equitibus agere ferebat. Vnde Liuius anxius , vt Latino- rum postulata differret ; qui promissam ciuitatem flagitabant , repente in publico concidit : siue morbo comitali , seu hausto caprino sanguine , semianimis domum re- latus. Vota pro illo per Italiam publice suscepta sunt : & cum Latini Consulem in Albano monte interfecturi essent , Phi- lippum admonuit vt caueret : vnde in Se- natu accusatus : cum domum se reciperet , immisso inter turbam percussore , corruit. Inuidia cædis apud Philippum , & Cæ- pionem fuit.

*C. Marius pater.*

Caius Marius septies Consul , Arpinas , humili loco natus , primis honoribus per ordinem functus , legatus Metello in Nu- midia , criminando eum , Consulatum ade- ptus , Iugurtham captum ante currum egit. In proximum annum Consul vltro factus , Teutones in Gallijs apud Aquas Sextias , Cimbros in Italia , in campo Caudio vicit.

deque his triumphauit. Sexies Consul per ordinem factus, Appuleium Saturninum Trib. plebis, & Glauciam Prætorem seditiosos, ex Senatus-consulto interemit. Et cum Sulpicia rogatione prouinciam Sullæ eriperet, armis ab eo victus, Minurnis in palude delituit. Inuentus, & in carcerem coniectus, immissum percussorem Gallum vultus auctoritate deterruit: acceptaque nauicula in Africam traiecit, ibi diu exsulauit. Mox Cinnana dominatione reuocatus, ruptis ergastulis exercitum fecit: cæsisque inimicis iniuriam ultus, septimo Consulatu, vt quidam ferunt, voluntaria morte decessit.

*C. Marius filius.*

Caius Marius filius viginti quinque annorum Consulatum inuasit: quem honorem tam immaturum mater fleuit. Hic patri scuitia similis, curiam armatus obsedit, inimicos trucidauit, quorum corpora in Tiberim præcipitauit. In apparatu belli quod contra Sullam parabatur, apud Sacripontum vigilijs & labore defessus, sub dio requieuit: & absens victus, fugæ, non pugnæ interfuit. Præneste refugit, vbi per Lucretium Offellam obsessus, tentata per cuniculum fuga, cum omnia septa intelligeret, iugulandum se Pontio Telesino præbuit.

*L. Cornelius Cinna.*

Lucius Cornelius Cinna flagitiosissimus, Rempublicam summa crudelitate vastauit. Primo Consulatu legem de exsulibus reuocandis ferens, ab Octauio collega prohibitus, & honore priuatus, Vrbe profugit: vocatisque ad pileum seruis, aduersarios vicit: Octauium interfecit: Ianiculum occupauit. Iterum & tertium Consulem se ipse fecit. Quarto Consulatu cum bellum contra Sullam pararet, Anconæ ob nimiam crudelitatem ab exercitu lapidibus occisus est.

*C. Flavius Fimbria.*

Caius Flavius Fimbria sæuissimus, quippe Cinnæ satelles, Valerio Flacco Consuli legatus in Asiam profectus, per simultatem dimissus, corrupto exercitu, ducem interficiendum curauit. Ipse correptis imperij insignibus, prouinciam ingressus, Mithridatem Pergamo expulit. Ilium, vbi tardius portæ patuerant, incendi iussit: ibi Mineræ templum inuiolatum stetit, quod diuina maiestate seruatum nemo dubitauit. Ibi dem Fimbria militiæ principes securi percussit: mox à Sulla Pergami obsessus, corrupto exercitū desertus semet occidit.



*Viriathus Lusitanus.*

Viriathus genere Lusitanus, ob paupertatem primo mercenarius, deinde alacritate venator, audacia latro, ad postremum dux, bellum aduersum Romanos sumpsit, eorumque imperatorem Claudium Vnimanum, dein C. Nigidium oppressit. Pacem à Populo Romano maluit integer petere, quam victus: & cum alia dedisset, & arma retinerentur, bellum renouauit. Cæpio cum vincere eum aliter non posset, duos satellites pecunia corripit, qui Viriathum humi depositum peremerunt. Quæ victoria, quia empta erat, à Senatu non probata.

*M. Æmilius Scaurus.*

Marcus Æmilius Scaurus nobilis, pauper, nam pater eius, quamuis patricius, ob paupertatem carbonarium negotium exercuit. Ipse primo dubitauit, honores peteret, an argentariam faceret: sed eloquentiæ consultus, ex ea gloriam peperit. Primo in Hispania corniculo meruit. Sub Oreste in Sardinia stipendia fecit. Ædilis, iuri reddendo magis, quam muneri edendo studuit. Legatus Calpurnij, Iugurthæ aduersus, tandem eius pecunia victus. Consul

legem de sumptibus & libertinorum suffragijs tulit. P. Decium Prætorem transeunte ipso sedentem, iussit assurgere, eique vestem scidit, sellam concidit: ne quis ad eum in ius iret, edixit. Consul Ligures & Gantiscos domuit, atque de his triumphauit. Censor viam Æmiliam strauit: pontem Muluium fecit; Tantumque auctoritate potuit, vt Opimium contra Gracchum; Marium contra Glauciam & Saturninum, priuato consilio armaret. Idem filium suum, quia præsidium deseruerat, in conspectum suum vetuit accedere: ille ob hoc dedecus mortem sibi consciiuit. Scaurus senex cum à Vario Tribuno plebis argueretur, quasi socios & Latium ad arma coëgisset, apud Populum ait: Varius Sucionensis Æmilium Scaurum ait socios ad arma coëgisse; Scaurus negat: vtri potius credendum putatis?

*L. Appuleius Saturninus.*

Lucius Appuleius Saturninus, Tribunus plebis seditiosus, vt gratiam Marianorum militum pararet, legem tulit, vt veteranis centena agri iugera in Africa diuiderentur: intercedentem Bæbium collegam, facta per Populum lapidatione submouit; Glauciae Prætori, quod is eo die, quo ipse concionem habebat, ius dicendo partem

Populi auocasset, sellam concidit, vt magis popularis videretur; Quendam libertini ordinis subornauit, qui se Tiberij Gracchi filium fingeret; Ad hoc testimonium Sempronia soror Gracchorum producta, nec precibus, nec minis adduci potuit, vt dedecus familiæ agnosceret. Saturninus Aulo Nonio competitore interfecto Tribunus plebis resectus, Siciliam, Achaïam, Macedoniam nouis colonis destinauit, & aurum, dolo, an scelere Capionis partum, ad emptionem agrorum conuertit. Aqua & igni interdixit ei, qui in leges suas non iurasset. Huic legi multis nobilibus obrogantibus cum tonuisset, clamauit: Iam, inquit, nisi quiescitis, grandinabit. Metellus Numidicus exsulare quam iurare maluit. Saturninus tertio Tribunus plebis resectus, vt satellitem suum Glauciam Prætozem, Consulem faceret, Memmium competitorem eius in campo Martio necandum curauit. Marius Senatus-consulto armatus, quo censebatur, darent operam Consules ne quid Respublica detrimenti caperet; Saturninum & Glauciam in Capitolium persecutus obsedit, maximoque astu incisissimis fistulis, in deditiorem accepit: nec deditis fides seruata. Glauciæ fracta ceruix: Appuleius cum in curiam fugisset, lapidibus & tegulis desuper interfectus est. Caput eius Rabirius quidam



Senator per conuiuia in ludibrium circumtulit.

*L. Licinius Lucullus.*

Lucius Lucullus nobilis, disertus & diues, munus quæstorium amplissimum dedit. Prolemæum regem Alexandriæ Consuli Sullæ conciliauit : & mox per Murenæ in Asia classem Mithridatis. Prætor Africam iustissime rexit. Aduersus Mithridatem Consul missus, collegam suum Cottam Chalcedone obsessum liberauit. Cyzicum obsidio soluit : Mithridatis copias ferro & fame affixit, eumque regno suo, Ponto, expulit. Quem rursus cum Tigrane rege Armeniæ subueniente magna felicitate superauit. Nimiis in habitu : maxime signorum & tabularum amore flagrauit. Post, cum alienata mente desipere cœpisset, tutela eius M. Lucullo fratri permissa est.

*L. Cornelius Sulla.*

Cornelius Sulla, à fortuna Felix dictus, cum paruulus à nutrice ferretur, mulier obuia, Salue, inquit, puer tibi & Reipub. tuæ felix : & statim quæsitæ quæ hoc dixisset, non potuit inueniri. Hic Quæstor Marij, Iugurtham à Boccho in deditionem accepit. Bello Cimbrico & Teutonico le-

gatus, bonam operam nauauit. Prætor inter ciueis ius dixit. Prætor Ciliciam prouinciam habuit. Bello Sociali Samnites, Irpinosque superauit. Ne monumenta Bocchi tollerentur, Mario restitit. Consul Asiam sortitus, Mithridatem apud Orchomenum & Chæroneam prælio fudit. Archelaum præfectum eius Athenis vicit. Portum Peiræeum recepit. Henetos, & Dardanos in itinere superauit. Cum rogatione Sulpicia imperium eius transferretur ad Marium, in Italiam regressus, corruptis aduersariorum exercitibus, Carbonem Italia expulit: Marium filium apud Sacriportum, Telesinum apud portam Collinam vicit. Mario Præneste interfecto, Felicem se edicto appellauit. Proscriptionis tabulas primus proposuit. Nouem millia deditorum in Villa Publica cecidit. Numerum sacerdotum auxit, Tribunariam potestatem minuit. Republica ordinata Dictaturam deposuit: vnde sperni cœptus, Puteolos concessit; & morbo, qui Phthiriasis vocatur, interiit.

*Mithridates rex Ponti.*

Mithridates rex Ponti, oriundus à Septem Persis, magna vi animi & corporis, vt sexiuges equos regeret, duarum & viginti gentium ore loqueretur, Bello Sociali dissidentibus Romanis, Nicomedem Bi-

thynia, Ariobarzanem Cappadocia expulit Litteras per totam Asiam misit, ut quicumque Romanus esset, certa die interficeretur: & factum est. Græciam insulasque omnes, excepta Rhodo, occupauit. Sulla eum prælio vicit, classem eius proditione Archelai interceptit: ipsum apud Orchomenum oppidum fudit, & oppressisset, nisi aduersum Marium festinans qualemcunque pacem componere maluisset. Deinde eum Cabiris resistentem Lucullus fudit. Mithridates post à Pompeio nocturno prælio victus, in regnum confugit: ubi per seditionem popularium à Pharnace filio in turre obsessus, venenum sumpsit. Quod cum tardius subiret, quia aduersum venena multis antea medicaminibus corpus firmarat: immissum percussorem Gallum Sithocum auctoritate vultus territum reuocauit, & in eadem suam manum trepidantis adiuuit.

*Cn. Pompeius Magnus.*

Cn. Pompeius Magnus, Ciuili bello Sullæ partes secutus, ita egit, ut ab eo maxime diligeretur. Siciliam sine bello à proscriptis recepit. Numidiam Hiærbæ ereptam, Massinix restituit. Viginti sex annos natus triumphauit. Lepidum acta Sullæ rescindere volentem, priuatus Italia fugauit. Prætor in Hispaniam pro Consulibus missus



Sertorium vicit. Mox piratas intra quadragessimum diem subegit. Tigranem ad deditionem, Mithridatem ad venenum compulit. Deinde mira felicitate & celeritate nunc in Septemtrione Albanos, Colchos, Heniochos, Caspios, Iberos: nunc in Oriente Parthos, Arabas, atque Iudæos cum magno sui terrore penetrauit. Primus in Hircanum, Caspium, Rubrum, & Arabicum mare vsque peruenit. Mox, cum diuiso orbis imperio, Crassus Syriam, Cæsar Galliam, Pompeius Urbem obtineret, post eadem Crassi, Cæsarem dimittere exercitum iussit: Cuius infesto aduentu Vrbe pulsus, in Pharsalia victus, ad Ptolemæum Alexandria regem confugit. Eius imperio ab Achilla & Pothino satellitibus occisus est: Huius latus sub oculis vxoris & liberorum à Septimio Ptolemæi præfecto mucrone confossum est. Iamque defuncti caput gladio præcisum, quod vsque ad ea tempora fuerat adoratum. Truncus Nilo iactus, à Seruio Codro rogo iniustus, humatusque est, inscribente sepulchro: HIC SITVS EST MAGNVS POMPEIVS. Caput ab Achilla Ptolemæi satellite, Ægyptio velamine inuolutum, cum annulo Cæsari præsentatum est: qui non continens lacrymas, illud plurimis & preciosissimis odoribus cremandum curauit.

ADDITAMENTVM  
VIRORVM ILLVSTRIVM,

ex libris antiquis manu de-  
scriptis.

*Julius Cæsar. I.*

**C**AIVS Iulius Cæsar veneratione rerum  
gestarum Diuus dictus; contubernalis  
Thermo in Asiam profectus; cum sæpe ad  
Nicomedem regem Bithyniæ commearer,  
impuditiæ infamatus est. Mox Dolabel-  
lam iudicio oppressit. Dum studiorum caus-  
sa Rhodum petit, à piratis captus & re-  
demprus, eisdem & postea captos puniuit.  
Prætor Lusitaniam, & post Galliam, ab  
Alpibus vsque, & Oceanum bis classe  
transgressus, Britanniam subegit. Cum ei  
triumphus à Pompeio negaretur; armis  
cum Vrbe pulsum in Pharſalia vicit. Ca-  
pite eius oblato fleuit; & honorifice sepeliri  
fecit: mox à satellibus Ptolemæi obſessus,  
eorum & regis nece Pompeio parentauit.  
Pharnacem Mithridatis filium fama no-  
minis fugauit. Iubam & Scipionem in

Africa ; Pompeios iuvenes in Hispania apud Mundam oppidum ingenti prælio vicit ; deinde ignoscendo amicis odia cum armis deposuit : nam Lentulum tantum , & Afranium , & Faustum Sullæ filium iussit occidi. Dictator in perpetuum factus à Senatu ; in curia , Cassio & Bruto cædis auctoribus , tribus & viginti vulneribus occisus est : cuius corpore pro Rostris posito , Sol orbem suum cælasse dicitur.

### *Octavianus Cæsar II.*

Cæsar Octavianus ex Octavia familia in Iuliam translatus , in vltionem Iulij Cæsaris , à quo heres fuerat institutus , Brutum & Cassium cædis auctores in Macedonia vicit : Sextum Pompeium , Cn. Pompeij F. bona paterna repetentem , in freto Siculo superauit. Marcum Antonium Consulem Syriam obtinentem , amore Cleopatæ deuinctum , in Actiaco Ambraciæ litore debellauit : Reliquam orbis partem per legatos domuit. Huic Parthi signa , quæ Crasso sustulerant , vltro reddiderunt. Indi , Scythæ , Sarmatæ , Daci , quos non domuerat , dona miserunt. Iani Gemini portas bis ante se clausas , primo sub Numa , iterum post primum Punicum bellum , sua manu clausit. Dictator in perpetuum factus , à Senatu , ob res gestas Diuus Augustus est appellatus.



*Cato Prætorius III.*

Cato Prætorius, Catonis Censorij pronepos, cum in domo auunculi Drusi educaretur, nec pretio, nec minis potuit adduci à Q. Popedio Silone Marforum principe vt fauere se causæ Sociorum diceret. Quæstor in Cyprum missus ad vehendam ex Ptolemæi hereditate pecuniam, cum summa eam fide perduxit: præterea coniuratos puniendos censuit. Bello Civili, Pompeij partes secutus est: quo victo exercitum per deserta Africæ duxit, vbi Scipioni Consulari delatum ad se imperium concessit. Victis partibus, Vticam concessit, vbi filium hortatus, vt clementiam Cæsaris experiretur, ipse lecto Platonis libro, qui de bonis mortis est, semet occidit.

*M. Tullius Cicero IV.*

Marcus Tullius Cicero, genere Arpinas, patre Equite Romano natus, genus à Tito Tatio rege duxit. Adolescens Rosciano iudicio eloquentiam, & libertatem suam aduersus Sullanos ostendit: ex quo veritus inuidiam Athenas studiorum gratia petiuit, vbi Antiochum Academicum philosophum studiose audiuit: inde eloquentiæ gratia Asiam, post Rhodum petijt, vbi Molonem

Græcum, rhetorum tum disertissimum, magistrum habuit; qui flecte dicitur quod per hunc Græcia eloquentiæ laude priuaretur. Quæstor Siciliam habuit. Ædilis C. Verrem repetundarum damnauit. Prætor Ciliciam latrocinij liberauit. Consul coniuratos capite puniuit. Mox inuidia P. Clodij, instinctuque Cæsaris & Pompeij, quos dominationis suspectos, eadem, qua quondam Sullanos, libertate perstrinxerat, sollicitatis Piscæ & Gabinio Consulibus, qui Macedoniam Syriamque prouincias in stipendium opera huius acceperant, in exilium actus: mox ipso referente Pompeio redijt, eumque Ciuili bello secutus est. Quo victo veniam à Cæsare ultro accepit: quo interfecto Augustum fouit: Antonium hostem iudicauit. Et cum III. viros se fecissent, Cæsar, Lepidus, Antoniusque, concordia non aliter visa est inter eos iungi posse; nisi Tullius necaretur: qui, immixtis ab Antonio percussoribus, cum forte Formijs quiesceret, imminens exitium corui auspicio didicit, & fugiens occisus est. Caput ad Antonium relatum.

*Marcus Brutus. V.*

Marcus Brutus auunculi Catonis imitator, Athenis philosophiam, Rhodi eloquentiam didicit. Cytheridem mimam cum

cum Antonio & Gallo amauit. Quæstor in Galliam proficisci noluit; quod is bonis omnibus displicebat. Cum Appio Claudio in Cilicia fuit: & cum ille repetundarum accusaretur; ipse ne verbo quidem infamatus est. Ciuili bello à Catone ex Cilicia retractus, Pompeium secutus est; quo victo, veniam à Cæsare accepit, & Proconsul Galliam rexit; tamen cum alijs coniuratis in curia Cæsarem occidit; Et ob inuidiam veteranorum in Macedoniam missus; ab Augusto in campis Philippicis victus, Stratonem ceruicem præbuit.

*C. Cassius Longinus. V I.*

Caius Cassius Longinus Quæstor Crassi in Syria fuit, post cuius cædem, collectis reliquijs in Syriam redijt. Ofacem præfectum regium apud Orontem fluium superauit. Dein quod coemptis Syriacis mercibus foedissime negotiaretur, Caryota cognominatus est. Trib. pleb. Cæsarem oppugnauit. Bello Ciuili Pompeium secutus classi præfuit: à Cæsare veniam accepit, tamen aduersus eum coniurationis auctor cum Bruto fuit, & in cæde dubitanti cuidam, Vel per me, inquit, feri: magnoque exercitu comparato, in Macedonia Bruto coniunctus in campis Philippicis ab Antonio victus, cum eandem for-



tunam Bruti putaret, qui Cæsarem vice-  
rat, Pandaro liberto iugulum præbuit.  
Cuius morte inaudita, Antonius exclamasse dicitur, Vici.

*Sextus Pompeius. VII.*

Sextus Pompeius in Hispania apud Mundam victus, amisso fratre, reliquijs exercitus collectis Siciliam petijt, vbi ruptis ergastulis mare obsedit. Interceptis com meatibus Italiam vexauit: & cum mari feliciter vteretur, Neptuni se filium confessus est, cumque bobus auratis & equo placauit. Pace facta epulatus in naui cum Antonio & Cæsare non inuenuste ait: Hæ sunt meæ carinæ: quia Romæ in Carinis domum eius Antonius tenebat. Rupto per eundem Antonium fœdere, Sextus ab Augusto per Agrippam nauali prælio victus in Asiam fugit, vbi à Antonianis militibus occisus est.

*Marcus Antonius. VIII.*

Marcus Antonius in omnibus expeditionibus Iulio Cæsari comes, Lupercalibus diadema ei imponere tentauit, mortuo diuinos honores decreuit, Augustum perfidiosè tractauit: à quo apud Mutinam victus, Perusij fame domitus in Galliam fugit:

ibi Lepidum sibi collegam adiunxit : Brutum, exercitu eius corrupto, occidit : Reparatis viribus in Italiam regressus cum Cæsare in gratiam redijt. Triumvir factus proscriptionem à Lucio Cæsare auunculo suo cœpit. In Syriam missus bellum Parthis intulit : à quibus victus, vix tertiam partem de quindecim legionibus in Ægyptum perduxit ; ibi Cleopatraz amore deuinctus in Actiaco litore ab Augusto victus est. Inde Alexandriam regressus, cum habitu regio in solio regali sedisset, necem sibi consciuit.

*Cleopatra Regina. I X.*

Cleopatra Ptolemæi regis Ægyptiorum filia, à fratre suo Ptolemæo eodemque marito, quem fraudare regno voluerat, pulsa, ad Cæsarem bello Ciuili Alexandriam venit : ab eo specie sua & concubitu, regnum Ptolemæi & necem impetrauit. Hæc tantæ libidinis fuit, vt sæpe prostituerit : tantæ pulcritudinis, vt multi noctem illius morte emerint. Postea Antonio iuncta, cum eo victa, cum se illi inferias ferre simularet, in Mausoleo eius, admotis aspidibus, periit.







